

晉

書

冊三

晉書卷十二

唐 太宗 宗 文 皇 帝 御 撰

志第二

天文中

七曜

雜星氣

客星

流星

雲氣

十輝

雜氣

史傳事驗

七曜

日為太陽之精主生養恩德人君之象也人君有瑕必露其慝以告示焉故日

月行有道之國則光明人君吉昌百姓安寧人君乘土而王其政太平則日五

色無主日變色有軍軍破無軍喪侯王其君無德其臣亂國則日赤無光日失

色所臨之國不昌日晝昏行人無影到暮不止者上刑急下不聊生不出一年

有大水日晝昏烏鳥羣鳴國失政日中烏見主不明為政亂國有白衣會將軍

出旌旗舉日中有黑子黑氣黑雲乍乍五臣廢其主日蝕陰侵陽臣掩君之

象有亡國

月爲太陰之精以之配日女主之象以之比德刑罰之義列之朝廷諸侯大臣之類故君明則月行依度臣執權則月行失道大臣用事兵刑失理則月行乍南乍北女主外戚擅權則或進或退月變色將有殃月晝明姦邪並作君臣爭明女主失行陰國兵強中國饑天下謀僭數月重見國以亂亡

歲星曰東方春木於人五常仁也五事貌也仁虧貌失逆春令傷木氣則罰見歲星歲星盈縮以其舍命國其所居久其國有德厚五穀豐昌不可伐其對爲衝歲乃有殃歲星安靜中度吉盈縮失次其國有憂不可舉事用兵又曰人主之象也色欲明光色潤澤德合同又曰進退如度姦邪息變色亂行主無福又主福主大司農主齊吳主司天下諸侯人君之過主歲五穀赤而角其國昌赤黃而沉其野大穰

熒惑曰南方夏火禮也視也禮虧視失逆夏令傷火氣罰見熒惑熒惑法使行無常出則有兵入則兵散以舍命國爲亂爲賊爲疾爲喪爲饑爲兵所居國受

殃環繞鉤已芒角動搖變色乍前乍後乍左乍右其爲殃愈甚其南丈夫北女子喪周旋止息乃爲死喪寇亂其野亡地其失行而速兵聚其下順之戰勝又曰熒惑主大鴻臚主死喪主司空又爲司馬主楚吳越以南又司天下羣臣之過司驕奢亡亂妖孽主歲成敗又曰熒惑不動兵不戰有誅將其出色赤怒逆行成鉤已戰凶有圍軍鉤已有芒角如鋒刃人主無出宮下有伏兵芒大則人衆怒又爲理外則理兵內則理政爲天子之理也故曰雖有明天子必視熒惑所在其入守犯太微軒轅營室房心主命惡之

填星曰中央季夏土信也思心也仁義禮智以信爲主貌言視聽以心爲正故四星皆失填乃爲之動動而盈侯王不寧縮有軍不復所居之宿國吉得地及女子有福不可伐去之失地若有女憂居宿久國福厚易則薄失次而上二三宿曰盈有主命不成不乃水火失次而下曰縮后戚其歲不復不乃天裂若地動一曰填爲黃帝之德女主之象主德厚安危存亡之機司天下女主之過又曰天子之星也天子失信則填星大動

太白曰西方秋金義也言也義虧言失逆秋令傷金氣罰見太白太白進退以候兵高卑遲速靜躁見伏用兵皆象之吉其出西方失行夷狄敗出東方失行中國敗未盡期曰過參天病其對國若經天天下草民更王是謂亂紀人衆流亡晝見與日爭明強國弱小國強女主昌又曰太白主大臣其號上公也大司馬位謹候此

辰星曰北方冬水智也聽也智虧聽失逆冬令傷水氣罰見辰星辰星見則主刑主廷尉主燕趙又爲燕趙代以北宰相之象亦爲殺伐之氣戰鬪之象又曰軍於野辰星爲偏將之象無軍爲刑事和陰陽應效不效其時不和得失其時寒暑失其節邦當大饑當出不出是謂擊卒兵大起在於房心間地動亦曰辰星出入躁疾常主夷狄又曰蠻夷之星也亦主刑法之得失色黃而小地大動光明與月相逮其國大水主言空又爲同焉主鼓其賊又南又后天不重也凡五星有色大小不同各依其行而順時應節色變有類凡青皆比參左肩赤比心大星黃比參右肩白比狼星黑比奎大星不失本色而應其四時者吉色

害其行凶

凡五星所出所行所直之辰其國爲得位得位者歲星以德熒惑有禮填星有
福太白兵強辰星陰陽和所行所直之辰順其色而有角者勝其色害者敗居
實有德也居虛無德也色勝位行勝色行得盡勝之

營室爲清廟歲星廟也心爲明堂熒惑廟也南斗爲文太室填星廟也亢爲疏
廟太白廟也七星爲員官辰星廟也五星行至其廟謹候其命

凡五星盈縮失位其精降于地爲人歲星降爲貴臣熒惑降爲童兒歌謠嬉戲
填星降爲老人婦女太白降爲壯夫處於林麓辰星降爲婦人吉凶之應隨其
象告

凡五星木與土合爲內亂饑與水合爲變謀而更事與火合爲饑爲旱與金合
爲白衣之會合鬪國有內亂野有破軍爲水太白在南歲星在北名曰牝牡年
穀大熟太白在北歲星在南年或有或無火與金合爍爲喪不可舉事用兵從
軍爲軍憂離之軍却出太白陰分宅出其陽偏將戰與土合爲憂主孽卿與水

合爲北軍用兵舉事大敗一曰火與水合曰焯不可舉事用兵土與水合爲壅
沮不可舉事用兵有覆軍下師一曰爲變謀更事必爲旱與金合爲疾爲白衣
會爲內兵國亡地與木合國饑水與金合爲變謀爲兵憂入太白中而上出破
軍殺將客勝下出客亡地視旗所指以命破軍環繞太白若與鬪大戰客勝凡
木火土金與水鬪皆爲戰兵不在外皆爲內亂凡同舍爲合相陵爲鬪二星相
近其殃大相遠毋傷七寸以內必之

凡月蝕五星其國皆亡歲以飢熒惑以亂填以殺太白以強國戰辰以女亂

凡五星入月歲其野有逐相太白將僂

凡五星所聚其國王天下從歲以義從熒惑以禮從填以重從太白以兵從辰
以法從各以其事致天下也三星若合是謂驚立絕行其國外內有兵與喪百
姓饑乏改立侯王四星若合是謂太陽其國兵喪並起君子憂小人流五星若
合是謂易行有德承慶改立王者掩有四方子孫蕃昌亡德受殃離其國家滅
其宗廟百姓離去被滿四方五星皆大其事亦大皆小事亦小

凡五星色皆圜白爲喪爲旱赤中不平爲兵青爲憂爲水黑爲疾疫爲多死黃爲吉皆角赤犯我城黃地之爭白哭泣聲青有兵憂黑有水五星同色天下偃兵百姓安寧歌舞以行不見災疾五穀蕃昌

凡五星歲政緩則不行急則過分逆則占熒惑緩則不出急則不入違道則占填緩則不還急則過舍逆則占太白緩則不出急則不入逆則占辰緩則不出急則不入非時則占五星不先行則年穀豐昌

凡五星分天之中積于東方中國利積于西方外國用兵者利辰星不出太白爲客其出太白爲主出而與太白不相從及各出一方爲格野雖有軍不戰凡五星見伏留行逆順遲速應歷度者爲得其行政合于常違歷錯度而失路盈縮者爲亂行亂行則爲天矢彗孛而有亡國革政兵饑喪亂之禍云

雜星氣

圖緯舊說及漢末劉表爲荊州牧命武陵太守劉叡集天文衆占名荊州占其雜星之體有瑞星有妖星有客星有流星有瑞氣有妖氣有日月傍氣皆略其

名狀舉其占驗次之於此云

瑞星一曰景星如半月生於晦朔助月爲明或曰星大而中空或曰有三星在赤方氣與青方氣相連黃星在赤方氣中亦名德星二曰周伯星黃色煌煌然所見之國大昌三曰含譽光耀似彗喜則含譽射四曰格澤如炎火下大上銳色黃白起地而上見則不種而穫有土功有大客

妖星一曰彗星所謂掃星本類星末類彗小者數寸長或竟天見則兵起大水主掃除舊布新有五色各依五行本精所主史臣按彗體無光傳日而爲光故夕見則東指晨見則西指在日南北皆隨日光而指頓挫其芒或長或短光芒所及則爲災二曰孛星彗之屬也偏指曰彗芒氣四出曰孛孛者孛孛然非常惡氣之所生也內不有大亂則外有大兵天下合謀闇蔽不明有所傷害晏子曰君若不政孛星將出彗星何懼乎由是言之災甚於彗三曰天棊一名覺星本類星末銳長四丈或出東北方西方主奮爭四曰天槍其出不過三月必有破國亂君伏死其辜殃之不盡當爲旱飢暴疾五曰天欃石氏曰雲如牛狀

甘氏本類星末銳巫咸曰彗星出西方長可二三丈主捕制六曰蚩尤旗類彗而後曲象旗或曰赤雲獨見或曰其色黃上白下或曰若植壆而長名曰蚩尤之旗或曰如箕可長二丈末有星主伐枉逆主惑亂所見之方下有兵兵大起不然有喪也七曰天衝出如人蒼衣赤頭不動見則臣謀主武卒發天子亡八曰國皇大而赤類南極老人星或曰去地三文如炬火主內寇內難或曰其下起兵兵強或曰外內有兵喪九曰昭明象如太白光芒不行或曰大而白無角乍上乍下一曰赤彗分爲昭明昭明滅光以爲起霸起德之徵所起國兵多變一曰大人凶兵大起十曰司危如太白有目或曰出正西西方之野星去地可六丈大而白或曰大而毛兩角或曰類太白數動察之而赤爲乖爭之徵主擊強兵見則主失法豪傑起天子以不義失國有聲之臣行主德十一曰天讒彗出西北狀如劍長四五丈或曰如鉤長四丈或曰狀白小數動主殺罰出則其國內亂其下相讒爲饑兵赤地千里枯骨藉藉十二曰五殘一名五鋒出正東東方之星狀類辰可去地六七丈或曰蒼彗散爲五殘如辰星出角或曰星

表有氣如暈有毛或曰大而赤數動察之而青主乖亡爲五分毀敗之徵亦爲備急兵見則主誅政在伯野亂成有急兵有喪不利衝十三曰六賊見出正南方之星去地可六丈大而赤動有光或曰形如彗五殘六賊出禍合天下逆侵關樞其下有兵衝不利十四曰獄漢一名咸漢出正北北方之野星去地可六丈大而赤數動察之中青或曰赤表下有彗從橫主逐王主刺王出則陰精橫兵起其下又爲喪動則諸侯驚十五曰旬始出北斗旁如雄雞其怒有青黑象伏鱉或曰怒雌也主爭兵又曰黃彗分爲旬始爲立主之題主亂主招橫見則臣亂兵作諸侯虐期十年聖人起伐羣猾橫恣或曰出則諸侯雄鳴十六曰天鋒彗象矛鋒天下從橫則天鋒星見十七曰燭星如太白其出也不行見則不久而滅或曰主星上有彗上出所出城邑亂有大盜不成又以五色占十八曰蓬星大如二斗器色白一名王星狀如夜火之光多至四五少一二一曰蓬星在西南長數丈左右兌出而易處星見不出三年有亂臣戮死又曰所出大水大旱五穀不收人相食十九曰長庚如一疋布著天見則兵起二十曰

四填星出四隅去地六丈餘或曰可四丈或曰星大而赤去地二丈常以夜半時出見十月而兵起皆爲兵起其下二十一曰地維藏光出四隅或曰大而赤去地二三丈如月始出見則下有亂者亡有德者昌

河圖云歲星之精流爲天棊 天槍 天猾 天衝 國皇 及登 蒼彗

熒惑散爲昭旦 蚩尤之旗 昭明 司危 天櫬 赤彗

填星散爲五殘 獄漢 大賁 昭星 絀流 旬始 蚩尤 虹蜺 擊咎

黃彗

太白散爲天杵 天柎 伏靈 大敗 司姦 天狗 天殘 卒起 白彗

辰星散爲枉矢 破女 拂樞 滅寶 繞紕 驚理 大奮祀 黑彗

五色之彗各有長短曲折應象

漢京房著風角書有集星章所載妖星皆見於月旁互有五色方雲以五寅日見各有五星所生云

天槍 天根 天荆 真若 天猿 天樓 天垣 皆歲星所生也見以甲

寅其星咸有兩青方在其旁

天陰 晉若 官張 天惑 天崔 赤若 蚩尤 皆熒惑之所生也出在

景寅日有兩赤方在其旁

天上 天伐 從星 天樞 天翟 天沸 荆彗 皆填星所生也出在戊

寅日有兩黃方在其旁

若星 帶星 若彗 竹彗 牆星 棖星 白藹 皆太白之所生也出在

庚寅日有兩白方在其旁

天美 天龜 天社 天麻 天林 天蒿 端下 皆辰星之所生也出以

壬寅日有兩黑方在其旁

已前三十五星即五行氣所生皆出於月左右方氣之中各以其所生星將出
不出日數期候之當其未出之前而見見則有水旱兵喪饑亂所指亡國失地

王死破軍殺將

客星

張衡曰老子四星及周伯王蓬絮芮各一錯乎五緯之間其見無期其行無度
荊州占云老子星色淳白然所見之國爲饑爲凶爲善爲惡爲喜爲怒周伯星
黃色煌煌所至之國大昌蓬絮星色青而熒熒然所至之國風雨不節焦旱物
不生五穀不登多蝗蟲又云東南有三星出名曰盜星出則天下有大盜西南
有三大星出名曰種陵出則天下穀貴十倍西北三大星出而白名天狗出則
人相食大凶東北有三大星出名曰女帛見則有大喪

流星

流星天使也自上而降曰流自下而升曰飛大者曰奔奔亦流星也星大者使
大星小者使小聲隆隆者怒之象也行疾者期速行遲者期遲大而無光者衆
人之事小而有光者貴人之事大而光者其人貴且衆也乍明乍滅者賊敗成
也前大後小者恐憂也前小後大者喜事也蛇行者姦事也往疾者往而不反
也長者其事長久也短者事疾也奔星所墜其下有兵無風雲有流星見良久
間乃入爲大風發屋折木小流星百數四面行者衆庶流移之象流星之類有

音如炬火下地野雉鳴天保也所墜國安有喜若小流星色青赤名曰地鴈其所墜者起兵流星有光青赤長二三丈名曰天鴈軍中之精華也其國起兵將軍當從星所之流星暉然有光光白長竟天者人主之星也主相將軍從星所之飛星大如缶若甕後皎然白前卑後高此謂頓頑其所從者多死亡飛星大如缶若甕後皎然白星滅後白者曲環如車輪此謂解銜其國人相斬爲爵祿飛星大如缶若甕其後皎然白長數丈星滅後白者化爲雲流下名曰大滑所下有流血積骨

枉矢類流星色蒼黑蛇行望之如有毛目長數匹著天主反萌主射愚見則謀反之兵合射所誅亦爲以亂伐亂續資十餘卷三十三天星出而白各天狗狀如大奔星色黃有聲其止地類狗所墜望之如火光炎炎衝天其上銳其下員如數頃田處或曰星有毛旁有短彗下有狗形者或曰星出其狀赤白有光下卽爲天狗一曰流星有光見人面墜無音若有足者名曰天狗其色白其中黃黃如遺火狀主候兵討賊見則四方相射千里破軍殺將或曰五將鬪

人相食所往之鄉有流血其君失地兵大起國易政戒守禦

營頭有雲如壞山墮所謂營頭之星所墮其下覆軍流血千里亦曰流星晝隕
名營頭

雲氣

瑞氣一曰慶雲若煙非煙若雲非雲郁郁紛紛蕭索輪囷是謂慶雲亦曰景雲
此喜氣也太平之應二曰歸邪如星非星如雲非雲或曰星有兩赤彗上向有
蓋下連星見必有歸國者三曰昌光赤如龍狀聖人起帝受終則見

妖氣一曰虹蜺日旁氣也斗之亂精主惑心主內淫主臣謀君天子誅后妃顛
妻不一二曰狎雲如狗赤色長尾爲亂君爲兵喪

十輝

周禮眡祲氏掌十輝之法以觀妖祥辯吉凶一曰祲謂陰陽五色之氣浸淫相
侵或曰抱珥背璠之屬如虹而短是也二曰象謂雲氣成形象如赤烏夾日以
飛之類是也三曰鑿日傍氣刺日形如童子所佩之鑿四曰監謂雲氣臨在日

上也五曰闇謂日月蝕或曰脫光也六曰瞽謂瞽瞍不光明也七曰彌謂白虹彌天而貫日也八曰序謂氣若山而在日上或曰冠珥背璠重疊次序在于日旁也九曰躋謂暈氣也或曰虹也詩所謂朝躋于西者也十曰想謂氣五色有形想也青饑赤兵白喪黑憂黃熟或曰想思也赤氣爲人狩之形可思而知其吉凶也

凡遊氣蔽天日月失色皆是風雨之候也沉陰日月俱無光晝不見日夜不見星有雲障之兩敵相當陰相圖議也日濛濛無光士卒內亂又曰數日俱出若鬪天下兵起大戰日鬪下有拔城日戴者形如直狀其上微起在日上爲戴戴者德也國有喜也一云立日上爲戴青赤氣抱在日上小者爲冠國有喜事青赤氣小而交於日下爲纓青赤氣小而員一二在日下左右者爲紐青赤氣如小半暈狀在日上爲負負者得地爲喜又曰青赤氣長而斜倚日旁爲戟青赤氣員而小在日左右爲珥黃白者有喜又曰有軍日有一珥爲喜在日西西軍戰勝在日東東軍戰勝南北亦如之無軍而珥爲拜將又日旁如半環向日爲

抱青赤氣如月初生背日者爲背又曰背氣青赤而曲外向爲叛象分爲反城
璫者如帶璫在日四方青赤氣長而立旁爲直日旁有一直敵在一旁欲自立
從直所擊者勝日旁有二直三抱欲自立者不成順抱擊者勝殺將氣形三角
在日四方爲提青赤氣橫在日上下爲格氣如半暈在日下爲承承者臣承君
也又曰日下有黃氣三重若抱名曰承福人主有吉喜且得地青白氣如履在
日下者爲履日旁抱五重戰順抱者勝日一抱一背爲破走抱者順氣也背者
逆氣也兩軍相當順抱擊逆者勝故曰破走日抱且兩珥一虹貫抱抱至日順
虹擊者勝殺將日抱兩珥且璫二虹貫抱抱至日順虹擊者勝日重抱內有璫順
抱擊者勝亦曰軍內有欲反者日重抱左右二珥有白虹貫抱順抱擊勝得二
將有三虹得三將日抱黃白潤澤內赤外青天子有喜有和親來降者軍不戰
敵降軍罷色青黃將喜赤將兵爭白將有喪黑將死日重抱且背順抱擊者勝
得地若有罷師日重抱抱內外有璫兩珥順抱擊者勝破軍軍中不和不相信
日旁有氣員而周匝內赤外青名爲暈日暈者軍營之象周環匝日無厚薄敵

與軍勢齊等若無軍在外天子失御民多叛日暈有五色有喜不得五色者有憂

凡占兩軍相當必謹審日月暈氣知其所起留止遠近應與不應疾遲大小厚薄長短抱背爲多少有無虛實久亟密疎澤枯相應等者勢等近勝遠疾勝遲大勝小厚勝薄長勝短抱勝背多勝少有勝無實勝虛久勝亟密勝疎澤勝枯重背大破重抱爲和親抱多親者益多背爲天下不和分離相去背於內者離於內背於外者離於外也

雜氣

天子氣內赤外黃四方所發之處當有王者若天子欲有遊往處其地亦先發此氣或如城門隱隱在氣霧中恆帶殺氣森森然或如華蓋在氣霧中或氣象青衣人無手在日西或如龍馬或雜色鬱鬱衝天者此皆帝王氣

猛將之氣如龍如猛獸或如火烟之狀或白如粉沸或如火光之狀夜照人或白而赤氣繞之或如山林竹木或紫黑如門上樓或上黑下赤狀似黑旌或如

張弩或如埃塵頭銳而卑本大而高此皆猛將之氣也氣發漸漸如雲變作山形將有深謀

凡軍勝之氣如堤如坂前後磨地或如火光將軍勇士卒猛或如山堤山上若林木將士驍勇或如埃塵粉沸其色黃白或如人持斧向敵或如蛇舉首向敵或氣如覆舟雲如牽牛或有雲如鬪雞赤白相隨在氣中或發黃氣皆將士精勇

凡氣上黃下白名曰善氣所臨之軍敵欲求和退

凡負氣如馬肝色或如死灰色或類偃蓋或類偃魚或黑氣如壞山墜軍上者名曰營頭之氣或如羣羊羣猪在氣中此衰氣也或如懸衣如人相隨或紛紛如轉蓬或如揚灰或雲如卷席如匹布亂穰者皆爲敗徵氣如繫牛如人臥如雙蛇如飛鳥如決隄垣如壞屋如驚鹿相逐如兩雞相向此皆爲敗軍之氣

凡降人氣如人十五五皆义手低頭又云如人义手相向或氣如黑山以黃爲緣者皆欲降伏之象也

凡堅城之上有黑雲如屋名曰軍精或白氣如旌旗或青雲黃雲臨城皆有大喜慶或氣青色如牛頭觸人或城上氣如煙火如雙蛇如杵形向外或有雲分爲兩彗狀者皆不可攻

凡屠城之氣或赤如飛鳥或赤氣如敗車或有赤黑氣如狸皮斑或城中氣聚如樓出見於外營上有雲如衆人頭赤色其城營皆可屠氣如雄雉臨城其下必有降者

凡伏兵有黑氣渾渾員長赤氣在其中或白氣粉沸起如樓狀或如幢節狀在烏雲中或如赤杵在烏雲中或如烏人在赤雲中

凡暴兵氣白如瓜蔓連結部隊相逐須臾罷而復出或白氣如仙人如仙人衣千萬連結部隊相逐罷而復興當有千里兵來或氣如人持刀楯雲如人色赤所臨城邑有卒兵至或赤氣如人持節兵來未息雲如方虹此皆有暴兵之象凡戰氣青白如膏如人無頭如死人臥如丹蛇赤氣隨之必大戰殺將四望無雲見赤氣如狗入營其下有流血

凡連陰十日晝不見日夜不見月亂風四起欲雨而無雨名曰蒙臣有謀霧氣若晝若夜其色青黃更相掩冒乍合乍散亦然視四方常有火雲五色具者其下賢人隱也青雲潤澤蔽日在西北爲舉賢良雲氣如亂穰大風將至視所從來雲甚潤而厚大雨必暴至四始之日有黑雲氣如陣厚大重者多雨氣若霧非霧衣冠不濡見則其城帶甲而趣日出沒時有霧雲橫截之白者喪烏者驚三日內雨者各解有雲如蛟龍所見處將軍失魄有雲如鶴尾來蔭國上三日亡有雲赤黃色四塞終日竟夜照地者大臣縱恣有雲如氣味而濁賢人去小人在位

凡白虹者百殃之本衆亂所基霧者衆邪之氣陰來冒陽凡白虹霧姦臣謀君擅權立威晝霧夜明臣志得申凡夜霧白虹見臣有憂晝霧白虹見君有憂虹頭尾至地流血之象

凡霧氣不順四時逆相交錯微風小雨爲陰陽氣亂之象積日不解晝夜昏闇天下欲分離

凡天地四方昏濛若下塵十日五日已上或一月或一時雨不沾衣而有土名曰霾故曰天地霾君臣乖

凡海旁振氣象樓臺廣野氣成宮闕北夷之氣如牛羊羣畜穹廬南夷之氣類舟船幡旗自華以南氣下黑上赤嵩高三河之郊氣正赤恆山之北氣青勃碣海岱之間氣皆正黑江淮之間氣皆白東海氣如員笠附漢河水氣如引布江漢氣勁如杼濟水氣如黑狫渭水氣如狼白尾淮南氣如白羊少室氣如白兔青尾恆山氣如黑牛青尾東夷氣如樹西夷氣如室屋南夷氣如閣臺或類舟船陣雲如立垣杼軸雲類軸搏兩端兌杓雲如繩居前巨天其半半天其螯者類闕旗故鉤雲句曲諸此雲見以五色占而澤搏密其見動人及有兵必起合鬪其直雲氣如三疋帛廣前銳後大軍行氣也韓雲如布趙雲如牛楚雲如日宋雲如車魯雲如馬衛雲如犬周雲如車輪秦雲如行人魏雲如鼠鄭雲如絳衣越雲如龍蜀雲如困車氣乍高乍下往往而聚騎氣卑而布卒氣搏前卑後高者疾前方而高後銳而卑者却其氣平者其行徐前高後卑者不止而返校

騎之氣正蒼黑長數百丈遊兵之氣如彗掃一云長數百丈無根本喜氣上黃下赤怒氣上下赤憂氣上下黑土功氣黃白徒氣白凡候氣之法氣初出時若雲非雲若霧非霧髣髴若可見初出森森然若桑榆上高五六尺者是千五百里外平視則千里舉目望卽五百里仰瞻中天卽百里內平望桑榆間二千里登高而望下屬地者三千里敵在東日出候之在南日中候之在西日入候之在北夜半候之軍上氣高勝下厚勝薄實勝虛長勝短澤勝枯氣見以知大占期內有大風雨久陰則災不成

天變史傳驗事

惠帝元康二年二月天西北大裂案劉向說天裂陽不足地動陰有餘是時人主昏瞽妃后專制

太安二年八月庚午天中裂爲二有聲如雷者三君道虧而臣下專僭之象也是日長沙王奉帝出距成都河間二王後成都河間東海又迭專威命是其應也

穆帝升平五年八月己卯夜天中裂廣三四丈有聲如雷野雉皆鳴是後哀帝荒疾海西失德皇太后臨朝太宗總萬幾桓温專權威振內外陰氣盛陽道微元帝太興二年八月戊戌天鳴東南有聲如風水相薄京房易妖占曰天有聲人主憂

三年十月壬辰天又鳴甲午止其後王敦入石頭王師敗績元帝屈辱制於強臣既而晏駕大恥不雪

安帝隆安五年閏月癸丑天東南鳴十六年九月戊子天東南又鳴是後桓玄篡位安帝播越憂莫大焉鳴每東南者蓋中興江外天隨之而鳴也

義熙元年八月天鳴在東南京房易傳曰萬姓勞厥妖天鳴是時安帝雖反政而兵革歲動衆庶勤勞也

日蝕

魏文帝黃初二年六月戊辰晦日有蝕之有司奏免太尉詔曰災異之作以譴元首而歸過股肱豈禹湯罪己之義乎其令百官各虔厥職後有天地眚勿復

劾三公

三年正月景寅朔日有蝕之十一月庚申晦又日有蝕之

五年十一月戊申晦日有蝕之

明帝太和初太史令許芝奏曰應蝕與太尉於靈星祈禳帝曰蓋聞人主政有不德則天懼之以災異所以譴告告使得自修也故日月薄蝕明治道有不當者朕卽位以來旣不能光明先帝聖德而施化有不合於皇神故上天有以寤之宜勅政自修有以報於神明天之於人猶父之於子未有父欲有責其子而可獻盛饌以求免也今外欲遣上公與太史令俱禳之於義未聞也羣公卿士大夫其各勉修厥職有可以補朕不逮者各封上之

太和五年十一月戊戌晦日有蝕之

六年正月戊辰朔日有蝕之見吳歷

青龍元年閏月庚寅朔日有蝕之

少帝正始元年七月戊申朔日有蝕之

三年四月戊戌朔日有蝕之

四年五月丁丑朔日有蝕之

五年四月景辰朔日有蝕之

六年四月壬子朔日有蝕之 十月戊申朔又日有蝕之

八年二月庚午朔日有蝕之是時曹爽專政丁謚鄧颺等轉改法度會有日蝕

之變詔羣臣問得失蔣濟上疏曰昔大舜佐治戒在比周周公輔政慎於其朋

齊侯問災晏子對以布惠魯君問異臧孫答以緩役塞變應天乃實人事濟旨

譬甚切而君臣不悟終至敗亡

九年正月乙未朔日有蝕之

嘉平元年二月己未日有蝕之

高貴鄉公甘露四年七月戊子朔日有蝕之

五年正月乙酉朔日有蝕之京房易占曰日蝕乙酉君弱臣強司馬將兵反征

其王五月有成濟之變

元帝景元二年五月丁未朔日有蝕之

三年十一月己亥朔日有蝕之

武帝泰始二年七月景午晦日有蝕之 十月景午朔日有蝕之

七年十月丁丑朔日有蝕之

八年十月辛未朔日有蝕之

九年四月戊辰朔日有蝕之 又七月丁酉朔日有蝕之

十年正月乙未三月癸亥並日有蝕之

咸寧元年七月甲申晦日有蝕之 十一月景帝詔 十二月壬

三年正月景子朔日有蝕之

四年正月庚午朔日有蝕之

太康四年三月辛丑朔日有蝕之 十二月景皇太子薨 歲入葬 錄之

七年正月甲寅朔日有蝕之

八年正月戊申朔日有蝕之

九年正月壬申朔六月庚子朔並日有蝕之

永熙元年四月庚申帝崩

惠帝永康九年十一月甲子朔日有蝕之十二月廢皇太子適爲庶人尋殺之

永康元年正月己卯四月辛卯朔並日有蝕之

永寧元年閏月景戌朔日有蝕之

光熙元年正月戊子朔七月乙酉朔並日有蝕之十一月惠帝崩 十二月壬午朔又日有蝕之

懷帝永嘉元年十一月戊申朔日有蝕之

二年正月景子朔日有蝕之

六年二月壬子朔日有蝕之

愍帝建興四年六月丁巳朔十二月甲申朔並日有蝕之

五年五月景子十一月景子並日有蝕之時帝蒙塵于平陽

元帝大興元年四月丁丑朔日有蝕之

明帝太寧三年十一月癸巳朔日有蝕之在卯至斗斗吳分也其後蘇峻作亂成帝咸和二年五月甲申朔日有蝕之在井井主酒食女主象也明年皇太后以憂崩

六年三月壬戌朔日有蝕之是時帝已年長每幸司徒第猶出入見王導夫人曹氏如子弟之禮以人君而敬人臣之妻有虧君德之象也

九年十月乙未朔日有蝕之是時帝既冠當親萬幾而委政大臣者君道有虧也

咸康元年十月乙未朔日有蝕之

七年二月甲子朔日有蝕之三月杜皇后崩

八年正月乙未朔日有蝕之京都大雨郡國以聞是謂三朝王者惡之六月而帝崩

穆帝永和二年四月己酉七年正月丁酉八年正月辛卯並日有蝕之十二年十月癸巳朔日有蝕之在尾尾燕分北狄之象也是時邊表姚襄苻生

互相吞噬朝廷憂勞征伐不止

升平四年八月辛丑朔日有蝕之幾既在角凡蝕淺者禍淺深者禍大角為天門人主惡之明年而帝崩

哀帝隆和元年三月甲寅朔十二月戊午朔並日有蝕之明年而帝有疾不識萬幾

海西公太和三年三月丁巳朔五年七月癸酉朔並日有蝕之皆海西被廢之應也

孝武帝寧康三年十月癸酉朔日有蝕之

太元四年閏月己酉朔日有蝕之是時苻堅攻沒襄陽執朱序

六年六月庚子朔日有蝕之

九年十月辛亥朔日有蝕之

十七年五月丁卯朔日有蝕之

二十年三月庚辰朔日有蝕之明年帝崩

安帝隆安四年六月庚辰朔日有蝕之是時元顯執政

元興二年四月癸巳朔日有蝕之其冬桓玄篡位

義熙三年七月戊戌朔日有蝕之

十年九月丁巳朔日有蝕之

十一年七月辛亥晦日有蝕之

十三年正月甲戌朔日有蝕之明年帝崩

恭帝元熙元年十一月丁亥朔日有蝕之自義熙元年至是日蝕日從上始皆

爲革命之徵

周禮眡祲氏掌十輝之法以觀妖祥辯吉凶有稷象鑄監閭菅彌序隋想凡十

後代名變說者莫同今錄其著應以次之云

吳孫權赤烏十一年二月白虹貫日權發詔戒懼

武帝泰始五年七月甲寅日暈再重白虹貫之

太康元年正月己丑朔五色氣冠日自卯至酉占曰君道失明丑爲斗牛主吳

越是時孫皓淫暴四月降

惠帝元康元年十一月甲申日暈再重青赤有光

九年正月日中有若飛燕者數日乃消王隱以為愍懷廢死之徵

永康元年正月癸亥朔日暈三重十月乙未日闇黃霧四塞占曰不及三年下

有拔城大戰十二月庚戌日中有黑氣京房易傳曰祭天不順茲謂逆厥異日

中有黑氣

永寧元年九月甲申日中有黑子京房易占黑者陰也臣不掩君惡令下見百

姓惡君則有此變又曰臣有蔽主明者

太安元年十一月日中有黑氣

永興元年十一月日中有黑氣分日

光熙元年五月壬辰癸巳日光四散赤如血流照地皆赤甲午又如之占曰君

道失明

懷帝永嘉元年十一月乙亥黃黑氣掩日所照皆黃案河圖占曰日薄也其說

曰凡日蝕皆於朔晦有不於晦朔者爲日薄雖非日月同宿時陰氣盛掩日光也占類曰蝕

二年正月戊申白虹貫日二月癸卯白虹貫日青黃暈五重占曰白虹貫日近臣爲亂不則諸侯有反者暈五重有國者受其祥天下有兵破亡其地明年司馬越暴蔑人主五年劉聰破京都帝蒙塵于寇庭

五年三月庚申日散光如血下流所照皆赤日中有若飛燕者

愍帝建興二年正月辛未庚時日隕于地又有三日相承出於西方而東行五年正月庚子三日並照虹蜺彌天日有重暈左右兩珥占曰白虹兵氣也三四五六日俱出並爭天下兵作丁巳亦如其數又曰三日並出不過三旬諸侯爭爲帝日重暈天下有立王暈而珥天下有立侯故陳卓曰當有大慶天下其三分乎三月而江東改元爲建武劉聰李雄亦跨曹劉疆宇於是兵連累葉元帝太興元年十一月乙卯日夜出高三丈中有赤青珥

四年二月癸亥日鬪三月癸未日中有黑子辛亥帝親錄訊囚徒

永昌元年十月辛卯日中有黑子時帝寵幸劉隗擅威福虧傷君道王敦因之舉兵逼京都禍及忠賢

明帝太寧元年正月己卯朔日暈無光癸巳黃霧四塞占曰君道失明陰陽昏臣有陰謀京房曰下專刑茲謂分威蒙微而日不明先是王敦害尚書令刁協僕射周顓驃騎將軍戴若思等是專刑之應敦既陵上卒伏其辜十一月景子白虹貫日史官不見桂陽太守華包以聞

成帝咸和九年七月白虹貫日

咸康元年七月白虹貫日

二年七月白虹貫日自後庾氏專政由后族而貴蓋亦婦人擅國之義故頻年白虹貫日

八年正月壬申日中有黑子景子乃滅夏帝崩

穆帝永和八年張重華在涼州日暴赤如火中有三足鳥形見分明五日乃止十年十月庚辰日中有黑子大如雞卵

十一年三月戊申日中有黑子大如桃二枚時天子幼弱久不親國政
升平三年十月景午日中有黑子大如雞卵少時而帝崩
海西公太和三年九月戊辰夜二虹見東方

四年四月戊辰日暈厚密白虹貫日中
十月乙未日中有黑子
五年二月辛酉日中有黑子大如李

六年三月辛未白虹貫日日暈五重十一月桓溫廢帝即簡文咸安元年也

簡文咸安二年十一月丁丑日中有黑子

孝武寧康元年十一月己酉日中有黑子大如李

三年三月庚寅日中有黑子二枚大如鴨卵十一月己巳日中有黑子大如雞
卵時帝已長而康獻皇后以從嫂臨朝實傷君道故日有瑕也

太元十三年二月庚子日中有黑子二大如李

十四年六月辛卯日中又有黑子大如李

二十年十一月辛卯日中又有黑子是時會稽王以母弟于政

安帝隆安元年十二月壬辰日暈有背璫是後不親萬幾會稽王世子元顯專行威罰

四年十一月辛亥日中有黑子

元興元年二月甲子日暈白虹貫日中三月庚子白虹貫日未幾桓玄剋京都

王師敗績明年玄篡位

義熙元年五月庚午日有彩珥

六年五月景子日暈有璫時有盧循逼京都內外戒嚴七月循走

七年七月五虹見東方占曰天子黜其後劉裕代晉

十年日在東并有白虹十餘丈在南干日災在秦分秦亡之象

恭帝元熙二年正月壬辰白氣貫日東西有直珥各一丈白氣貫之交匝

月變

魏文帝黃初四年十一月月暈北斗占曰有大喪赦天下七年五月帝崩明帝

卽位大赦天下

孝懷帝永嘉五年三月壬申丙夜月蝕既丁夜又蝕既占曰月蝕盡大人憂又曰其國貴人死

海西公太和四年閏月乙亥月暈軫復有白暈貫月北暈斗柄三星占曰王者惡之六年桓溫廢帝

安帝隆安五年三月甲子月生齒占曰月生齒天子有賊臣羣下自相殘桓玄篡逆之徵也

義熙九年十二月辛卯朔月猶見東方是謂之仄匿則侯王其肅是時劉裕輔政威刑自己仄匿之應云

十一年十一月乙未月入輿鬼見而暈占曰主憂財寶出一日月暈有赦月奄犯五緯

凡月蝕五星其國皆亡五星入月其野有逐相

魏明帝太和五年十二月甲辰月犯填星

青龍二年十月乙丑月又犯填星占同上戊寅月犯太白占曰人君死又爲兵景初元年七月公孫懿叛二年正月遣宣帝討之三年正月天子崩

四年三月己巳太白與月俱加景晝見月犯太白占同上

景初元年十月丁未月犯熒惑占曰貴人死二年四月司徒韓暨薨

齊王嘉平元年正月甲午太白襲月宣帝奏永寧太后廢曹爽等

惠帝太安二年十一月庚辰歲星入月中占曰國有逐相十二月壬寅太白犯月占曰天下有兵

三年正月己卯月犯太白占同青龍元年七月左衛將軍陳珍等率衆奉帝伐成都王六軍敗績兵逼乘輿後二年帝崩

元帝太興二年十一月辛巳月犯熒惑占曰有亂臣

三年十二月己未太白入月在斗郭璞曰月屬坎陰府法象也太白金行而來犯之天意若曰刑理失中自毀其法

四年十二月丁亥月犯歲星在房占曰其國兵饑人流亡

永昌元年三月王敦作亂率江荆之衆來攻敗京師殺將相又鎮北將軍劉隗

卓
出奔百姓並去南畝困於兵革四月又殺湘州刺史譙王司馬承鎮南將軍甘

成帝咸康元年二月乙未太白入月四月甲午月犯太白

四年四月己巳七月乙巳月俱奄太白占曰人君死又爲兵人主惡之明年石季龍之衆大寇沔南於是內外戒嚴

五年四月辛未月犯歲星在胃占曰國饑人流乙未月犯歲星在昴及冬有沔南邾城之敗百姓流亡萬餘家

六年二月乙未太白入月占曰人主死四月甲午月犯太白占曰人主惡之穆帝永和八年十二月月在東井犯歲星占曰秦饑人流亡是時兵革連起

十年十一月月奄填星在輿鬼占曰秦有兵時桓温伐苻健健墜壁長安温退十二年八月桓温破姚襄

升平元年十一月壬午月奄歲星在房占曰人飢一曰豫州有災

二年閏三月乙亥月犯歲星在房占同上三年豫州刺史謝萬敗

三年三月乙酉月犯太白在昴占曰人君死一曰趙地有兵四年正月慕容雋卒

五年正月乙丑辰時月在危宿奄太白占曰天下靡散三月丁未月犯填星在軫占曰爲大喪五月穆帝崩七月慕容恪攻冀州刺史呂護於野王拔之護奔走時桓温以大衆次宛聞護敗乃退

哀帝興寧元年十月景戌月奄太白在須女占曰天下靡散一曰災在揚州三年洛陽沒其後桓温傾揚州資實北討敗績死亡大半及征袁真淮南殘破後慕容暉及苻堅互來侵境

二年正月乙卯月奄歲星在參占曰參益州分也六月鎮西將軍益州刺史周撫卒十月梁州刺史司馬勳入益州以叛朱序率衆助刺史周楚討平之
海西太和元年二月景子月奄熒惑在參占曰爲內亂帝不終之徵一曰參魏地五年慕容暉爲苻堅所滅

孝武太元十二年二月戊寅熒惑入月占曰有亂臣死若有相戮者一曰女親

爲政天下亂是時琅邪王輔政王妃從兄王國寶以姻昵受寵又陳郡人袁悅昧私苟進交遘主相扇揚朋黨十三年帝殺悅於市於是主相有隙亂階興矣十三年十一月戊子辰星入月在危占曰賊臣欲殺主不出三年必有內惡是後慕容垂翟遼姚萇苻登慕容永並阻兵爭強

十四年十二月乙未月犯歲星占並同上十五年翟遼據司兗衆軍累討弗剋慕容氏又跨略并冀七月旱八月諸郡大水兗州又蝗

十八年正月乙酉熒惑入月占曰憂在宮中非賊乃盜也一曰有亂臣若有戮者二十一年九月帝暴崩內殿北庶宣言夫人張氏潛行大逆又王國寶邪狡卒伏其辜

十九年四月己巳月奄歲星在尾占曰爲饑燕國亡二十年慕容垂遣息寶伐魏反爲所破死者數萬人二十一年垂死國遂衰亡

安帝隆安元年六月庚午月奄太白在太微端門外占曰國受兵乙酉月奄歲星在東壁占曰爲饑衛地有兵二年六月郟恢遣鄧啓方等以萬人伐慕容寶

於滑臺啓方敗三年九月桓玄等並舉兵於是內外戒嚴

四年正月乙亥月犯填星在牽牛占曰吳越有兵喪女主憂六月乙未月又犯填星在牽牛十月乙未月奄歲星在北海占曰爲饑胡有兵其四年五月孫恩破會稽殺內史謝琰後又破高雅之於餘姚死者十七八七月太和太后李氏崩元興元年孫恩寇臨海人衆餓死散亡殆盡

元興元年四月辛丑月奄辰星七月大饑人相食

二年十一月辛巳月犯熒惑占悉同上二年十二月桓玄篡位放遷帝后於尋陽以永安何皇后爲零陵君三年二月劉裕盡誅桓氏

三年二月甲辰月奄歲星於左角占曰天下兵起是年三月景辰劉裕起義兵殺桓修等明年正月衆軍攻桓振卒滅諸桓

義熙元年四月己卯月犯填星在東壁占曰其地亡國一曰貴人死七月己未月奄填星東壁占曰其國以伐亡一曰人流十月丁巳月奄填星在營室占同上十一月荊州刺史魏詠之卒二年二月司馬國璠等攻沒弋陽三年司徒揚

州刺史王謐薨四年正月太保武陵王遵薨三月左僕射孔安國薨
二年十二月景午月奄太白在危占曰齊亡國一曰疆國君死五年四月劉裕
大軍北討慕容超卒滅之
七年六月庚子月犯歲星在畢占曰有邊兵且饑八月乙未月犯歲星在參占
曰益州兵飢七月朱齡石剋蜀蜀人尋反又討之
八年正月庚戌月犯歲星在畢占同上九年七月朱齡石滅蜀
十二年五月甲申月犯歲星在左角占曰爲饑
十四年四月壬申月犯填星於張占曰天下有大喪其明年帝崩
恭帝元熙元年七月月犯歲星占悉同上十二月丁巳月犯太白于羽林二年
六月帝遜位禪宋

五星聚舍

魏明帝太和四年十一月壬戌太白犯歲星占曰太白犯五星有大兵五年三
月諸葛亮以大衆寇天水時宣帝爲大將軍距退之

青龍二年二月己未太白犯熒惑占曰大兵起有大戰是年四月諸葛亮據渭南吳亦起兵應之魏東西奔命

惠帝元康三年填星歲星太白三星聚于畢昴占曰爲兵喪畢昴趙地也後賈后陷殺太子趙王廢后又殺之斬張華裴頴遂篡位廢帝爲太上皇天下從此
遘亂連禍

永寧二年十一月熒惑太白鬪于虛危占曰大兵起破軍殺將虛危又齊分也
十二月熒惑襲太白于營室占曰天下兵起亡君之戒一曰易相初齊王罔之
京都因留輔政遂專傲無君是月成都河間檄長沙王又討之罔又交戰攻焚
宮闕罔兵敗夷滅又殺其兄上軍將軍實以下二十餘人太安二年成都又攻
長沙於是公私饑困百姓力屈

太安三年正月熒惑犯歲星占曰有戰七月左衛將軍陳軫奉帝伐成都六軍
敗績

光熙元年九月填星犯歲星占曰填與歲合爲內亂是時司馬越專權終以無

禮破滅內亂之應也十二月癸未太白犯填星占曰爲內兵有大戰是後河間王爲東海王越所殺明年正月東海王越殺諸葛玫等五月汲桑破馮嵩殺東燕王八月苟晞大破汲桑

懷帝永嘉六年七月熒惑歲星太白聚牛女之間徘徊進退案占曰牛女揚州分是後兩都傾覆而元帝中興揚土

建武元年五月癸未太白熒惑合於東井占曰金火合曰爍爲喪是時愍帝蒙塵于平陽七月崩于寇庭

元帝太興二年七月甲午歲星熒惑會于東井八月乙未太白犯歲星合在翼占曰爲兵饑

三年六月景辰太白與歲星合于房占同上永昌元年王敦攻京師六軍敗績王敦尋死

成帝咸康三年十一月乙丑太白犯歲星于營室占曰爲兵饑四年二月石季龍破幽州遷萬餘家以南五年季龍衆五萬寇沔南略七千餘家而去又騎二

萬圍陷邾城殺略五千餘人

四年十二月癸丑太白犯填星在箕占曰王者亡地七年慕容皝自稱燕王

七年三月太白熒惑合于太微中犯左執法明年顯宗崩

八年十二月己酉太白犯熒惑于胃占曰大兵起其後庾翼大發兵謀伐石季

龍專制上流

康帝建元元年八月丁未太白犯歲星在軫占曰有大兵是年石季龍將劉寧

寇沒狄道

穆帝永和四年五月熒惑入婁犯填星占曰兵大起有喪災在趙其年石季龍

死來年冉閔殺石遵及諸胡十萬餘人其後褚裒北伐喪衆而薨

六年三月戊戌熒惑犯歲星占曰爲戰

七年三月戊子歲星熒惑合于奎其年劉顯殺石祗及諸胡帥中土大亂

十二年七月丁卯太白犯填星在柳占曰周地有大兵其年八月桓温伐苻健

退因破姚襄於伊水定周地

升平二年八月戊午熒惑犯填星在張占曰兵大起

三年八月庚午太白犯填星在太微中占曰王者惡之

五年十月丁卯熒惑犯歲星在營室占曰大臣有匿謀一曰衛地有兵時桓温擅權謀移晉室

海西公太和元年八月戊午太白犯歲星在太微中

三年六月甲寅太白奄熒惑在太微端門中六年海西公廢

簡文咸安二年正月己酉歲星犯填星在須女占曰爲內亂七月帝崩桓温擅權謀殺中侍王坦之等內亂之應

孝武寧康二年十一月癸酉太白奄熒惑在營室占曰金火合爲爍爲兵喪太元元年七月苻堅伐涼州破之虜張天錫

太元十一年十二月己丑太白犯歲星占曰爲兵饑是時河朔未平兵連在外冬大饑

十七年九月丁丑歲星熒惑填星同在亢氏十二月癸酉填星去熒惑歲星猶

合占曰三星合是謂驚立絕行內外有兵喪與饑改立王公

十九年十月太白填星熒惑辰星合于氏十二月癸丑太白犯歲星在斗占曰爲亂饑爲內兵斗吳越分至隆安元年王恭等舉兵顯王國寶之罪朝廷殺之是後連歲水旱饑

安帝隆安元年二月歲星熒惑皆入羽林占曰中軍兵起四月王恭等舉兵內外戒嚴

元興元年八月庚子太白犯歲星在上將東南占曰楚兵饑一曰災在上將二年桓玄篡位三年劉裕盡誅桓氏

二年十月丁丑太白犯填星在婁占同上

三年二月壬辰太白熒惑合于羽林二年十二月桓玄篡位放遷帝后三年二月劉裕起義兵桓玄逼帝東下

義熙二年十二月丁未熒惑太白皆入羽林又合于壁

三年正月慕容超寇淮北徐州至下邳八月遣劉敬宣伐蜀

三年二月癸亥熒惑填星太白辰星聚于奎婁從填星也徐州分是時慕容超僭號於齊兵連徐兗連歲寇抄至于淮泗姚興譙縱僭號秦蜀盧循及魏南北交侵其五年劉裕北殄慕容超其六月辛卯熒惑犯辰星在翼占曰天下兵起八月己卯太白奄熒惑占曰有大兵其四年姚略遣衆征赫連勃勃大爲所破五年四月甲戌熒惑犯辰星在東井占曰皆爲兵十二月辛丑太白犯歲星在奎占曰大兵起魯有兵是年四月劉裕討慕容超六年二月滅慕容超于魯地七年七月丁卯歲星犯填星在參占曰歲填合爲內亂一曰益州戰不勝亡地是時朱齡石伐蜀後竟滅之明年誅謝混劉毅

八年十月甲申太白犯填星在東井占曰秦有大兵

九年二月景午熒惑填星皆犯東井占曰秦有兵三月壬辰歲星熒惑填星太白聚于東井從歲星也東井秦分十三年劉裕定關中其後遂移晉祚

十四年十月癸巳熒惑入太微犯西蕃上將仍順行至左掖門內留二十日乃逆行至恭帝元熙元年三月五日出西蕃上將西三尺許又順還入太微時填

星在太微熒惑繞填星成鉤已其年四月景戌從端門出占曰熒惑與填星鉤已天庭天下更紀十二月安帝母弟琅邪王踐阼是曰恭帝來年禪于宋

晉書卷十二

長編未備子治星宿黃道文昭平於滿星隱隱

少辛子民下喉爨星外華星春寒古曰靈麻合意肉廣一曰益附輝不燥土味

奎古曰大氣味魯育其長辛四民優俗持慕容疏六辛二月熒慕容疏干魯疏

五辛四民甲寅熒惑流氣星春東共古曰皆益吳十二月辛壬太白照氣星春

八民曰喉太白奎熒古曰前大其四辛批神靈紫瑤輝靈佛佛大益丙如

交對其五辛隆俗止氣慕容疏其六月辛喉熒惑流氣星古曰天不其疏

辭禮效實共輕分京輕熒惑也至二卦凶與麟熒熒樂備靈節又麟南性

三辛二月益熒熒星太白氣星庚午辛其熒星甲寅批公長知慕容疏

晉書卷十二考證

天文志中十一曰天讒○史記天官書作天攙其正義解釋大略亦同下文引

河圖作天攙引風角書作天龜

日夜出高三丈中有赤青珥○臣永祚按珥不應在中疑中為衍字

熒惑填星太白辰星聚于奎婁從填星也徐州分○臣龍官按汲古閣本也作

北又徐州分上當有奎婁二字

晉書卷十二考證

晉書卷十二卷

世又特限食土皆有嘉其二字

後漢書卷六十四卷
○日籍官 賜與古開本

日寄出高三文中皆表青華○日悉得 或理不懸奇中或中或於字

祇圖新天際得 或讀書新天際

天女志中十一曰天際○或讀天官書者天壽其玉并欲購大學小民不文

晉書卷十二卷

晉書卷十三

唐太宗文武皇帝御撰

志第三

天文下 月五星犯列舍 經星變附見 妖星客星 星流隕 雲氣

月五星犯列舍 經星變附見

魏文黃初四年三月癸卯月犯心大星占曰心為天王位王者惡之六月甲申太白晝見案劉向五紀論曰太白少陰弱不得專行故以己未為界不得經天而行經天則晝見其占為兵喪為不臣為更王疆國弱小國疆是時孫權受魏爵號而稱兵距守其十二月景子月犯心大星占同上

五年十月乙卯太白晝見占同上又歲星入太微逆行積百四十九日乃出占曰五星入太微從右入三十日以上人主有大憂一曰有赦至七年五月帝崩明帝即位大赦天下

六年五月壬戌熒惑入太微至壬申與歲星相及俱犯右執法至癸酉乃出占

曰從右入三十日以上人主有大憂又日月五星犯左右執法大臣有憂一曰
執法者誅金火尤甚十一月皇子東武陽王鑒薨七年正月驃騎將軍曹洪免
爲庶人四月征南大將軍夏侯薨五月帝崩蜀記稱明帝問黃權曰天下鼎
立何地爲正對曰當驗天文往者熒惑守心而文帝崩吳蜀無事此其徵也案
三國史並無熒惑守心之文疑是入太微八月吳遂圍江夏寇襄陽大將軍宣
帝救襄陽斬吳將張霸等兵喪更王之應也

明帝太和五年五月熒惑犯房占曰房四星股肱臣將相位也月五星犯守之
將相有憂其七月車騎將軍張郃追諸葛亮爲亮所害十二月太尉華歆薨其
十一月乙酉月犯軒轅大星占曰女主憂

六年三月乙亥月又犯軒轅大星十一月景寅太白晝見南斗遂歷八十餘日
恆見占曰吳有兵明年孫權遣張彌等將兵萬人錫授公孫文懿爲燕王文懿
斬彌等虜其衆青龍二年正月太后郭氏崩

青龍三年三月辛卯月犯輿鬼輿鬼主斬殺占曰人多病國有憂又曰大臣憂

是年夏及冬大疫四年五月司徒董昭薨其五月丁亥太白晝見積三十餘日以晷度推之非秦魏則楚也是時諸葛亮據渭南宣帝與相持孫權寇合肥又遣陸議孫昭等入淮沔天子親東征蜀本秦地則爲秦魏及楚兵悉起矣其七月己巳月犯鍵閉占曰有火災三年七月崇華殿災三年六月丁未填星犯井鉞戊戌太白又犯之占曰凡月五星犯井鉞悉爲兵災一曰斧鉞用大臣誅七月己丑填星犯東井距星占曰填星入井大人憂行近距爲行陰其占曰大水五穀不成景初元年夏大水傷五穀其年十月壬申太白晝見在尾歷二百餘日恆晝見占曰尾爲燕有兵十二月戊辰月犯鉤鈐占曰王者憂四年閏正月己巳填星犯井鉞三月癸卯填星犯東井己巳太白與月加景晝見五月壬寅太白犯畢左股第一星占曰畢爲邊兵又主刑罰九月涼州塞外胡阿畢師使侵犯諸國西域校尉張就討之斬首捕虜萬計其年七月甲寅太白犯軒轅大星占曰女主憂景初元年皇后毛氏崩

景初元年二月乙酉月犯房第二星占曰將軍有憂其七月司徒陳矯薨二年

四月司徒韓暨薨其七月辛卯太白晝見積二百八十餘日時公孫文懿自立爲燕王署置百官發兵拒守宣帝討滅之

二年二月己丑月犯心距星又犯中央大星五月乙亥月又犯心距星及中央大星案占曰王者惡之犯前星太子有憂三年正月帝崩太子立卒見廢其年十月甲午月犯箕占曰將軍死正始元年四月車騎將軍黃權薨其閏十一月癸丑月犯心中央大星

少帝正始元年四月戊午月犯昴東頭第一星十月庚寅月又犯昴北第四星占曰月犯昴胡不安二年六月鮮卑阿妙兒等寇西方燉煌太守王延破之斬二萬餘級三年又斬鮮卑大帥及千餘級

二年九月癸酉月犯輿鬼西北星三年二月丁未又犯西南星占曰有錢令一曰大臣憂三年二月太尉滿寵薨四年正月帝加元服賜羣臣錢各有差四年十月十一月再犯井鉞是月宣帝討諸葛恪恪棄城走五年二月曹爽

征蜀

五年十一月癸巳填星犯亢距星占曰諸侯有失國者

七年七月丁丑月犯左角占曰天下有兵左將軍死七月乙亥熒惑犯畢距星

占曰有邊兵一曰刑罰用

九年正月辛亥月犯亢南星占曰兵起一曰軍將死七月癸丑填犯樞閉占曰

王者不宜出宮下殿嘉平元年天子謁陵宣帝奏誅曹爽等天子野宿於是失

勢

嘉平元年六月壬戌太白犯東井距星占曰國失政大臣為亂四月辛巳太白

犯輿鬼占曰人臣誅一曰兵起二年三月己未太白又犯井距星三年七月王

凌與楚王彪有謀皆伏誅人主遂卑

吳孫權赤烏十三年夏五月日北至熒惑逆行入南斗秋七月犯魁第三星而

東漢晉春秋云逆行案占熒惑入南斗三月吳王死一曰熒惑逆行其地有死

君太和二年權薨是其應也故國志書於吳是時王凌謀立楚王彪謂斗中有

星當有暴貴者以問知星人浩詳詳疑有故欲悅其意不言吳有死喪而言淮

南楚分吳楚同占當有王者興故凌計遂定

嘉平二年十二月景申月犯輿鬼

三年四月戊寅月犯東井五月甲寅月犯亢距星占曰將軍死一曰爲兵是月
王凌楚王彪等誅七月皇后甄氏崩四年三月吳將爲寇鎮東將軍諸葛誕破
走之其年七月己巳月犯輿鬼九月乙巳又犯之十月癸未熒惑犯亢南星占
曰臣有亂四年十一月丁未月又犯鬼積尸五年六月戊午太白犯角占曰羣
臣有謀不成庚辰月犯箕星占曰將軍死七月月犯井鉞景午月又犯鬼西北
星占曰國有憂十一月癸酉月犯東井距星占曰將軍死正元元年正月鎮東
將軍毋丘儉揚州刺史文欽反兵俱敗誅死二月李豐及弟翼后父張緝等謀
亂事泄悉誅皇后張氏廢九月帝廢爲齊王蜀將姜維攻隴西車騎將軍郭淮
討破之

高貴鄉公正元二年二月戊午熒惑犯東井北轅西頭第一星甘露元年七月
乙卯熒惑犯東井鉞星壬戌月又犯鉞星八月辛亥月犯箕吳廢孫亮

太平元年九月壬辰太白犯南斗吳志所書也占曰太白犯斗國有兵大臣有反者其明年諸葛誕反又明年孫綝廢亮吳魏並有兵事也

甘露元年九月丁巳月犯東井二年六月己酉月犯心中央大星八月壬子歲星犯井鉞九月庚寅歲星逆行乘井鉞十月景寅太白犯亢距星占曰逆臣爲亂人君憂景元元年五月有成濟之變及諸葛誕誅皆其應也

二年三月庚子太白犯東井占曰國失政大臣爲亂是夜歲星又犯東井占曰兵起至景元元年高貴鄉公敗

三年八月壬辰歲星犯輿鬼鑽星占曰斧鑽用大臣誅

四年四月甲申歲星又犯輿鬼東南星占曰鬼東南星主兵木入鬼大臣誅景元元年殺尙書王經

元帝景元元年二月月犯建星案占月五星犯建星大臣相譖是後鍾會鄧艾破蜀會譖艾

二年四月熒惑入太微犯右執法占曰人主有大憂一云大臣憂

四年十月歲星守房占曰將相憂一云有大赦明年鄧艾鍾會皆夷滅赦蜀土
五年帝遜位

武帝咸寧四年九月太白當見不見占曰是謂失舍不有破軍必有亡國是時
羊祜表求伐吳上許之五年十一月兵出太白始夕見西方太康元年三月大
破吳軍孫皓面縛請罪吳國遂亡

太康八年三月熒惑守心占曰王者惡之太熙元年四月乙酉帝崩

惠帝元康三年四月熒惑守太微六十日占曰諸侯三公謀其上必有斬臣一
曰天子亡國是春太白守畢至是百餘日占曰有急令之憂一曰相死又爲邊
境不安後賈后陷殺太子

六年十月乙未太白晝見九年六月熒惑守心占曰王者惡之八月熒惑入羽
林占曰禁兵大起其後帝見廢爲太上皇俄而三王起兵討趙王倫倫悉遣中
軍兵相距累月

永康元年三月中台星拆太白晝見占曰台星失常三公憂太白晝見爲不臣

是月賈后殺太子趙王倫尋廢殺后斬司空張華其五月熒惑入南斗占曰宰相死兵大起斗又吳分野是時趙王倫爲相明年篡位三公與師誅之太安二年石冰破揚州其八月熒惑入箕占曰人主失位兵起明年趙王倫篡位改元二年二月太白出西方逆行入東井占曰國失政大臣爲亂是時齊王冏起兵討趙王倫倫滅冏擁兵不朝專權淫奢明年誅死

永寧元年自正月至於閏月五星互經天縱橫無常星傳曰日陽君道也星陰臣道也日出則星亡臣不得專也晝而星見于上者爲經天其占爲不臣爲更王今五星悉經天天變所未有也石氏說曰辰星晝見其國不亡則大亂是後台鼎方伯互執大權二帝流亡遂至六夷更王迭據華夏亦載籍所未有也其四月歲星晝見五月太白晝見占同前七月歲星守虛危占曰木守虛危有兵憂虛危齊分一曰守虛饑守危徭役煩多下屈竭辰星入太微占曰爲內亂一曰羣臣相殺太白守右掖門占曰爲兵爲亂爲賊八月戊午填星犯左執法又犯上相占曰上相憂熒惑守昴占曰趙魏有災辰星守輿鬼占曰秦有災九月

丁未月犯左角占曰人主憂一曰左衛將軍死天下有兵

二年四月癸酉歲星晝見占曰爲臣彊初齊王罔定京都因留輔政遂專傲無君是月成都河間檄長沙王乂討之罔乂交戰攻焚宮闕罔兵敗夷滅乂殺其兄上軍將軍寔以下二十餘人太安二年成都攻長沙於是公私饑困百姓力屈

太安二年二月太白入昴占曰天下擾兵大起七月熒惑入東井占曰兵起國亂是秋太白守太微上將占曰上將以兵亡是年冬成都河間攻洛陽八月長沙王奉帝出距二王三年正月東海王越執長沙王乂張方又殺之

三年正月熒惑入南斗占同永康七月左衛將軍陳軫率衆奉帝伐成都六軍敗績兵偪乘輿是時天下盜賊羣起張昌尤盛

永興元年七月庚申太白犯角亢經房心歷尾箕九月入南斗占曰犯角天下大戰犯亢有大兵人君憂入房心爲兵喪犯尾箕女主憂一曰天下大亂入南斗有兵喪一曰將軍爲亂其所犯守又克豫幽冀揚州之分野是年七月有蕩

陰之役九月王浚殺幽州刺史和演攻鄴鄴潰於是兗豫爲天下兵衝陳敏又亂揚土劉元海石勒李雄等並起微賤跨有州郡皇后羊氏數被幽廢皆其應也

二年四月景子太白犯狼星占曰大兵起九月歲星守東井占曰有兵井又秦分野是年荀晞破公師蕃張方破范陽王虓關西諸將攻河間王顥奔走東海王迎殺之

光熙元年四月太白失行自翼入尾箕占曰太白失行而北是謂反生不有破軍必有屠城五月汲桑攻鄴魏郡太守馮嵩出戰大敗桑遂害東燕王騰殺萬餘人焚燒魏時宮室皆盡其九月丁未熒惑守心占曰王者惡之己亥填星守房心占曰填守房多禍喪守心國內亂天下赦是時司馬越專權終以無禮破滅內亂之應也十一月帝崩懷帝卽位大赦天下

懷帝永嘉元年十二月丁亥星流震散按劉向說天官列宿在位之象其衆小星無名者衆庶之類此百官衆庶將流散之象也是後天下大亂百官萬姓流

移轉死矣

二年正月庚午太白伏不見二月庚子始晨見東方是謂當見不見占同上條其後破軍殺將不可勝數帝崩虜庭中夏淪覆

三年正月庚子熒惑犯紫微占曰當有野死之王又爲火燒宮是時太史令高堂沖奏乘輿宜遷幸不然必無洛陽五年六月劉曜王彌入京都焚燒宮廟執帝歸平陽

三年填星久守南斗占曰填星所居久者其國有福是時安東將軍琅邪王始有揚土其年十一月地動陳卓以爲是地動應也

五年十月熒惑守心六年六月丁卯太白犯太微占曰兵入天子庭王者惡之七月帝崩于寇庭天下行服大臨

元帝太興元年七月太白犯南斗占曰吳越有兵大人憂

二年二月甲申熒惑犯東井占曰兵起貴臣相戮八月己卯太白犯軒轅大星占曰後宮憂

三年五月戊子太白入太微又犯上將星占曰天子自將上將誅九月太白犯南斗十月己亥熒惑在東井居五諸侯南踟躕留積三十日占曰熒惑守井二十日以上大人憂守五諸侯諸侯有誅者永昌元年三月王敦率江荆之衆來攻京都六軍距戰敗績人主謝過而已於是殺護軍將軍周顛尙書令刁協車騎將軍戴若思又鎮北將軍劉隗出奔四月又殺湘州刺史譙王司馬承鎮南將軍甘卓閏十二月帝崩

明帝太寧三年正月熒惑逆行入太微占曰爲兵喪王者惡之閏八月帝崩後二年蘇峻反攻焚宮室太后以憂偪崩天子幽劫于石頭城遠近兵亂至四年乃息

成帝咸和六年正月景辰月入南斗占曰有兵是月石勒殺略婁武進二縣人明年石勒衆又抄略南沙海虞其十一月熒惑守胃昴占曰趙魏有兵八年七月石勒死石季龍自立是時雖二石僭號而其疆弱常占於昴不關太微紫宮也

八年三月己巳入南斗與六年占同其年七月石勒死彭彪以譙石生以長安郭權以秦州並歸順於是遣督護喬球率衆救彪彪敗球退又石季龍石斌攻滅生權其七月熒惑入昴占曰胡王死一曰趙地有兵是月石勒死石季龍多所攻沒八月月又犯昴占曰胡不安

九年三月己亥熒惑入輿鬼犯積尸占曰兵在西北有沒軍死將六月八月月又犯昴是時石弘雖襲勒位而石季龍擅威橫暴十一月廢弘自立遂幽殺之咸康元年二月己亥太白犯昴占曰兵起歲中旱四月石季龍略騎至歷陽加司徒王導大司馬治兵列戍衝要是時石季龍又圍襄陽六月旱其年二月景戌月入昴占曰胡王死八月戌戌熒惑入東井占曰無兵兵起有兵兵止十一月月犯昴

二年正月辛亥月犯房南第二星八月月又犯昴九月庚寅太白犯南斗因晝見占曰斗爲宰相又揚州分金犯之死喪之象晝見爲不臣又爲兵喪其後石季龍僭稱天王發衆七萬四年二月自隴西攻段遼于薊又襲慕容皝於棘城

不克讎擊破其將麻秋并虜段遼殺之

三年七月己酉月犯房上星八月熒惑入輿鬼犯積尸甲戌月犯東井距星九月戊子月犯建星

四年四月己巳太白晝見在柳占曰爲兵爲不臣明年石季龍大寇沔南於是內外戒嚴其五月戊戌熒惑犯右執法占曰大臣死執政者憂九月太白又犯右執法案占五星災同金水尤甚十一月戊子太白犯房上星占曰上相憂五年四月乙未月犯畢距星占曰兵起七月己酉月犯房上星占曰將相憂是月庚申丞相王導薨庾冰代輔政八月太尉郗鑒薨又有沔南邾城之敗百姓流亡萬餘家六年正月征西大將軍庾亮薨

六年三月甲辰熒惑犯太微上將星占曰上將憂四月丁丑熒惑犯右執法占曰執政者憂六月乙亥月犯牽牛中央星占曰大將憂是時尙書令何充爲執法有譴欲避其咎明年求爲中書令其四月景午太白犯畢距星占曰兵革起一曰女主憂六月乙卯太白犯軒轅大星占曰女主憂七年三月皇后杜氏薨

七年三月壬午月犯房四月己丑太白入輿鬼五月太白晝見八月辛丑月犯輿鬼

八年六月熒惑犯房上第二星占曰次相憂八月壬寅月犯畢占曰下犯上兵革起十月月又掩畢大星占同上其建元元年車騎將軍庾冰薨庾翼大發兵謀伐石季龍專制上流朝廷憚之

康帝建元二年正月壬午太白入昴占曰趙地有兵又曰天下兵起四月乙酉太白晝見是年石季龍殺其子邃又遣將寇沒狄道及屯薊東謀慕容晃三年歲星犯天關安西將軍庾翼與兄冰書曰歲星犯天關占云關梁當分比來江東無他故江道亦不艱難而石季龍頻年再閉關不通信使此復是天公憤憤無皂白之徵也其閏月乙酉太白犯斗占曰爲喪天下受爵祿九月帝崩太子立大赦賜爵

穆帝永和元年正月丁丑月入畢占曰兵大起戊寅月犯天關占曰有亂臣更天子之法五月辛巳太白晝見在東井占曰爲臣彊秦有兵六月辛丑月入太

微犯屏西南星占曰輔臣有免罷者七月八月月皆犯畢占同上己未月犯輿
鬼占曰大臣有誅九月庚戌月犯畢是年初庾翼在襄陽七月翼疾將終輒以
子爰之爲荊州刺史代己任爰之尋被廢明年桓温又輒率衆伐蜀執李勢送
至京都蜀本秦地也

二年二月壬子月犯房上星四月景戌月又犯房上星八月壬申太白犯左執
法

三年正月壬午月犯南斗第五星占曰將軍死近臣去五月壬申月犯南斗第
四星因入魁占曰有兵一曰有大赦六月月犯東井距星占曰將軍死國有憂
戊戌月犯五諸侯占曰諸侯有誅九月庚寅太白犯南斗第五星占曰爲喪爲
兵

四年七月景申太白犯左執法甲寅月犯房丁巳月入南斗犯第二星乙丑太
白犯左執法占悉同上十月甲辰月犯亢占曰兵起將軍死十一月戊戌月犯
上將星三年六月大赦是月陳遼征壽春敗而還七月氏蜀餘寇反亂益土九

月石季龍伐涼州五年征北大將軍褚裒卒

四年四月太白入昴是時戎晉相侵趙地連兵尤甚七月太白犯軒轅占曰在趙及爲兵喪甲寅月犯房十月甲戌月犯亢占曰兵起將軍死八月石季龍太子宣殺弟韜宣亦死其十一月戊戌月犯上將星五年正月石季龍僭號稱皇帝尋死

五年四月丁未太白犯東井占曰秦有兵九月戊戌太白犯左角占曰爲兵十月月犯昴占曰胡有憂將軍死是年八月褚裒北征兵敗十月關中二十餘壁舉兵內附石遵攻沒南陽十一月冉閔殺石遵又盡殺胡十餘萬人於是趙魏大亂十二月褚裒薨八年劉顯苻健慕容儁並僭號殷浩北伐敗績見廢

六年二月辛酉月犯心大星占曰大人憂又豫州分野也丁丑月犯房占曰將相憂六月己丑月犯昴占同上乙未月犯五諸侯占同上七月壬寅月始出西方犯左角占曰大將軍死一曰天下有兵丁未月犯箕占曰將軍死景寅熒惑犯鉞星占曰大臣有誅八月辛卯月犯左角太白晝見在南斗月犯右執法占

並同上是歲司徒蔡謨免爲庶人

七年二月太白犯昴占同上三月乙卯熒惑入輿鬼犯積尸占曰貴人有憂五月乙未熒惑犯軒轅大星占曰女主憂太白入畢口犯左股占曰將相當之六月乙亥月犯箕占曰國有兵景子月犯斗丁丑熒惑入太微犯右執法八月庚午太白犯軒轅戊子太白犯右執法占悉同上七年劉顯殺石祗及諸將帥山東大亂疾疫死亡

八年三月戊戌月犯軒轅大星癸丑月入南斗犯第二星五月月犯心星六月癸酉月犯房七月壬子歲星犯東井距星占曰內亂兵起八月戊戌熒惑入輿鬼占曰忠臣戮死景辰太白入南斗犯第四星占曰將爲亂一曰丞相免

九年二月乙巳月入南斗犯第三星三月戊戌月犯房八月歲星犯輿鬼東南星占曰兵起是時帝幼冲母后稱制將相有隙兵革連起慕容儁僭號稱燕王攻伐不休

十年正月己卯月蝕昴星占曰趙魏有兵癸酉填星奄鉞星占曰斧鉞用三月

甲申月犯心大星占曰王者惡之七月庚午太白晝見晷度推之災在秦鄭九月辛酉太白犯左執法是時桓温擅命朝臣多見迫脅四月温伐苻健破其嶢柳軍十二月慕容恪攻齊

十一年三月辛亥月奄軒轅占同上四月庚寅月犯牛宿南星占曰國有憂八月己未太白犯天江占曰河津不通

十二年六月庚子太白晝見在東井占如上己未月犯鉞星八月癸酉月奄建星九月戊寅熒惑入太微犯西蕃上將星十一月丁丑熒惑犯太微東蕃上將星十二年十一月齊城陷執段龕殺三千餘人永和三年鮮卑侵略河冀升平元年慕容雋遂據臨漳盡有幽并青冀之地緣河諸將奔散河津隔絕時權在方伯九服交兵

升平元年四月壬子太白入輿鬼丁亥月奄井南轅西頭第二星占曰秦地有兵一曰將死六月戊戌太白晝見在軫占同上軫是楚分野壬子月犯畢占曰爲邊兵七月辛巳熒惑犯天江占曰河津不通十一月歲星犯房占曰豫州有

災其年五月苻堅殺苻生而立十二月慕容儁入屯鄴二年八月豫州刺史謝奕薨

二年十二月辛卯填星犯軒轅大星占曰人主惡之甲午月犯東井六月辛酉月犯房十月己未太白犯哭星占曰有大哭泣
三年正月壬辰熒惑犯鍵閉星案占曰人主憂三月乙酉熒惑逆行犯鉤鈴案占王者惡之六月太白犯東井七月乙酉熒惑犯天江景戌太白犯輿鬼占悉同上戊子月犯牽牛中央大星占曰牽牛天將也犯中央大星將軍死八月丁未太白犯軒轅大星甲子月犯畢大星占曰爲邊兵一曰下犯上三年十月諸葛攸舟軍入河敗績豫州刺史謝萬入朝衆潰而歸萬除名十一月司徒會稽王以郗曇謝萬二鎮敗求自貶三等四年正月慕容儁死子暉代立慕容恪殺其尙書令陽鶩等

四年正月乙亥月犯牽牛中央大星六月辛亥辰星犯軒轅占曰女主憂己未太白入太微右掖門從端門出占曰貴奪勢一曰有兵又曰出端門臣不臣入

月戊申太白犯氐占曰國有憂景辰熒惑犯太微西蕃上將星九月壬午太白入南斗口犯第四星占曰爲喪有赦天下受爵祿十二月甲寅熒惑犯房景寅太白晝見庚寅月犯鍵閉占曰人君惡之

五年正月乙巳填星逆行犯太微五月壬寅月犯太微庚戌月犯建星占曰大臣相謀是時殷浩敗績卒致遷徙其月辛亥月犯牽牛宿占曰國有憂六月癸亥月犯氐東北星占曰大將當之五年正月北中郎將郗曇薨五月帝崩哀帝立大赦賜爵褚后失勢七月慕容恪攻冀州刺史呂護於野王護奔滎陽是時桓溫以大衆次宛聞護敗乃退

五年六月癸酉月奄氐東北星占曰大將軍當之九月乙酉月奄畢占曰有邊兵十月丁未月犯畢大星占曰下犯上又曰有邊兵八月范汪廢隆和元年慕容暉遣將寇河陰

哀帝興寧三年七月庚戌月犯南斗占曰女主憂歲星犯輿鬼占曰人君憂十月太白晝見在亢占曰亢爲朝廷有兵喪爲臣彊明年五月皇后庾氏崩

海西太和二年正月太白入昴五年慕容暉爲苻堅所滅又據司冀幽并四州六年閏月熒惑守太微端門占曰天子亡國又曰諸侯三公謀其上一曰有斬臣辛卯月犯心大星占曰王者惡之十一月桓温廢帝并奏誅武陵王簡文不許温乃徙之新安皆臣彊之應也

簡文咸安元年十二月辛卯熒惑逆行入太微二年三月猶不退占曰國不安有憂是時帝有桓温之逼

二年五月丁未太白犯天關占曰兵起歲星形色如太白占曰進退如度姦邪息變色亂行主無福歲星於仲夏當細小而不明此其失常也又爲臣彊六月太白晝見在七星乙酉太白犯輿鬼占曰國有憂七月帝崩桓温以兵威擅權將誅王坦之等內外迫脅又庾希入京城盧悚入宮並誅滅之

孝武寧康元年正月戊申月奄心大星案占曰災不在王者則在豫州一曰王命惡之三月景午月奄南斗第五星占曰大臣有憂死亡一曰將軍死七月桓温薨九月癸巳熒惑入太微是時女主臨朝政事多缺

二年閏月己未月奄牽牛南星占曰左將軍死十西蕃上將星九月壬午太白兗州分野三年五月景午北中郎將王坦之薨 二月甲寅熒惑犯房景寅

三年六月辛卯太白犯東井占曰秦地有兵九月戊申

法者死太元元年苻堅破涼州二年十月尙書令王彪之卒月犯建星占曰大太元元年四月景戌熒惑犯南斗第三星景申又奄第四星占曰有憂六月癸饑一曰有赦八月癸酉太白晝見在氏氏兗州分野九月熒惑犯哭泣星遂入羽林占曰天子有哭泣事中軍兵起十一月己未月奄氐角占曰天下有兵一

曰國有憂

二年二月熒惑守羽林占曰禁兵大起九月壬午太白晝見在角角兗州分野升平元年五月大赦三年八月秦人寇樊鄧襄陽彭城四年二月襄陽陷朱序沒四月魏興陷賊聚廣陵三河衆五六萬於是諸軍外次衝要丹陽尹屯衛京都六月兗州刺史謝玄討賊大破之是時中外連兵比年荒儉 四年十一月丁巳太白犯哭星占曰天子有哭泣事

五年七月景子辰星犯軒轅占曰女主當之九月癸未皇后王氏崩

六年九月景子太白晝見

七年十一月太白又晝見在斗占曰吳有兵喪

八年四月甲子太白又晝見在參占曰魏有兵喪是月桓沖征沔漢楊亮伐蜀並拔城略地八月苻堅自將號百萬九月攻沒壽陽十月劉牢之破苻堅將梁成斬之殺獲萬餘人謝玄等又破苻堅於淝水斬其弟融堅大衆奔潰九年六月皇太后褚氏崩八月謝玄出屯彭城經略中州矣

九年七月景戌太白晝見十一月丁巳又晝見

十年四月乙亥又晝見于畢昴占曰魏國有兵喪是時苻堅大衆奔潰趙魏兵連相攻堅爲姚萇所殺

十一年三月戊申太白晝見在東井占曰秦有兵臣彊六月甲申又晝見于輿鬼占曰秦有兵時魏姚萇苻登連兵相征不息甲午歲星晝見在胃占曰魯有兵臣彊十二年慕容垂寇東阿翟遼寇河上姚萇假號安定苻登自立隴上呂

光竊據涼土

十二年六月癸酉太白晝見在柳十月庚午太白晝見在斗

十三年正月景戌又晝見十二月熒惑在角亢形色猛盛占曰熒惑失其常吏且棄其法諸侯亂其政自是後慕容垂翟遼姚萇苻登慕容永並阻兵爭疆十四年正月彭城妖賊又稱號於皇丘劉牢之破滅之三月張道破合鄉圍泰山向欽之擊走之是年翟遼又攻沒滎陽侵略陳項于時政事多弊君道陵遲矣十四年四月己巳太白晝見于柳六月辛卯又晝見于翼九月景寅又晝見于軫十二月熒惑入羽林占並同上十五年翟遼掠司兗衆軍累討不剋慕容垂又跨略并冀等州七月旱八月諸郡大水兗州又蝗十五年九月癸未熒惑入太微十月太白入羽林十六年四月癸卯朔太白晝見十一月癸巳月奄心前星占曰太子憂是時太子常有篤疾

十七年七月丁丑太白晝見十月丁酉又晝見

十八年六月又晝見

十九年五月又晝見于柳六月辛酉又晝見于輿鬼九月又見于軫

二十年六月熒惑入天囷占曰大饑七月丁亥太白晝見在太微占曰太白入

太微國有憂晝見爲兵喪十二月己巳月犯鍵閉及東西咸占曰鍵閉司心腹

喉舌東西咸主陰謀

二十一年二月壬申太白晝見三月癸卯太白連晝見在羽林占曰有疆臣有

兵喪中軍兵起三月太白晝見于胃占曰中軍兵起四月壬午太白入天囷占

曰爲饑六月歲星犯哭泣星占曰有哭泣事是年九月帝崩隆安元年王恭等

舉兵脅朝廷於是內外戒嚴殺王國寶以謝之及連歲水旱三方動衆人飢

安帝隆安元年正月癸亥熒惑犯哭泣星占曰有哭泣事四月丁丑太白晝見

在東井占曰秦有兵喪六月姚興攻洛陽鄒恢遣兵救之冬姚萇死子略代立

魏王圭卽位於中山其八月熒惑守井鉞占曰大臣有誅

二年六月戊辰攝提移度失常歲星晝見在胃兗州分野是年六月鄒恢遣鄧

啓方等以萬人伐慕容寶於滑臺敗而還閏月太白晝見在羽林十一月犯東上相

三年五月辛酉月又奄東上相辛未辰星犯軒轅大星占悉同上二年九月庾楷等舉兵表誅王愉等於是內外戒嚴三年六月洛陽沒于寇桓玄破荊雍州殺殷仲堪等孫恩聚衆攻沒會稽殺內史

四年六月辛酉月犯哭泣星

五年正月太白晝見自去年十二月在斗晝見至于是月乙卯案占災在吳越七月癸亥大角星散搖五色占曰王者流散丁卯月犯天關占曰王者憂九月庚子熒惑犯少微又守之占曰處士誅十月甲子月犯東次相其年七月太皇太后李氏崩十月妖賊大破高雅之於餘姚死者十七八五年孫恩攻侵郡縣殺內史至京口進軍蒲洲於是內外戒嚴恩遣別將攻廣陵殺三千餘人退據郁洲是時劉裕又追破之九月桓玄表至逆旨陵上十月司馬元顯大治水軍將以伐玄元興元年正月盧循自稱征虜將軍領孫恩餘衆略有永嘉晉安之

地二月帝戎服遣西軍三月桓玄剋京都殺司馬元顯放太傅會稽王道子
元興元年三月戊子太白犯五諸侯因晝見占曰諸侯有誅七月戊寅熒惑在
東井熒惑犯輿鬼積尸占並同上八月景寅太白奄右執法九月癸未太白犯
進賢占曰進賢者誅

二年二月歲星犯西上將六月甲辰月奄斗第四星占曰大臣誅不出三年八
月癸丑太白犯房北第二星九月己丑歲星犯進賢熒惑犯西上將十月甲戌
太白犯泣星十一月丁酉熒惑犯東上相十二月乙巳月奄軒轅第二星占悉
同上升平元年冬魏破姚興軍二年十二月桓玄篡位放遷帝后於尋陽以永
安何皇后爲零陵君三年二月劉裕盡誅桓氏

三年正月戊戌熒惑逆行犯太微西上相占曰天子戰於野上相死二月景辰
熒惑逆行在左執法西北占曰執法者誅四月甲午月奄軒轅第二星五月壬
申月奄斗第二星填星入羽林占並同上是年二月景辰劉裕殺桓修等三月
己未破走桓玄遣軍西討辛未誅左僕射王愉桓玄劫天子如江陵五月玄下

至崢嶸洲義軍破滅之桓振又攻沒江陵幽劫天子七月永安何皇后崩

義熙元年三月壬辰月奄左執法占同上丁酉月奄心前星占曰豫州有災太白犯東井占曰秦有兵七月庚辰太白晝見在翼軫占曰爲臣彊荊州有兵喪八月丁巳犯斗第一星占曰天下有兵一曰大臣憂九月甲子熒惑犯少微占曰處士誅庚寅熒惑犯右執法癸卯熒惑犯左執法占並同上十一月景戌太白犯鉤鈴占曰喉舌憂十二月己卯歲星犯天關占曰有兵亂河津不通十一月荊州刺史魏詠之薨二年二月司馬國璠等攻沒弋陽四月姚興伐仇池公楊盛擊走之九月益州刺史司馬榮期爲其參軍楊承祖所害三年十二月司徒揚州刺史王謐薨四年正月太保武陵王遵薨三月左僕射孔安國卒自後政在劉裕人主端拱而已

二年二月太白犯南斗占曰兵起己丑月犯心後星占曰豫州有災四月癸丑月犯太微西上將己未月犯房南第二星乙丑歲星犯天江占曰有兵亂河津不通五月癸未月犯左角占曰左將軍死天下有兵壬寅熒惑犯氐占曰氐爲

宿宮人主憂六月庚午熒惑犯房北第二星八月癸亥熒惑犯南斗第五星丁巳犯建星占曰爲兵九月壬午熒惑犯哭星又犯泣星是年二月甲戌司馬國璠等攻沒弋陽又慕容超侵略徐兗三年正月又寇北徐州至下邳十二月司徒王謐薨四年正月武陵王遵薨五年慕容超復寇淮北四月劉裕大軍討之拔臨朐又圍廣固拔之

三年正月景子太白晝見在奎二月庚申月奄心後星占同上五月癸未月犯左角己丑太白晝見在參占曰益州有兵喪臣彊八月己卯太白犯左執法辛卯熒惑犯左執法九月壬子熒惑犯進賢星是年八月劉敬宣伐蜀不剋而旋四年三月左僕射孔安國卒七月司馬叔璠等攻沒鄒山魯郡太守徐邕破走之姚略遣衆征赫連勃勃大爲所破五年劉裕討慕容超滅之

四年正月庚子熒惑犯天關五月丁未月奄斗第二星壬子填星犯天廩占曰天下饑倉粟少六月己丑太白犯太微西上將乙卯又犯左執法十月戊子熒惑入羽林占悉同上五年劉裕討慕容超後南北軍旅運轉不息

五年二月甲子月犯昴占曰胡不安天子破匈奴五月戊戌歲星入羽林九月壬寅月犯昴十月熒惑犯氏閏月丁酉月犯昴辛亥熒惑犯鉤鈐己巳月奄心大星占曰王者惡之是年四月劉裕討慕容超十月魏王圭遇弑殂六年五月盧循逼郊甸宮衛被甲

六年三月丁卯月奄房南第二星災在次相己巳又奄斗第五星占曰斗主吳吳地兵起太白犯五諸侯占曰諸侯有誅五月甲子月奄斗第五星己亥月奄昴第三星占曰國有憂一曰有白衣之會六月己丑月犯房南第二星甲午太白晝見七月己亥月犯輿鬼占曰國有憂一曰秦有兵八月壬午太白犯軒轅大星甲申月犯心前星災在豫州景戌月犯斗第五星占同上丁亥月奄牛宿南星占曰天下有大誅乙未太白犯少微景午太白在少微而晝見九月甲寅太白犯左執法丁丑填星犯畢占曰有邊兵是年三月始興太守徐道覆反四月盧循寇湘中沒巴陵率衆逼京畿是月左僕射孟昶懼王威不振仰藥自殺七年十二月劉蕃梟徐道覆首杜慧度斬盧循並傳首京都八年六月劉道規

卒時爲豫州刺史八月皇后王氏崩九月兗州刺史劉蕃尙書左僕射謝混伏誅劉裕西討劉毅斬首徇之十二月遣益州刺史朱齡石伐蜀

七年四月辛丑熒惑入輿鬼占曰秦有兵一曰雍州有災六月太白晝見在翼己亥填星犯天關占曰臣謀主八月太白犯房南第二星十一月景子太白犯哭星其七月朱齡石剋蜀蜀又反討滅之

八年七月癸亥月奄房北第二星己未月犯井鉞八月戊申月犯泣星十月辛亥月奄天關占曰有兵十一月丁丑填星犯東井占曰大人憂十二月癸卯填星犯井鉞是年八月皇后王氏崩九年誅劉蕃謝混討滅劉毅十二月朱齡石滅蜀

九年二月熒惑入輿鬼占曰有兵喪太白犯南河占曰兵起五月壬辰太白犯右執法晝見七月庚午月奄鉤鈐占曰喉舌臣憂九月庚午歲星犯軒轅大星己丑月犯左角時劉裕擅命兵革不休十年裕討司馬休之王師不利休之等奔長安

十年正月丁卯月犯畢占曰將相有以家坐罪者二月己酉月犯房北星五月壬寅月犯牽牛南星乙丑歲星犯軒轅大星占悉同上六月景申月奄氐占曰將死之國有誅者七月庚辰月犯天關占曰兵起熒惑犯井鉞填星犯輿鬼遂守之占曰大人憂宗廟改八月丁酉月奄牽牛南星占同上九月填星犯輿鬼占曰人主憂丁巳太白入羽林十二月己酉月犯西咸占曰有陰謀十一年林邑寇交州距敗之

十一年三月丁巳月入畢占曰天下兵起一曰有邊兵己卯熒惑入輿鬼閏月景午填星又入輿鬼占曰爲旱大疫爲亂臣五月癸卯熒惑入太微甲辰犯右執法六月己未太白犯東井占曰秦有兵戊寅犯輿鬼占曰國有憂七月辛丑月犯畢占同上八月壬子月犯氐占同上庚申太白順行從右掖門入太微丁卯奄左執法十一月癸亥月入畢占同上乙未月入輿鬼而暈

十二年五月甲申歲星留房心之間宋之分野始封劉裕爲宋公六月壬子太白順行入太微右掖門己巳月犯畢占同上七月月犯牛宿十月景戌月入畢

十三年五月景子月犯軒轅丁亥犯牽牛癸巳熒惑犯右執法八月己酉月犯牽牛丁卯月犯太微占曰人君憂九月壬辰熒惑犯軒轅十月戊申月犯畢占悉同上月犯箕占曰國有憂甲寅月犯畢占同上乙卯填星犯太微留積七十餘日占曰亡君之戒壬戌月犯太微

十四年三月癸巳太白犯五諸侯五月庚子月犯太微七月甲辰熒惑犯輿鬼占曰秦有兵又爲旱爲兵喪亦曰大人憂宗廟改亦爲亂臣時劉裕擅命軍旅數興饑旱相屬其後卒移晉室丁巳月犯東井占曰將軍死八月甲子太白犯軒轅癸酉填星入太微犯右執法因留太微中積二百餘日乃去占曰填星守太微亡君之戒有徙王九月乙未太白入太微犯左執法丁巳入太微占曰大人憂十月甲申月入太微癸巳熒惑入太微犯西蕃上將仍順行至左掖門內留二十日乃逆行義熙十二年七月劉裕伐姚泓十三年八月擒姚泓司兗秦雍悉平十四年劉裕還彭城受宋公十一月左僕射前將軍劉穆之卒明年西虜寇長安雍州刺史朱齡石諸軍陷沒官軍捨而東十二月帝崩

恭帝元熙元年正月景午三月壬寅五月景申月皆犯太微占悉同上己卯辰星犯軒轅六月庚辰太白犯太微七月己卯月犯太微太白晝見自義熙元年至是太白經天者九月蝕者四皆從上始革代更王臣失君之象也是夜太白犯哭星十二月丁巳月入太白俱入羽林

二年三月庚午填星犯太微占悉同上元年七月劉裕受宋王是年六月帝遜位于宋

妖星客星

魏文帝黃初三年九月甲辰客星見太微左掖門內占曰客星出太微國有兵喪十月帝南征孫權是後累有征役

六年十月乙未有星孛于少微歷軒轅占爲兵喪除舊布新之象時帝軍廣陵辛丑親御甲冑觀兵明年五月帝崩

明帝太和六年十一月景寅有星孛于翼近太微上將星占曰爲兵喪甘氏曰孛彗所當之國是受其殃翼又楚分野孫權封略也明年權有遼東之敗又明

年諸葛亮入秦川孫權發兵緣江淮屯要衝權自圍新城以應亮天子東征權
青龍四年十月甲申有星孛于大辰長三尺乙酉又孛于東方十一月己亥彗
星見犯宦者天紀星占曰大辰爲天王天下有喪劉向五紀論曰春秋星孛于
東方不言宿者不加宿也宦者在天市爲中外有兵天紀爲地震孛彗主兵喪
景初元年六月地震九月吳將朱然圍江夏皇后毛氏崩二年正月討公孫文
懿三年正月明帝崩

景初二年八月彗星見張長三尺逆西行四十一日滅占同上張周分野十月
癸巳客星見危逆行在離宮北騰蛇南甲辰犯宗星己酉滅占曰客星所出有
兵喪虛危爲宗廟又爲墳墓客星近離宮則宮中將有大喪就先君於宗廟之
象也三年正月帝崩

少帝正始元年十月乙酉彗星見西方在尾長二丈拂牽牛犯太白十一月甲
子進犯羽林占曰尾爲燕又爲吳牛亦吳越之分太白爲上將羽林中軍兵爲
吳越有喪中軍兵動二年五月吳遣三將寇邊吳太子登卒六月宣帝討諸葛

恪於皖太尉滿寵薨

六年八月戊午彗星見七星長二尺色白進至張積二十三日滅七年十一月
癸亥又見軫長一尺積百五十六日滅九年三月又見昴長六尺色青白芒西
南指七月又見翼長二尺進至軫積四十二日滅案占曰七星張爲周分野翼
軫爲楚昴爲趙魏彗所以除舊布新主兵喪也嘉平元年宣帝誅曹爽兄弟及
其黨與皆夷三族京師嚴兵三年誅楚王彪又襲王凌於淮南淮南東楚也魏
諸王幽於鄴

嘉平三年十一月癸亥有星孛于營室西行積九十日滅占曰有兵喪室爲後
宮後宮且有亂

四年二月丁酉彗星見西方在胃長五六丈色白芒南指貫參積二十日滅五
年十一月彗星又見軫長五丈在太微左執法西東南指積百九十日滅案占
胃兗州之分野參主兵太微天子庭執法爲執政孛彗爲兵喪除舊布新之象
正元元年二月李豐豐弟翼后父張緝等謀亂皆誅皇后亦廢九月廢帝爲齊

王

高貴鄉公正元元年十一月白氣出南斗側廣數丈長竟天王肅曰蚩尤之旗也東南其有亂乎二年正月有彗星見于吳楚分西北竟天鎮東大將軍毋丘儉等據淮南叛景帝討平之案占蚩尤旗見王者征伐四方自後又征淮南西平巴蜀是歲吳主孫亮五鳳元年也斗牛吳越分案占吳有兵喪除舊布新之象也太平三年孫綝盛兵圍宮廢亮爲會稽王故國志又書於吳也淮南江東同揚州地故于時變見吳楚楚之分則魏之淮南多與吳同災是以毋丘儉以孛爲己應遂起兵而敗後三年卽魏甘露二年諸葛誕又反淮南吳遣將救之及城陷誕衆與吳兵死沒各數萬人猶前長星之應也

甘露二年十一月彗星見角色白占曰彗星見兩角間色白者軍起不戰邦有大喪景元元年高貴鄉公爲成濟所害

四年十月丁丑客星見太微中轉東南行歷軫宿積七日滅占曰客星出太微有兵喪景元元年高貴鄉公被害

元帝景元三年十一月壬寅彗星見亢色白長五寸轉北行積四十五日滅占曰爲兵喪一曰彗星見亢天子失德四年鍾會鄧艾伐蜀剋之二將反亂皆誅咸熙二年五月彗星見王良長丈餘色白東南指積十二日滅占曰王良天子御駟彗星掃之禪代之表除舊布新之象也色白爲喪王良在東壁宿又并州之分野八月文帝崩十二月武帝受魏禪

武帝泰始四年正月景戌彗星見軫青白色西北行又轉東行占曰爲兵喪軫又楚分野三月皇太后王氏崩十月吳寇江夏襄陽

五年九月星孛于紫宮占如上紫宮天子內宮十年武元楊皇后崩

十年十二月有星孛于軫占曰天下兵起軫又楚分野

咸寧二年六月甲戌星孛于氐占曰天子失德易政氐又兗州分七月星孛大角大角爲帝坐八月星孛太微至翼北斗三台占曰太微天子庭大人惡之一曰有改王翼又楚分野北斗主殺罰三台爲三公

三年正月星孛于西方三月星孛于胃胃徐州分四月星孛于女御女御爲後宮

五月又孛于東方七月星孛紫宮占曰天下易王

四年四月蚩尤旗見于東井後二年傾三方伐吳是其應也

五年三月星孛于柳四月又孛于女御七月孛于紫宮占曰外臣陵主柳又三河分野大角太微紫宮女御並爲王者明年吳亡是其應也孛主兵喪征吳之役三河徐兗之兵悉出交戰於吳楚之地吳丞相都督以下梟戮十數偏裨行陣之徒馘斬萬計皆其徵也

太康二年八月有星孛于張占曰爲兵喪十一月星孛于軒轅占曰後宮當之四年三月戊申星孛于西南是年齊王攸任城王陵琅邪王佃新都王詠薨八年九月星孛于南斗長數十丈十餘日滅占曰斗主爵祿國有大憂一曰孛于斗王者疾病天下易政大亂兵起

太熙元年四月客星在紫宮占曰爲兵喪太康末武帝耽宴遊多疾病是月己酉帝崩永平元年賈后誅楊駿及其黨與皆夷三族楊太后亦見弒又誅汝南王亮太保衛瓘楚王瑋王室兵喪之應也

惠帝元康五年四月有星孛于奎至軒轅太微經三台大陵占曰奎爲魯又爲庫兵軒轅爲後宮太微天子庭三台爲三司大陵有積尸死喪之事其後武庫火西羌反後五年司空張華遇禍賈后廢死魯公賈謚誅又明年趙王倫篡位於是三王興兵討倫兵士戰死十餘萬人

永康元年三月妖星見南方占曰妖星出天下大兵將起是月賈后殺太子趙王倫尋廢殺后斬司空張華又廢帝自立於是三王並起迭總大權其十二月彗星出牽牛之西指天市占曰牛者七政始彗出之改元易號之象也天市一名天府一名天子旗帝坐在其中明年趙王倫篡位改元尋爲大兵所滅

二年四月彗星見齊分占曰齊有兵喪是時齊王罔起兵討趙王倫倫滅罔擁兵不朝專權淫奢明年誅

太安元年四月彗星晝見

二年三月彗星見東方指三台占曰兵喪之象三台爲三公三年正月東海王越執太尉長沙王又張方又殺之

永興元年五月客星守畢占曰天子絕嗣一曰大臣有誅時諸王擁兵其後惠帝失統終無繼嗣

二年八月有星孛于昴畢占曰爲兵喪昴畢又趙魏分野十月丁丑有星孛于北斗占曰璇璣更授天子出走又曰疆國發兵諸侯爭權是後諸王交兵皆有應明年惠帝崩

成帝咸和四年七月有星孛于西北犯斗二十三日滅占曰爲兵亂十二月郭默殺江州刺史劉胤荊州刺史陶侃討默斬之時石勒又始僭號

咸康二年正月辛巳彗星夕見西方在奎占曰爲兵喪奎又爲邊兵三年正月石季龍僭天王位四年石季龍伐慕容皝不剋既退皝追擊之又破麻秋時皝稱藩邊兵之應也

六年二月庚辰有星孛于太微七年三月杜皇后崩

康帝建元元年十一月六日彗星見亢長七尺白色占曰亢爲朝廷主兵喪二
年康帝崩

穆帝永和五年十一月乙卯彗星見于亢芒西向色白長一丈六年正月丁丑彗星又見于亢占曰爲兵喪疾疫其五年八月褚裒北征兵敗十一月冉閔殺石遵又盡殺胡十餘萬人於是中土大亂十二月褚裒薨是年大疫

升平二年五月丁亥彗星出天船在胃占曰爲兵喪除舊布新出天船外夷侵一曰爲大水四年五月天下大水五年穆帝崩

哀帝興寧元年八月有星孛于角亢入天市案占曰爲兵喪三年正月皇后王氏崩二月帝崩三月慕容恪攻沒洛陽沈勁等戰死

海西太和四年二月客星見紫宮西垣至七月乃滅占曰客星守紫宮臣弑主六年桓溫廢帝爲海西公

孝武寧康二年正月丁巳有星孛于女虛經氏亢角軫翼張至三月景戌彗星見於氏九月丁丑有星孛于天市占曰爲兵喪太元元年七月苻堅破涼州虜張天錫

太元十一年三月客星在南斗至六月乃沒占曰有兵有赦是後司雍克冀常

有兵役十二年正月大赦八月又大赦

十五年七月壬申有星孛于北河或經太微三台文昌入北斗色白長十餘丈八月戊戌入紫宮乃滅占曰北河或一名胡門胡門有兵喪掃太微入紫微王者當之三台爲三公文昌爲將相將相三公有災入北斗諸侯戮一曰掃北斗疆國發兵諸侯爭權大人憂二十一年帝崩隆安元年王恭殷仲堪桓玄等並發兵表以誅王國寶爲名朝廷順而殺之并斬其從弟緒司馬道子由是失勢禍亂成矣

十八年二月客星在尾中至九月乃滅占曰燕有兵喪二十年慕容垂息寶伐魏爲所破死者數萬人二十一年垂死國遂衰亡

二十年九月有蓬星如粉絮東南行歷女虛至哭星占曰蓬星見不出三年必有亂臣戮死於市是時王國寶交構朝廷二十一年九月帝崩隆安元年王恭等興兵而朝廷殺王國寶王緒

安帝隆安四年二月己丑有星孛于奎長三丈上至閣道紫宮西蕃入北斗魁

至三台三月遂經于太微帝坐端門占曰彗星掃天子庭閣道易主之象經三台入北斗占同上條十二月戊寅有星孛于貫索天市天津占曰貴臣獄死內外有兵喪天津爲賊斷王道天下不通案占災在吳越五年二月有孫恩兵亂攻侵郡國於是內外戒嚴營陣屯守柵斷淮口九月桓玄表至逆旨陵上其後玄遂篡位亂京都大饑人相食百姓流亡皆其應也

元興元年十月有客星色白如粉絮在太微西至十二月入太微占曰兵入天子庭二年十二月桓玄篡位放遷帝后於尋陽以永安何皇后爲零陵君三年二月劉裕盡誅桓氏

義熙十一年五月甲申彗星二出天市掃帝坐在房心北房心宋之分野案占得彗柄者與除舊布新宋興之象

十四年五月庚子有星孛于北斗魁中七月癸亥彗星出太微西柄起上相星下芒漸長至十餘丈進掃北斗紫微中台占曰彗出太微社稷亡天下易王入北斗紫微帝宮空十四年劉裕還彭城受宋公十二月帝崩

恭帝元年正月戊戌有星孛于太微西蕃占曰革命之徵其年宋有天下
星流隕

蜀後主建興十三年諸葛亮帥大衆伐魏屯于渭南有長星赤而芒角自東北
西南流投亮營三投再還往大還小占曰兩軍相當有大流星來走軍上及墜
軍中者皆破敗之徵也九月亮卒于軍焚營而退羣帥交怨多相誅殘

魏明帝景初二年宣帝圍公孫文懿於襄平八月景寅夜有大流星長數十丈
白色有芒鬣從首山東北流墜襄平城東南占曰圍城而有流星來走城上及
墜城中者破又曰星墜當其下有戰場又曰凡星所墜國易姓九月文懿突圍
走至星墜所被斬屠城坑其衆

元帝景元四年六月有大流星二並如斗見西方分流南北光照地隆隆有聲
案占流星爲貴使星大者使大是年鍾鄧剋蜀二星蓋二帥之象二帥相背又
分流南北之應鍾會既叛三軍憤怒隆隆有聲兵將怒之徵也

武帝泰始四年七月星隕如雨皆西流占曰星隕爲百姓叛西流吳人歸晉之

象也二年吳夏口督孫秀率部曲二千餘人來降

太康九年八月壬子星隕如雨劉向傳云下去其上之象後三年帝崩而惠帝立天下自此亂矣

惠帝元康四年九月甲午枉矢東北行竟天

六年六月景午夜有枉矢自斗魁東南行案占曰以亂伐亂北斗主執殺出斗魁居中執殺者不直之象也是後趙王殺張裴廢賈后以理太子之寃因自篡盜以至屠滅以亂伐亂之應也一曰氏帥齊萬年反之應也

太安二年十一月辛巳有星晝隕中天北下光變白有聲如雷案占名曰營首營首所在下有兵流血明年劉元海石勒攻略并州多所殘滅王浚起燕代引鮮卑攻掠鄴中百姓塗地有聲如雷怒之象也

永興元年七月乙丑星隕有聲

二年十月星又隕有聲占同上是後遂亡中夏

光熙元年五月枉矢西南流是時司馬越西破河間兵奉迎大駕尋收繆胤何

綏等肆無君之心天下惡之及死而石勒焚其屍柩是其應也
懷帝永嘉元年九月辛卯有星大如日自西南流于東北小者如斗相隨天盡
赤聲如雷占曰流星爲貴使星大者使大是年五月汲桑殺東燕王騰遂據河
北十一月始遣和郁爲征北將軍鎮鄴西田甄等大破汲桑斬于樂陵於是以
甄爲汲郡太守弟蘭鉅鹿太守小星相隨者小將別帥之象也司馬越忿魏郡
以東平原以南皆黨於桑以賞甄等於是侵掠桑地有聲如雷忿怒之象也
四年十月庚子大星西北墜有聲尋而帝蒙塵于平陽
元帝太興三年四月壬辰枉矢出虛危沒翼軫占曰枉矢所觸天下之所伐翼
軫荊州之分野太寧二年王敦殺譙王承及甘卓而敦又梟夷枉矢觸翼之應
也

永昌元年七月甲午有流星大如盞長百餘丈青赤色從西方來尾分爲百餘
岐或散時王敦之亂百姓流亡之應也

成帝咸寧三年六月辛未流星大如二斗魁色青赤光耀地出奎中沒婁北案

占爲饑五穀不藏是月大旱饑六年二月庚午朔有流星大如斗光耀地出天市西行入太微占曰大人當之八年六月成帝崩

穆帝永和八年六月辛巳日未入有流星大如三斗魁從辰巳上東南行晷度推之在箕斗之間蓋燕分也案占爲營首營首之下流血滂沲是時慕容雋僭稱大燕攻伐無已

十年四月癸未流星大如斗色赤黃出織女沒造父有聲如雷占曰燕齊有兵百姓流亡其年十二月慕容雋遂據臨漳盡有幽并青冀之地緣河諸將奔散河津隔絕慕容恪攻齊

升平二年十二月枉矢自東南流于西北其長半天四年十月庚戌天狗見西南占曰有大兵流血

海西太和四年十月壬申有大流星西下有聲如雷明年遣使免袁真爲庶人桓溫征壽春真病死息瑾代立求救於苻堅溫破苻堅軍六月壽春城陷天盡孝武太元六年十月乙卯有奔星東南經翼軫聲如雷占曰楚地有兵軍破百

姓流亡十二月苻堅荊州刺史梁成襄陽太守閻震率衆伐竟陵桓石虔擊大破之生擒震斬首七千獲生口萬人聲如雷將帥怒之象也

十三年閏月戊辰天狗東北下有聲占曰有大戰流血自是後慕容垂翟遼姚萇苻登慕容永並阻兵爭疆十四年正月彭城妖賊又稱僞號於皇丘劉牢之破滅之三月張道破合鄉太山向欽之擊走之

安帝隆安五年三月甲寅流星赤色衆多西行經牽牛虛危天津閣道貫太微紫宮占曰星庶人類衆多西行衆將西流之象經天子庭主弱臣疆諸侯兵不制其年五月孫恩侵吳郡殺內史六月至京口於是內外戒嚴營陣屯守劉裕追破之元興元年七月大饑人相食浙江以東流亡十六七吳郡吳興戶口減半又流奔而西者萬計十月桓玄遣將擊劉軌破走之軌奔青州

雲氣

惠帝永興元年十二月壬寅夜有赤氣亘天殛隱有聲

二年十月丁丑赤氣見北方東西竟天占曰並爲大兵殛隱有聲怒之象也是

後四海雲擾九服交兵

光熙元年十二月甲申有白氣若虹中天北下至地夜見五日乃滅占曰大兵起明年王彌起青徐汲桑亂河北毒流天下

懷帝永嘉三年十一月乙亥有白氣如帶出南北方各二起地至天貫參伐中占曰天下大兵起四年三月司馬越收繆胤等又三方雲擾攻戰不休五年三月司馬越死於寧平城石勒攻破其眾死者十餘萬人六月京都焚滅帝如虜庭

愍帝建興元年十月己巳夜有赤氣曜於西北荊州刺史陶侃討杜弢之黨於石城戰敗

晉書卷十三

晉書卷十四

唐 太宗 文武皇帝 御 撰

志第四

地理上

總敘 雍州 涼州 秦州 冀州 幽州 平州

昔者元胎無象太素流形對越在天以為元首則記所謂冬居營窟夏居橧巢

飲血茹毛未有麻絲者也及燧人鑽火庖犧出震風宗下武炎胤昌基畫野無

聞其歸一揆黃帝則東海南江登空躡岱至於崑峯振轡崆山訪道存諸汗竹

不可厚誣高陽任地依神帝嚳順天行義東踰蟠木西濟流沙北至幽陵南撫

交趾日月所經舟車所至莫匪王臣不踰茲域帝堯時禹平水土以為九州虞

舜登庸厥功彌劭表提類而分區宇判山河而考疆域冀北創并部之名燕齊

起幽營之號則書所謂肇十有二州封十有二山者也夏功則于唐堯殷因無

所損益周武克商自豐徂鎬至成王時改作禹貢徐梁入於青雍冀野析於幽

并職方掌天下之土以周厥利保章辨九州之野皆有分星東南曰揚州正南

曰荊州河南曰豫州正東曰青州河東曰兗州正西曰雍州東北曰幽州河內

曰冀州正北曰并州始皇初并天下懲忒戰國削罷列侯分天下為三十六郡

三川河東南陽南郡九江鄣郡會稽潁川碭郡泗水薛郡東郡琅邪齊郡上谷

漁陽右北平遼西遼東代郡鉅鹿邯鄲上黨太原雲中九原鴈門上郡隴西北

地漢中巴郡蜀郡黔中長沙凡三十五郡與內史為三十六郡也於是興師踰江平取百越又置閩中南海桂

林象郡凡四十郡郡一守焉其地則西臨洮而北沙漠東縈西帶皆臨大海漢

祖龍與革秦之弊分內史為三部更置郡國二十有三郡桂陽江夏豫章河內魏

定襄泰山汝南淮陽千乘東萊燕國清河信都常山中山渤海廣漢涿郡合二

十三也三內史者河上渭南中地也地理志曰高祖增二十六武帝改河上渭

南中地以為為京北馮文增厥九廣平城陽淄川濟南膠西膠東河景加其四濟

翊扶風是為三輔也武帝開越攘胡初置十七南海蒼梧鬱林合浦交趾九真日

宣改濟北曰東平武帝開越攘胡初置十七南海蒼梧鬱林合浦交趾九真日

河越嶠沉黎汶山犍為益州六郡西拓土分疆又增十四弘農臨淮西南夷置郡

置武都郡又分立零陵郡合十七郡酒泉陳留安定天水

玄菟樂浪廣陵昭帝少事又增其一金城至平帝元始二年凡新置郡國七十

有一與秦四十合一百一十有一改雍曰涼改梁曰益又置徐州復夏舊號南

置交趾北有朔方凡為十三部涼益荆揚青豫兗徐幽并冀十一光武投戈之

歲在彫耗之辰郡國蕭條并省者八城陽淄川高密膠東六安真定泗水廣陽建武十一年省州牧

復為刺史員十三人各掌一州明帝置一永昌章帝置二任城和順改作其名

有九和置濟北廣陽順改淮陽為陳改楚為彭城濟東為東平臨淮為下邳千乘為樂安信都為安平天水為漢陽省朔方刺史合之

於司隸凡十三部其與西漢不同者司隸校尉并郡而郡國百有八焉省前漢八分置五改舊名

七因舊九十六桓靈頗增於前復置六郡桓高陽高涼博陵靈南安鄆陽廬陵魏武定霸三方鼎

立生靈版蕩關洛荒蕪所置者十二新興樂平西平略陽陰平帶方譙樂陵章武南鄉襄陽所省者七

上郡朔方五原雲中定襄漁陽廬江朝歌陽平弋陽魏興新城義陽安豐明及少帝增二明上庸也得

漢郡者五十四焉蜀先主於漢建安之間初置郡九巴東巴西梓潼江陽汶後山漢嘉朱提宕渠涪陵

主增二雲南興古得漢郡者十有一焉吳主大皇帝初置郡五臨賀武昌珠崖新安廬陵南部少帝

景帝各四少臨川臨海衡陽湘東景天門建安建平合浦北部歸命侯亦置十有二郡始安始興邵陵安成新昌武平九德

吳興東陽桂都崇陽上洛頓邱臨淮東莞襄城汝陰長廣寧昌黎新野隨得漢郡者十有八焉晉武帝太康元年既平孫氏凡增置郡國二

十有三崇陽上洛頓邱臨淮東莞襄城汝陰長廣寧昌黎新野隨省司隸置

司州別立梁秦寧平四州仍吳之廣州凡十九州司冀兗豫荆徐揚青幽平并雍涼秦梁益寧交廣州郡

國一百七十三仍吳所置二十五仍蜀新置十一仍魏所置二十一仍漢舊九十三置二十三以爲冠帶之國盡有殷

周之土若乃敦龐於天地之始昭晰於犧農之世用長黎元未爭疆場而玉環
楛矢夷裘風駕南翬表貺東風入律光乎上德奚遠弗臻然則星象麗天山河
紀地端掖裁其弘敞嶠函判其都邑仰觀俯察萬物攸歸是以洛汜咸陽宛然
秦漢晉濱河西同知堯禹于茲新邑宅是鎬京五尺童子皆能口誦者史官弗
之書也昔庖犧氏生于成紀而爲天子都於陳神農氏都陳而別營于曲阜黃
帝生於壽丘而都於涿鹿少昊始自窮桑而遷都曲阜顓頊始自窮桑而徙邑
商丘高辛既號建都于亳孫卿子曰不登高山不知天之高不臨深谿不知地
之厚也大哉坤象萬物資生載崑華而不墜傾河海而寧泄考卜惟王乘飛駐
軫睨崑山而鑄勒覽曾城以爲翫時逢稽浸道接陵夷平王東遷星離豆剖當
塗馭寓瓜分鼎立世祖武皇帝接千祀之餘當八堯之禪先王桑梓罄宇來歸
斯固可得而言者矣惠皇不虞中州盡棄永嘉南度綸行建鄴九分天下而有

二焉

昔大禹觀於濁河而受綠字寰瀛之內可得而言也天有七星地有七表天有四維地有四瀆八紘之外名爲八極地不足東南天不足西北八極之廣東西二億三萬一千三百里南北二億三萬一千三百里自地至天半八極之數自下亦如之昔黃帝令豎亥步自東極至于西極五億十萬九千八百八步史臣按凡周天積百七萬九百一十三里徑三十五萬六千九百七十里所謂南北爲經東西爲緯天有十二次日月之所躔地有十二辰王侯之所國也或因生得姓因功命土祁酉燕齊在乎茲域昔黃帝旁行天下方制萬里得百里之國萬區則周易所謂首出庶物萬國咸寧者也昔在帝堯叶和萬邦制八家爲鄰三鄰爲朋三朋爲里五里爲邑十邑爲都十都爲師州十有二師焉夏后氏東漸于海西被于流沙南浮于江而朔南暨聲教窮豎亥所步莫不率俾會羣臣於塗山執玉帛者萬國於是九州之內作爲五服天子之國內五百里甸服百里賦納總二百里納銓三百里納秸服四百里粟五百里米甸服外五百里侯服百里采二百里任三百里侯服外五百里綏服三百里揆文教二百里奮

武衛綏服外五百里要服三百里夷二百里蔡要服外五百里荒服三百里蠻二百里流訖于四海弼成五服五服至于五千里夏德中微遇有窮之亂少康中興不失舊物自孔甲之後以至於桀諸侯相兼其能存者三千餘國方於塗山十損其七矣成湯敗桀於焦遷鼎于亳伊摯仲虺之徒大明憲典王者之制爵祿公侯伯子男凡五等天子之田方千里公侯田方百里伯七十里子男五十里不能五十里者不達於天子附於諸侯曰附庸凡四海之內九州州方千里州建百里之國三十七十里之國六十五十里之國百有二十凡二百一十國名山大澤不以封其餘以爲附庸閒田八州州二百一十國天子之縣內百里之國九七十里之國二十有一五十里之國六十有三凡九十三國名山大澤不以班其餘以祿士以爲閒田凡九州千七百七十三國天子之元士諸侯之附庸不與天子百里之內以供官千里之內以爲御千里之外設方伯五國以爲屬屬有長十國以爲連連有帥三十國以爲卒卒有正二百一十國以爲州州有伯八州八伯五十六正百六十八帥三百三十六長八伯各以其屬屬

於天子之老二人分天下爲左右曰二伯千里之內曰甸千里之外曰采曰流
天子使其大夫爲三監監於方伯之國國三人天子之縣內諸侯祿也外諸侯
嗣也

武王歸豐監於二代設爵惟五分土惟三封同姓五十餘國周公康叔建于魯
衛各數百里太公封於齊表東海者也凡一千八百國布列於五千里內而太
昊黃帝之後唐虞侯伯猶存大司徒以諸公之地封疆方五百里其食者半諸
侯之地方四百里其食者三之一諸伯之地方三百里其食者三之一諸子之
地方二百里其食者四之一諸男之地方百里其食者四之一不易之地家百
畝一易之地家二百畝再易之地家三百畝五家爲比使之相保五比爲閭使
之相受四閭爲族使之相葬五族爲黨使之相救五黨爲州使之相調五州爲
鄉使之相賓小司徒以五人爲伍五伍爲兩四兩爲卒五卒爲旅五旅爲師五
師爲軍以起軍旅以作田役以比追胥以令貢賦乃經土地而井牧其田野九
夫爲井四井爲邑四邑爲丘四丘爲甸四甸爲縣四縣爲都遺人則十里有廬

廬有飲食三十里有宿宿有路室路室有委五十里有市市有候候有館館有

積遂人則五家為鄰五鄰為里四里為鄴五鄴為鄙五鄙為縣五縣為遂大司

馬以九畿之籍施邦國之政方千里曰國畿其外方五百里曰侯畿又其外方

五百里曰甸畿又其外方五百里曰男畿又其外方五百里曰采畿又其外方

五百里曰衛畿又其外方五百里曰蠻畿又其外方五百里曰夷畿又其外方

五百里曰鎮畿又其外方五百里曰藩畿畿田限也自王城以外面五于時治

致太平政稱刑措民口千三百七十一萬四千九百三十三蓋周之盛者也其

衰也則禮樂征伐出自諸侯彊吞弱而衆暴寡春秋之初尚有千二百國迄獲

麟之末二百四十二年弑君三十六亡國五十二諸侯奔走不得保其社稷者

不可勝數而見於春秋經傳者百有七十國焉百三十九知其所居魯邾鄭宋

莒齊陳杞蔡邢鄆晉薛許鄧秦曹楚隨黃梁虞鄭小邾徐燕鄆麋舒庸邾萊吳

越有窮三苗瓜州有虞東虢共宿申夷向南燕滕凡戴息郟魏淳于穀巴州

蓼羅賴牟葛譚蕭遂滑權鄆霍耿江冀弦道柏微鄭厲項密任須句顯與頓管

雍畢豐邾應蔣茅胙夔介焦沈六巢根牟唐黎郇瑕寒有鬲斟灌斟尋過有過

戈偃陽邾鑄豕韋唐杜楊幽郟觀扈邳胡黎大庭三十一國盡亡其處祭極荀

總其盟會陵夷至于戰國遂有七王韓魏趙燕齊秦楚又有宋衛中山不斷如綫如三

晉篡奪亦稱孤也司馬法廣陳三代曰古者六尺為步步百為畝畝百為夫夫

三為屋屋三為井井方一里是為九夫八家共之一夫一婦受私田百畝公田

十畝是為八百八十畝餘二十畝為廬舍出入相友守望相助疾病相救民受

田上田夫百畝中田夫二百畝下田夫三百畝歲受耕之爰自其處其家衆男

為餘夫亦以口受田如此士工商家受田五口乃當農夫一口有賦有稅稅謂

公田什一及工商衡虞之入也賦供車馬甲兵士從之役民年二十受田六十

歸田種穀必雜五種以備災旱田中不得有樹以妨五穀環廬種桑柘菜茹有

畦瓜瓠果麻植於疆場雞狗豕無失其時閭有序鄉有庠序以明教庠以行

禮司馬之法官設六軍之衆因井田而制軍令地方一里為井井十為通通十

為成成方十里成十為終終十為同同方百里同十為封封十為畿畿方千里

故井四為邑邑四為丘丘十六井有戎馬一匹牛三頭四丘為甸甸六十四井

也有戎馬四匹兵車一乘牛十二頭甲士三人卒七十二人是謂乘車之制一同百里提封萬井除山川坑岸城池邑居園圍街路三千六百井定出賦六千四百井戎馬四百匹兵車百乘此卿大夫采地之大者也是謂百乘之家一封三百六十六里提封十萬井定出賦六萬四千井戎馬四千匹兵車千乘此謂諸侯之大者也謂之千乘之國天子畿內方千里提封百萬井定出賦六十四萬井戎馬四萬匹兵車萬乘戎卒七十二萬人故天子稱萬乘之主焉秦始皇既得志於天下訪周之敗以爲處士橫議諸侯尋戈四夷交侵以弱見奪於是削去五等焉

漢興創艾亡秦孤立而敗於是割裂封疆立爵二等功臣侯者百有餘邑于時民懼秦項戶口彫弊大侯不過萬家小者五六百戶而尊王子弟大啓九國古者有分土而無分民若乃大者跨州連郡小則十有餘城以戶口爲差降略封疆之遠近所謂分民自漢始也起鴈門以東盡遼陽爲燕代常山以南太行左轉渡河濟漸于海爲齊趙潁泗以注奄有龜蒙爲梁楚東帶江湖薄會稽爲荆

吳北界淮瀕略廬衡爲淮南波漢之陽巨九疑爲長沙諸侯比境周匝三垂外
接胡越天子自有三河東郡潁川南陽自江陵以西至巴蜀北至雲中西至隴
西與京師內史凡十五郡文帝采賈生之議分齊趙景帝用鼂錯之計削吳楚
武帝施主父之冊下推恩之令使諸侯王得分戶邑以封子弟不行黜陟而藩
國自析自此以來齊分爲七趙分爲六梁分爲五淮南分爲三皇子始立者大
國不過十餘城長沙燕代雖有舊名皆亡南北邊矣自文景與民休息至平帝
元始二年民戶千二百二十三萬三千六十二口五千九百五十九萬四千九
百七十八其地東西九千三百二里南北萬三千三百六十八里大率十里一
亭亭有長十亭一鄉鄉有三老有秩嗇夫游徼各一人縣大率方百里民稠則
減稀則曠鄉亭亦如之皆秦制也

光武中興不踰前制東海王疆以去就有禮故優以大封兼食魯郡二十九縣
其餘稱爲寵錫者兼一郡而已至桓帝永壽三年戶千六十七萬七千九百六
十口五千六百四十八萬六千八百五十六斯亦戶口之滋殖者也

獻帝建安元年拜曹操爲鎮東將軍封費亭侯

魏文帝黃初三年初制封王之庶子爲鄉公嗣王之庶子爲亭侯公侯之庶子爲亭伯

劉備章武元年亦以郡國封建諸王或遙採嘉名不由檢土地所出其戶二十萬男女口九十萬

孫權赤烏五年亦取中州嘉號封建諸王其戶五十二萬三千男女口二百四十萬

晉文帝爲晉王命裴秀等建立五等之制惟安平郡公季邑萬戶制度如魏諸王其餘縣公邑千八百戶地方七十五里大國侯邑千六百戶地方七十里次國侯邑千四百戶地方六十五里大國伯邑千二百戶地方六十里次國伯邑千戶地方五十五里大國子邑八百戶地方五十里次國子邑六百戶地方四十五里男邑四百戶地方四十里

武帝泰始元年封諸王以郡爲國邑二萬戶爲大國置上中下三軍兵五千人

邑萬戶爲次國置上軍下軍兵三千人五千戶爲小國置一軍兵千五百人王不之國官於京師罷五等之制公侯邑萬戶以上爲大國五千戶以上爲次國不滿五千戶爲小國太康元年平吳大凡戶二百四十五萬九千八百四十口一千六百一十六萬三千八百六十三而江左諸國並三分食一元帝渡江太興元年始制九分食一

司州按禹貢豫州之地及漢武帝初置司隸校尉所部三輔三河諸郡其界西得雍州之京兆馮翊扶風三郡北得冀州之河東河內二郡東得豫州之弘農河南二郡凡七位望降于牧伯銀印青綬及光武都洛陽司隸所部與前漢不異魏氏受禪卽都漢宮司隸所部河南河東河內弘農并冀州之平陽合五郡置司州晉仍居魏都乃以三輔還屬雍州分河南立滎陽分雍州之京兆立上洛廢東郡立頓丘遂定名司州以司隸校尉統之州統郡一十二縣一百戶四十七萬五千七百

河南郡

漢置統縣十二戶一十一萬四千四百置尹

洛陽置尉五部三市東西七里南北九里東有建春東陽清明三門南有開陽

百官列城南尹也河南周東都王鞏戰國時有東西周桓公孫惠公於鞏號東周故河

陰新安函谷關成皋之武牢緱氏邑有劉聚周大夫劉子陽城是為鄂阪關此邑

箕山許由墓在焉新城戎蠻子之國陸渾故蠻子國楚莊梁戰國時謂為南

陽翟

滎陽郡泰始二年置統縣八戶三萬四千

滎陽地名秦京鄭太叔密畿內卷良擊秦始皇處陽武苑陵中牟六國時趙

獻侯開封北或曰蓬澤

弘農郡漢置統縣六戶一萬四千

弘農本函谷關漢武湖武更名湖陝東西之主宜陽黽池華陰華止在縣

南

上洛郡泰始二年分京北南郡置統縣三戶萬七千

上洛嶢關在商鞅邑盧氏熊耳山在東

平陽郡故屬河東魏分立統

平陽舊都楊侯國楊侯國端氏韓魏趙既為諸侯也永安故霍伯國蒲子狐讎襄

陵相國絳邑晉武公自濩澤析城山臨汾相國北屈壺口山在東南皮氏故耿

河東郡秦置統縣九百

安邑舊都聞喜故曲沃晉武公垣北沈水所出汾陽公相大陽吳山在西周武

後於此猗氏古猗有鹽蒲坂有歷山舜所耕也雷首山河北

汲郡秦始二年置統縣

汲有銅朝歌紂所共故國北山林慮獲嘉故汲新中鄉漢武帝行脩武晉所

陽秦改

河內郡漢置統縣九

野王太行山故晉懷平皋邢侯自襄河陽沁水軹故周山陽温故

也蘇忿

廣平郡魏置統縣十五百

晉

書

卷十四

地理志上

八中華書局聚

廣平 邯鄲秦置郡 易陽 武安 涉 襄國故邢侯國都 南和 任 曲梁 列人

肥鄉 臨水 廣年侯相 斥漳 平恩

陽平郡魏置統縣七戶五萬一千

元城漢元后生邑 館陶 清泉 發干 東武陽 陽平 樂平

魏郡漢置統縣八戶四萬七百

鄴魏武受封居此 長樂 魏 斥丘 安陽 蕩陰 內黃黃池在西黎陽故黎侯國

頓丘郡秦始二年置統縣四戶六千三百

頓丘 繁陽 陰安 衛

永嘉之後司州淪沒劉聰聰以洛陽為荊州及石勒復以為司州石季龍又分

司州之河南河東弘農滎陽兗州之陳留東燕為洛州元帝渡江亦僑置司州

於徐非本所也後以弘農人流寓尋陽者僑立為弘農郡又以河東人南寓者

於漢武陵郡孱陵縣界上明地僑立河東郡統安邑聞喜永安臨汾弘農譙松

滋大戚八縣並寄居焉永和五年桓温入洛復置河南郡屬司州

○兗州按禹貢濟河之地舜置十二牧則其一也周禮河東曰兗州春秋元命包云五星流為兗州兗瑞也信也又云蓋取兗水以名焉漢武帝置十三州以舊名為兗州自此不改州統郡國八縣五十六戶八萬三千三百

陳留國 漢置統縣十戶三萬魏武帝封

小黃 浚儀有洪溝漢高祖項羽欲分處

封丘

酸棗 鳥巢地在東南

濟陽

長垣 故匡城

孔雍丘

尉氏 襄邑 外黃

濮陽國 故屬東郡晉初分東郡置統縣四戶二萬一千

濮陽 古昆吾國師延為紂作靡靡之樂既而投此水公國相

廩丘 公國相有羊角城

白馬 有瓠子堤

鄆城 公國相

濟陽郡 漢置統縣九戶七千六百

定陶 漢高帝封彭越為梁王都此

乘氏 故侯國

句陽

離狐

宛句

己氏

成武 有楚丘亭

單父

故侯城陽 舜所漁堯冢在西

高平國 故屬梁國晉初分山陽置統縣七戶三千八百

昌邑 侯相有甲父亭

鉅野 魯獲麟所

方與

金鄉

陸湖

高平 侯國

南平陽 侯國有漆亭

任城國 漢置統縣三 任城國 古任 亢父 樊

東平國 漢置統縣七 戶六千四百

須昌 壽張 有蚩尤祠 范 無鹽 富城 東平陸 剛平

濟北國 漢置統縣五 戶三千五百

盧扁 鵠所生 臨邑 東阿 穀城 有烏蛇丘 有下灌亭

泰山郡 漢置統縣十一 戶九千三百

奉高 西南有明堂 博 有龜山 贏 南武城 梁父 侯國有菟裘聚 山在 在東北 新泰 故曰平陽 南武

陽 有顓與城 萊蕪 有原山 東牟 故牟國 鉅平 有陽關亭

惠帝之末兗州闔境淪沒石勒後石季龍改陳留郡為建昌郡屬洛州是時遺

黎南渡元帝僑置兗州寄居京口明帝以郟鑿為刺史寄居廣陵置濮陽濟陰

高平泰山等郡後改為南兗州或還江南或居盱眙或居山陽後始割地為境

常居廣陵南與京口對岸咸康四年於北譙界立陳留郡安帝分廣陵郡之建

陵臨江如皋甯海蒲濤五縣置山陽郡屬南兗州

○豫州按禹貢爲荊河之地周禮河南曰豫州豫者舒也言稟中和之氣性理安舒也春秋元命包云鉤鈐星別爲豫州地界西自華山東至于淮北自濟南界荆山秦兼天下以爲三川河東南陽潁川碭泗水薛七郡漢改三川爲河南郡武帝置十三州豫州舊名不改以河南河東二郡屬司隸又以南陽屬荊州先是改泗水曰沛郡改碭郡曰梁改薛曰魯分梁沛立汝南郡分潁川立淮陽郡後漢章帝改淮陽曰陳郡魏武分沛立譙郡魏文分汝南立弋陽郡及武帝受命又分潁川立襄城郡分汝南立汝陰郡合陳郡於梁國州統郡國十縣八十五戶十一萬六千七百九十六

潁川郡 秦置統縣九戶一萬八千三百

許昌 漢獻帝都許魏禪徙都洛陽許官室武庫存焉改爲許昌

長社 潁陰 臨潁 公國 鄆 邵陵 公國 鄆

潁相 公國 新汲 長平

汝南郡 漢置統縣十五戶一萬一千五百

新息 南安陽 安成 侯 慎陽 北宜春 朗陵 陽安 故江國有江亭 上蔡 平輿

故沈亭國 定穎 濯陽 南頓 汝陽 吳房子國 西平故栢國有龍泉水可用淬刀劍

襄城郡七戶一萬八千 泰始二年置統縣

襄城侯相有西 繁昌魏文受此 定陵侯相 父城侯相 昆陽國相 舞陽宣帝始封此邑

汝陰郡魏置郡後廢 泰始二年復 統縣八戶八千五百

汝陰故胡慎 故楚 原鹿 固始 銅陽 新蔡 宋侯相 襄信

梁國漢置統縣十二 戶一萬三千

睢陽春秋時 蒙 虞 下邑有碭山山 寧陵故葛伯國 穀熟 陳 項 長平 陽

夏 武平 苦東有賴鄉祠

沛國漢置統縣九 戶五千九十六

相 沛漢高祖處 豐 竺邑 符離 杼秋 洩 虹 蕭

譙郡魏置統縣 七戶一千

譙 城父 鄆 山桑 龍亢 蘄 銓

魯郡漢置統縣七 戶二千五百

魯曲阜之地魯侯伯禽所居汶陽 卞鄒山有繹番故小邾國薛奚仲所封公丘

弋陽郡魏置統縣七百一萬六千七百

西陽故弦子國軼 蕪春 邾 西陵 期思 弋陽 十昌 琅 高

安豐郡魏置統縣五百一十

安風 零婁 安豐侯相蓼 松滋侯相 夫府 龜泉 謝盛

惠帝分汝陰立新蔡分梁國立陳郡分汝南立南頓永嘉之亂豫州淪沒石氏蕪湖時淮南入北乃分丹陽僑立淮南郡居于湖又以舊當塗縣流人渡江僑立為縣并淮南廬江安豐並屬豫州寧康元年移鎮姑孰孝武改蕪春縣為蕪陽縣因新蔡縣人於漢九江王黔布舊城置南新蔡郡屬南豫州又於漢廬江郡之南部置晉熙郡

○冀州按禹貢周禮並為河內之地舜置十二牧則其一也春秋元命包云昴畢散為冀州分為趙國其地有險有易帝王所都亂則冀安弱則冀疆荒則冀

豐彛以冀州南北闊大分衛以西為并州燕以北為幽州周人因焉及漢武置十三州以其地依舊名為冀州歷後漢至晉不改州統郡國十三縣八十三戶

三十一萬六千

趙國 漢置統縣九戶四萬二千

房子 元氏 平棘 高邑 公國相 中丘 柏人 平鄉 下曲陽 故鼓子國 鄒

鉅鹿國 秦置統縣二戶一萬四千

慶陶 鉅鹿

安平國 漢置統縣八戶二萬一千

信都 下博 武邑 武遂 觀津 侯相 扶柳 廣宗 侯相 經

平原國 漢置統縣九戶三萬一千

平原 高唐 荏平 博平 聊城 安德 西平昌 般 鬲

樂陵國 漢置統縣五戶三萬三千

厭次 陽信 灤沃 新樂 樂陵 有都尉居

渤海郡 漢置統縣十戶四萬

南皮 東光 浮陽 饒安 高城 重合 東安陵 脩 廣川 侯相阜城

章武國 泰始元年置統縣四戶一萬三千

東平舒 文安 章武 東州

河間國 漢置統縣六戶二萬七千

樂城 侯相 武垣 鄭 易城 中水 成平

高陽國 泰始元年置統縣四戶七千

博陸 高陽 北新城 侯相 蠡吾

博陵國 漢置統縣四戶一萬

安平 饒陽 南深澤 安國

清河國 漢置統縣六戶二萬二千

清河 東武城 繹幕 侯相 貝丘 靈 鄒

中山國 漢置統縣八戶三萬二千

晉

書

卷十四

地理志上

十三中華書局聚

盧奴 魏昌 新市 安喜 蒲陰 望都 唐 北平

常山郡 漢置統縣八戶二萬四千

真定 石邑 井陘 上曲陽 恆山在縣西北有坂號飛狐口 蒲吾 南行唐 靈壽 九門

相侯

惠帝之後冀州淪沒於石勒勒以太興二年僭號於襄國稱趙後為慕容儁所滅慕容氏又為苻堅所滅孝武太元八年堅敗其地入慕容垂垂僭號於中山是為後燕後燕卒滅於魏

○幽州按禹貢冀州之域舜置十二牧則其一也周禮東北曰幽州春秋元命包云箕星散為幽州分為燕國言北方太陰故以幽冥為號武王定殷封召公於燕其後與六國俱稱王及秦滅燕以為漁陽上谷右北平遼西遼東五郡漢高帝分上谷置涿郡武帝置十三州幽州依舊名不改其後開東邊置玄菟樂浪等郡亦皆屬焉元鳳元年改燕曰廣陽郡幽州所部凡九郡至晉不改幽州統郡國七縣三十四戶五萬九千二百

范陽國 漢置涿郡魏文更名范陽郡武帝置國封宣帝第子綏為王統縣八戶一萬一千

涿 良鄉 方城 長鄉 道 故安 范陽 容城 侯相

燕國 漢置孝昭改為廣陽郡統縣十戶二萬九千

薊 安次 侯相 昌平 軍都 有關 廣陽 潞 安國 國相蜀主劉禪封此縣公 泉州 侯相 雍奴 狐

北平郡 秦置統縣四戶五千

徐無 土垠 俊靡 無終

上谷郡 秦置郡在谷之上頭故因名焉統縣二戶四千七十

沮陽 居庸

廣寧郡 故屬上谷太康中置郡都尉居統縣三戶三千九百三十

下洛 潘 涿鹿

代郡 秦置統縣四戶三千四百

代 廣昌 平舒 富城

晉

書

卷十四

地理志上

十三 中華書局聚

遼西郡 秦置統縣三戶二千八百

陽樂 肥如 海陽

惠帝之後幽州沒於石勒及穆帝永和五年慕容儁僭號於薊是為前燕七年儁移都於鄴儁死子暉為苻堅所滅堅敗地復入慕容垂是為後燕垂死寶遷于和龍

○平州按禹貢冀州之域於周為幽州界漢屬右北平郡後漢末公孫度自號平州牧及其子康康子文懿並擅據遼東東夷九種皆服事焉魏置東夷校尉居襄平而分遼東昌黎玄菟帶方樂浪五郡為平州後還合為幽州及文懿滅後有護東夷校尉居襄平咸寧二年十月分昌黎遼東玄菟帶方樂浪等郡國五置平州統縣二十六戶一萬八千一百

昌黎郡 漢屬遼東屬國都尉魏置郡統縣二戶九百

昌黎 賓徒

遼東國 秦立為郡漢光武以遼東等屬青州後還幽州統縣八戶五千四百

襄平東夷校尉所居 汶 居就 樂就 安市 西安平 新昌 力城

樂浪郡漢置統縣六百 子 高 陸 豐 海 陸

朝鮮周封箕子地 屯有 渾彌 遂城秦築長城之所起 鏤方 駟望

玄菟郡漢置統縣三百 戶三千二百

高句麗 望平 高顯 大 平 京

帶方郡公孫度置統縣七百 戶四千九百

帶方 列口 南新 長岑 提奚 含資 海冥

平州初置以慕容廆為刺史遂屬永嘉之亂廆為眾所推及其孫儁移都于薊其後慕容垂子寶又遷于和龍自幽州至於廬溥鎮以南地入於魏慕容熙以幽州刺史鎮令支青州刺史鎮新城并州刺史鎮凡城營州刺史鎮宿軍冀州刺史鎮肥如高雲以幽冀二州牧鎮肥如并州刺史鎮白狼後為馮跋所篡跋僭號於和龍是為後燕卒滅於魏

○并州按禹貢蓋冀州之域舜置十二牧則其一也周禮正北曰并州其鎮曰

恆山春秋元命包云營室流為并州分為衛國州不以衛水為號又不以恆山為稱而云并者蓋以其在兩谷之間也漢武帝置十三州并州依舊名不改統上黨太原雲中上郡鴈門代郡定襄五原西河朔方十郡又別置朔方刺史後漢建武十一年省朔方入并州靈帝末羌胡大擾定襄雲中五原朔方上郡等五郡並流徙分散建安十八年省入冀州二十年始集塞下荒地立新興郡後又分上黨立樂平郡魏黃初元年復置并州自陘嶺以北并棄之至晉因而不改并州統郡國六縣四十五戶五萬九千二百

太原國 秦置統縣十三戶一萬四千

晉陽侯相 陽曲 榆次 于離 孟 狼孟 陽邑 大陵 祁 平陶 京陵

中都 鄆

上黨郡 秦置統縣十戶一萬三千

潞 屯留 壺關 長子 泫氏 高都 銅鞮 涅 襄垣 武鄉

西河國 漢置統縣四戶六千三百

離石 隰城 中陽 介休

樂平郡 秦始中置統縣五戶四千三百

沾 上艾 壽陽 韓陽 樂平

鴈門郡 秦置統縣八戶一萬二千六百

廣武 崞 涇陶 平城 蓏人 繁峙 原平 馬邑

新興郡 魏置統縣五戶九千

九原 定襄 雲中 廣牧 晉昌

惠帝改新興為晉昌郡及永興元年劉元海僭號於平陽稱漢於是并州之地皆為元海所有元海乃以雍州刺史鎮平陽幽州刺史鎮離石及劉聰攻陷洛

陽置左右司隸各領戶二十餘萬萬戶置一內史凡內史四十三人單于左右

輔各主六夷又置殷衛東梁西河陽北兗五州以懷安新附劉曜徙都長安其

平陽以東地入石勒勒平朔方又置朔州自惠懷之間離石縣荒廢勒於其處

置永石郡又別置武鄉郡及苻堅姚興赫連勃勃并州並徙置河東又姚興以

河東爲并冀二州云

○雍州按禹貢黑水西河之地舜置十二牧則其一也以其四山之地故以雍名焉亦謂西北之位陽所不及陰陽氣雍闕也周禮西曰雍州蓋并禹梁州之地周自武王剋殷都於鄴鎬雍州爲王畿及平王東遷洛邑以岐鄴之地賜秦襄公則爲秦地累世都之至始皇遂平六國秦滅漢又都之及武帝置十三州其地以西偏爲涼州其餘並屬司隸不統於州後漢光武都洛陽關中復置雍州後罷復置司隸校尉統三輔如舊獻帝時又置雍州自三輔距西域皆屬焉魏文帝卽位分河西爲涼州分隴右爲秦州改京兆尹爲太守馮翊扶風各除左右仍以三輔屬司隸晉初於長安置雍州統郡國七縣三十九戶九萬九千五百

京兆郡漢置統縣九戶四萬

長安 杜陵 霸成 藍田 高陸 萬年故櫟陽縣 新豐 陰般 鄭周宣王弟鄭桓公邑

馮翊郡漢置名左馮翊統縣八戶七千七百

臨晉故大荔秦獲之更名有下邽秦武公伐邽戎置重泉頻陽秦厲公置在

栗邑 蓮芍 郟陽 夏陽故名少梁山在西北

扶風郡漢武帝以爲主爵都尉太初中更

池陽漢惠帝置廊首受渭雍侯相有五時太昊所

汧吳山在古陳倉 美陽岐山在西北

安定郡漢置統縣七百

臨涇 朝那 烏氏 都盧 鶉觚 陰密殷時西川

北地郡秦置統縣二百

泥陽 富平

始平郡秦始皇三年置統縣五千一萬八千

槐里秦曰廢丘漢高帝始平 武功太一山在東古鄂古國夏蒯城

新平郡漢置統縣二千七百

漆水在西汾邑

晉

書

卷十四

地理志上

中華書局聚

惠帝卽位改扶風國爲秦國徙都建興之後雍州沒於劉聰及劉曜徙都長安改號曰趙以秦涼二州牧鎮上邽朔州牧鎮高平幽州刺史鎮北地并州牧鎮蒲坂石勒剋長安復置雍州石氏旣敗苻健僭據關中又都長安是爲前秦於是乃於雍州置司隸校尉以豫州刺史鎮許昌秦州刺史鎮上邽荊州刺史鎮豐陽洛州刺史鎮宜陽并州刺史鎮蒲坂苻堅時分司隸爲雍州分京北爲咸陽郡洛州刺史鎮陝城滅燕之後分幽州置平州鎮龍城幽州刺史鎮薊城河州刺史鎮枹罕并州刺史鎮晉陽豫州刺史鎮洛陽兗州刺史鎮倉垣雍州刺史鎮蒲坂於是移洛州居豐陽以許昌置東豫州以荊州刺史鎮襄陽徐州刺史鎮彭城旣而姚萇滅苻氏是爲後秦及萇子興剋洛陽以并冀二州牧鎮蒲坂豫州牧鎮洛陽兗州刺史鎮倉垣分司隸領北五郡置雍州刺史鎮安定及姚泓爲劉裕所滅其地尋入赫連勃勃勃勃僭號於統萬是爲夏置幽州牧於大城又平劉義真於長安遣子瓚鎮焉號曰南臺以朔州牧鎮三城秦州刺史鎮杏城雍州刺史鎮陰密并州刺史鎮蒲坂梁州牧鎮安定北秦州刺史鎮武

功豫州牧鎮李閏荊州刺史鎮陝其州郡之名並不可知也然自元帝渡江所置州亦皆遙領初以魏該爲雍州刺史鎮鄠城尋省僑立始平郡寄居武當城有秦國流人至江南改堂邑爲秦郡僑立尉氏縣屬焉康帝時庾翼爲荊州刺史遷鎮襄陽其後秦雍流人多南出樊沔孝武始於襄陽僑立雍州仍立京北始平扶風河南廣平義成北河南七郡並屬襄陽襄陽故屬荊州

○涼州按禹貢雍州之西界周衰其地爲狄秦興美陽甘泉宮本匈奴鑄金人祭天之處匈奴旣失甘泉又使休屠渾邪王等居涼州之地二王後以地降漢漢置張掖酒泉敦煌武威郡其後又置金城郡謂之河西五郡漢改周之雍州爲涼州蓋以地處西方常寒涼也地勢西北邪出在南山之間南隔西羌西通西域于時號爲斷匈奴右臂獻帝時涼州數有亂河西五郡去州隔遠於是乃別以爲雍州末又依古典定九州乃合關右以爲雍州魏時復分以爲涼州刺史領戊己校尉護西域如漢故事至晉不改統郡八縣四十六戶三萬七百

金城郡

漢置統縣五戶二千

晉

書

卷十四

地理志上

十七

中華書局聚

榆中 允街 金城 白土 浩疊

西平郡 漢置統縣四戶四千

西都 臨羌 長寧 安夷

武威郡 漢置統縣七戶五千九百

姑臧 宣威 揖次 昌松 顯美 驪軒 番禾

張掖郡 漢置統縣三戶三千七百

永平 臨澤 漢昭武縣避景帝諱改也 屋蘭 漢因屋蘭名焉

西郡 漢置統縣五戶一千九百

日勒 刪丹 仙提 萬歲 蘭池 一云蘭絕池

酒泉郡 漢置統縣九戶四千四百

福祿 會水 安彌 駢馬 樂涇 表氏 延壽 玉門 沙頭

敦煌郡 漢置統縣十二戶六千三百

昌蒲 敦煌 龍勒 陽關 效穀 廣至 宜禾 宜安 深泉 伊吾

新鄉 乾齊

西海郡 故屬張掖漢獻帝興平二年武威太守張雅請置統縣一戶二千五百

居延 澤在東南尚書所謂流沙也

元康五年惠帝分敦煌郡之宜禾伊吾宜安深泉廣至等五縣分酒泉之沙頭

縣又別立會稽新鄉凡八縣為晉昌郡永寧中張軌為涼州刺史鎮武威上表

請合秦雍流移人於姑臧西北置武興郡統武興大城烏支襄武晏然新鄯平

狄司監等縣又分西平界置晉興郡統晉興枹罕永固臨津臨鄯廣昌大夏遂

與罕唐左南等縣是時中原淪沒元帝徙居江左軌乃控據河西稱晉正朔是

為前涼及張實分金城之令居枝楊二縣又立永登縣合三縣立廣武郡張茂

分武興金城西平安故為定州張駿分武威武興西平張掖酒泉建康西郡湟

河晉興須武合十一郡為涼州興晉金城武始南安永晉大夏武成漢中為河

州敦煌晉昌西域都護張茂以校尉玉門大護軍三郡三營為沙州張駿假涼

州都督攝三州張祚又以敦煌郡為商州永興中置漢陽縣以守牧地張玄靚

改爲祁連郡張天錫又別置臨松郡天錫降於苻氏其地尋爲呂光所據呂光都於姑臧後以郭馨言讖改昌松爲東張掖郡及呂隆降於姚興其地三分武昭王爲西涼建號於敦煌禿髮烏孤爲南涼建號於樂都沮渠蒙遜爲北涼建號於張掖而分據河西五郡

○秦州按禹貢本雍州之域魏始分隴右置焉刺史領護羌校尉中間暫廢及泰始五年又以雍州隴西五郡及涼州之金城梁州之陰平合七郡置秦州鎮冀城太康三年罷秦州并雍州七年復立鎮上邽統郡六縣二十四戶三萬二千一百

隴西郡 秦置統縣四戶三千

襄武 首陽鳥鼠山在東

臨洮 狄道

南安郡 漢置統縣三戶四千三百

源道 新興 中陶

天水郡 漢武置孝明改爲漢陽晉復爲天水統縣六戶八千五百

上邽 冀秦州故居始昌 新陽 顯新漢顯親縣成紀

略陽郡 本名廣魏秦始中更名焉 統縣四戶九千三百二十

臨渭 平襄 略陽 清水

武都郡 漢置統縣 五戶三千

下辯 河池 沮 武都 故道

陰平郡 秦始中置統 縣二戶三千

陰平 平廣

惠帝分隴西之狄道臨洮河關又立洮陽遂平武街始興第五真仇六縣合九縣置狄道郡屬秦州張駿分屬涼州又以狄道縣立武始郡江左分梁為秦寄居梁州又立氏池為北秦州

○梁州按禹貢華陽黑水之地舜置十二牧則其一也梁者言西方金剛之氣疆梁故因名焉周禮職方氏以梁并雍漢不立州名以其地為益州及獻帝初平六年以臨江縣屬永寧郡建安六年劉璋改永寧為巴東郡分巴郡墊江置

巴西郡劉備據蜀又分廣漢之葭萌涪城梓潼白水四縣改葭萌曰漢壽又立漢德縣以為梓潼郡割巴郡之宕渠安漢漢昌三縣置宕渠郡尋省以縣並屬巴西郡泰始三年分益州立梁州於漢中改漢壽為晉壽又分廣漢置新都郡梁州統郡八縣四十四戶七萬六千三百

漢中郡 秦置統縣八戶一萬五千

南鄭 蒲池 褒中 沔陽 成固 西鄉 黃金 興道

梓潼郡 蜀置統縣八戶一萬二千

梓潼 涪城 武連 黃安 漢德 晉壽 劍閣 白水

廣漢郡 漢置統縣三戶五千一百

廣漢 德陽 五城

新都郡 泰始二年置統縣四戶二萬四千五百

雒 什方 緜竹 新都

涪陵郡 蜀置統縣五戶四千二百

漢復 涪陵 漢平 漢葭 萬寧

巴郡 秦置統縣四
戶三千三百

江州 墊江 臨江 枳

巴西郡 蜀置統縣九
戶一萬二千

閬中 西充國 蒼溪 岐恆 南充國 漢昌 宕渠 安漢 平州

巴東郡 漢置統縣三
戶六千五百

魚腹 胸臆 南浦

太康六年九月罷新都郡并廣漢郡惠帝復分巴西置宕渠郡統宕渠漢昌安漢三縣并以新城魏興上庸合四郡以屬梁州尋而梁州郡縣沒于李特永嘉中又分屬楊茂搜其晉人流寓於梁益者仍於二州立南北二陰平郡及桓温平蜀之後以巴漢流人立晉昌郡領長樂安晉延壽安樂安漢寧都新興吉陽東關永安十縣又置益昌晉興二縣屬巴西郡於德陽界東南置遂寧郡又於

晉壽置劍閣縣屬梁州後孝武分梓潼北界立晉壽郡統晉壽白水邵歡興安

四縣梓潼郡徙居梓潼罷劍閣縣又別置南漢中郡分巴西梓潼爲金山郡及安帝時又立新巴汶陽二郡又有北新巴華陽南陰平北陰平四郡其後又立巴渠懷安宋熙水上洛北上洛南宕渠懷漢新興安康等十郡

○益州按禹貢及舜十二牧俱爲梁州之域周合梁於雍則又爲雍州之地春秋元命包云參伐流爲益州益之爲言阨也言其所在之地險阨也亦曰疆壤益大故以名焉始秦惠王滅蜀置郡以張若爲蜀守及始皇置三十六郡蜀郡之名不改漢初有漢中巴蜀高祖六年分蜀置廣漢凡爲四郡武帝開西南夷更置犍爲牂牁越嶲益州四郡凡八郡遂置益州統焉益州蓋始此也及後漢明帝以新附置永昌郡安帝又以諸道置蜀廣漢犍爲三郡屬國都尉及靈帝又以汶江蠶陵廣柔三縣立汶山郡獻帝初平元年劉璋分巴郡立永寧郡建安六年改永寧爲巴東以巴郡爲巴西又立涪陵郡二十一年劉備分巴郡立固陵郡蜀章武元年又改固陵爲巴東郡巴西郡又分廣漢立梓潼郡分犍爲立江陽郡以蜀郡屬國爲漢嘉郡以犍爲屬國爲朱提郡劉禪建興二

年改益州郡爲建寧郡廣漢屬國爲陰平郡分建寧永昌立雲南郡分建寧牂牁立興古郡分廣漢立東廣漢郡魏景元中蜀平省東廣漢郡及武帝泰始二年分益州置梁州以漢中屬焉七年又分益州置寧州益州統郡八縣四十四戶十四萬九千三百

蜀郡

秦置統縣六戶五萬

成都

廣都

繁

江原

臨邛

郫

郫

郫

郫

郫

郫

犍爲郡

漢置統縣五戶一萬

武陽

南安

棘道

資中

牛鞞

汶山郡

漢置統縣八戶一萬六千

文山

升遷

都安

廣陽

興樂

平康

蠡陵

廣柔

漢嘉郡

蜀置統縣四戶一萬三千

漢嘉

徙陽

嚴道

旄牛

江陽郡

蜀置統縣三戶三千一百

晉

書

卷十四

地理志上

三

中華書局聚

江陽 符 漢安

朱提郡 蜀置統縣五戶二千六百

朱提 南廣 漢陽 南秦 堂狼

越巂郡 漢置統縣五百五萬三千四百

會無 邛都 卑水 定犍 臺登

牂牁郡 漢置統縣八戶一千二百

萬壽 且蘭 指談 夜郎 毋劍 并渠 營 平夷

惠帝之後李特僭號於蜀稱漢益州郡縣皆沒于特李雄又分漢嘉蜀二郡立沉黎漢原二郡是時益州郡縣雖沒李氏江左並遙置之桓溫滅蜀其地復為晉有省漢原沉黎而立南陰平晉原寧蜀始寧四郡焉咸安二年益州復沒於苻氏太和八年復為晉有隆安二年又立晉熙遂寧晉寧三郡云

○寧州於漢魏為益州之域泰始七年武帝以益州地廣分益州之建寧與古雲南交州之永昌合四郡為寧州統縣四十五戶八萬二千四百

雲南郡 蜀置統縣九
戶九千二百

雲平 雲南 柝棟 青蛉 姑復 邪龍 檉榆 遂久 永寧

興古郡 蜀置統縣十一
戶六千二百

律高 句町 宛温 漏臥 毋掇 賁古 滕休 鐸封 漢興 進乘

都簷

建寧郡 蜀置統縣十七
戶二萬九千

味 昆澤 存驅 新定 談豪 毋單 同瀨 漏江 牧麻 穀昌 連

然 秦臧 雙栢 俞元 脩雲 冷丘 滇池

永昌郡 漢置統縣八
戶三萬八千

不韋 永壽 比蘇 雍鄉 南涪 雋唐 哀牢 博南

太康三年武帝又廢寧州入益州立南夷校尉以護之太安二年惠帝復置寧

州又分建寧以西七縣別立為益州郡永嘉二年改益州郡曰晉寧分牂牁立

平夷夜郎二郡然是時其地再為李特所有其後李壽分寧州興古永昌雲南

朱提越嵩河陽六郡為漢州咸康四年分牂牁夜郎朱提越嵩四郡置安州八年又罷并寧州以越嵩還屬益州省永昌郡焉

晉書卷十四

六代二五... 晉書卷十四... 咸康四年... 分牂牁夜郎朱提越嵩四郡置安州八年又罷并寧州以越嵩還屬益州省永昌郡焉

晉書卷十四考證

地理志上郡國一百七十三○臣龍官按注總數雖符細計之止得一百七十

一未見漢景所置北海郡又考宋書則此書濟南所領之縣皆彼北海所領而彼濟南所領者皆此書之所無再檢文獻通考却與此書同當是本書有脫誤耳

秦兼天下以爲三川河東南陽潁川碭泗水薛七郡漢改三川爲河南郡武帝置十三州豫州舊名不改以河南河東二郡屬司隸又以南陽屬荊州先是改泗水曰沛郡改碭郡曰梁改薛曰魯○監本自薛七郡三字起至先是二字止共四十二字俱誤作小注今改正

平原國西平昌般○此下監本有放字按宋書有平昌有般有鬲從汲古閣本刪放字

燕國安國注國相蜀主劉禪封此縣公○魏志蜀志俱云封安樂公似宜改國

爲樂

晉書卷十四考證

平賊國運平... ○此下據本府... 平賊國運平... ○此下據本府... 平賊國運平... ○此下據本府...

漢山共四十二... 漢山共四十二... 漢山共四十二...

知國水曰... ○據本府... 知國水曰... ○據本府... 知國水曰... ○據本府...

置十三... 置十三... 置十三...

泰兼天不... 泰兼天不... 泰兼天不...

京第耳

而於南... 而於南... 而於南...

一未及... 一未及... 一未及...

後世亦... 後世亦... 後世亦...

晉書卷十四考證

晉書卷十五

唐 太宗 文 皇 帝 御 撰

志第五

地理下

青州 徐州 揚州 交州 荊州 廣州

○青州按禹貢為海岱之地舜置十二牧則其一也舜以青州越海又分為營州則遼東本為青州矣周禮正東曰青州蓋取土居少陽其色為青故以名也春秋元命包云虛危流為青州漢武帝置十三州因舊名歷後漢至晉不改州統郡國六縣三十七戶五萬三千

齊國

秦置郡漢以為國景帝以為北海郡統縣五戶一萬四千

臨淄

西安有棘里亭

東安平

汝水出東北

廣饒

昌

國樂毅所封

濟南郡

漢置統縣五戶五千或云魏平蜀徙其豪將家於濟河北故改為濟岷郡而太康地理志無此郡名未之詳

平壽古國塞下

密有三石祠

膠東侯即墨山祠祝阿

樂安國

漢置統縣八戶一萬一千

高苑

臨濟有蚩尤祠

博昌有薄姑祠

利益侯相

蓼城侯國

壽光古

灌氏所封國 東朝陽

城陽郡 漢置屬北海自魏至晉分北海 莒 故莒子國 姑幕 古薄姑氏國 諸 淳于 故淳于國

東武 高密 漢改為都 壯武 黔陬 平昌 昌安

東萊國 漢置郡統縣六 掖 侯相 當利 侯相 盧鄉 曲城 黃 有萊山松林萊君祠 輗 侯國有百支萊王祠

長廣郡 咸寧三年置統縣三戶四千五百 不其 侯國 長廣 挺

惠帝元康十年又置平昌郡又分城陽之黔陬壯武淳于昌安高密平昌營陵

安丘大劇臨朐十一縣為高密國自永嘉喪亂青州淪沒石氏東萊人曹嶷為

刺史造廣固城後為石季龍所滅季龍末遼西段龕自號齊王據青州慕容恪

滅趙尅青州苻氏平燕盡有其地及苻氏敗後刺史苻朗以州降朝廷置幽州

以別駕辟閻渾為刺史鎮廣固隆安四年為慕容德所滅遂都之是為南燕復

改為青州德以并州牧鎮陰平幽州刺史鎮發干徐州刺史鎮莒城青州刺史

鎮東萊兗州刺史鎮梁父慕容超移青州於東萊郡後為劉裕所滅留長史羊

穆之為青州刺史築東陽城而居之自元帝渡江於廣陵僑置青州至是始置

北青州鎮東陽城以僑立州為南青州而後省南青州而北青州直曰青州

○徐州按禹貢海岱及淮之地舜十二牧則其一也於周入青州之域春秋元命包云天氏流為徐州蓋取舒緩之義或云因徐丘以立名秦兼天下以置泗水薛琅邪三郡楚漢之際分置東陽郡漢又分置東海郡改泗水為沛改薛為魯分沛置楚國以東陽屬吳國景帝改吳為江都武帝分沛東陽置臨淮郡改江都為廣陵及置十三州以其地為徐州統楚國及東海琅邪臨淮廣陵四郡宣帝改楚為彭城郡後漢改為彭城國以沛郡之廣戚縣來屬改臨淮為下邳國及太康元年復分下邳屬縣在淮南者置臨淮郡分琅邪置東莞郡州凡領郡國七縣六十一戶八萬一千二十一

彭城國

漢以為郡統縣七戶四千一百二十一

彭城

故殷伯留所封

廣戚

傅陽

武原

呂

梧

下邳國

漢置為臨淮郡統下邳縣七戶七千五百

葛嶧山在西古嶧也韓信為楚王都之

凌

良城

侯

睢陵

夏丘

取慮 僮

晉

書

卷十五

地理志下

二

中華書局聚

東海郡漢置統縣十二戶 郟故郟子國 祝其羽山在縣之西 胸 襄賁 利城 贛榆 厚

丘 蘭陵 承 昌慮 合鄉 戚 陽都 繒 卽丘 華 費魯季氏邑 東

琅邪國秦置郡統縣九戶 開陽侯相 臨沂 陽都 繒 卽丘 華 費魯季氏邑 東

安 蒙陰山在西南 東莞郡太康中置統縣八戶一萬 東莞故魯縣 朱虛 營陵尚父呂望所封 安丘故莒渠丘父封邑 蓋 臨胸

有海 劇 廣 淮陰 射陽 輿 海陽有江海會祠 廣陵 鹽瀆 淮浦

江都有江 臨淮郡漢置章帝以合下邳太康元年復立統縣十戶一萬 盱眙 東陽 高山 贅其 潘旌 高郵

淮陵 司吾 下相 徐 太康十年以青州城陽郡之莒姑幕諸東武四縣屬東莞元康元年分東海置

蘭陵郡七年又分東莞置東安郡分臨淮置淮陵郡以堂邑置堂邑郡永嘉之

亂臨淮淮陵並淪沒石氏元帝渡江之後徐州所得惟半乃僑置淮陽陽平濟

陰北濟陰四郡又琅邪國人隨帝過江者遂置懷德縣及琅邪郡以統之是時幽冀青并兗五州及徐州之淮北流人相帥過江淮帝並僑立郡縣以司牧之割吳郡之海虞北境立鄒胸利城祝其厚丘西隰襄賁七縣寄居曲阿以江乘置南東海南琅邪南東平南蘭陵等郡分武進立臨淮淮陵南彭城等郡屬南徐州又置頓丘郡屬北徐州明帝又立南沛南清河南下邳南東莞南平昌南濟陰南濮陽南太平南泰山南濟陽南魯等郡以屬徐兗二州初或居江南或居江北或以兗州領州郟鑿都督青兗二州諸軍事兗州刺史加領徐州刺史鎮廣陵蘇峻平後自廣陵還鎮京口又於漢故九江郡界置鍾離郡屬南徐州江北又僑立幽冀青并四州穆帝時移南東海七縣出居京口義熙七年始分淮北爲北徐州淮南但爲徐州統彭城沛下邳蘭陵東莞東安琅邪淮陽陽平濟陰北濟陰十一郡以盱眙立盱眙郡統考城直瀆陽城三縣又分廣陵界置海陵山陽二郡後又以幽冀合徐州青州并合兗州

○荊州按禹貢荆及衡陽之地舜置十二牧則其一也周禮正南曰荊州春秋

元命包云軫星散爲荊州荊強也言其氣躁強亦曰警也言南蠻數爲寇逆其
人有道後服無道先強當警備也又云取名於荆山六國時其地爲楚及秦取
楚鄢郢爲南郡又取巫中地爲黔中郡以楚之漢北立南陽郡滅楚之後分黔
中爲長沙郡漢高祖分長沙爲桂陽郡改黔中爲武陵郡分南郡爲江夏郡武
帝又分長沙爲零陵郡及置十三州因舊名爲荊州統南郡南陽零陵桂陽武
陵長沙江夏七郡後漢獻帝建安十三年魏武盡得荊州之地分南郡以北立
襄陽郡又分南陽西界立南鄉郡分枝江以西立臨江郡及敗於赤壁南郡以
南屬吳吳後遂與蜀分荊州於是南郡零陵武陵以西爲蜀江夏桂陽長沙三
郡爲吳南陽襄陽南鄉三郡爲魏而荊州之名南北雙立蜀分南郡立宜都郡
劉備沒後宜都武陵零陵南郡四郡之地悉復屬吳魏文帝以漢中遺黎立魏
興新城二郡明帝分新城立上庸郡孫權分江夏立武昌郡又分蒼梧立臨賀
郡分長沙立衡陽湘東二郡孫休分武陵立天門郡分宜都立建平郡孫皓分
零陵立始安郡分桂陽立始興郡又分零陵立邵陵郡分長沙立安成郡荊州

統南郡武昌武陵宜都建平天門長沙零陵桂陽衡陽湘東邵陵臨賀始興始安十五郡其南陽江夏襄陽南鄉魏興新城上庸七郡屬魏之荊州及武帝平吳分南郡爲南平郡分南陽立義陽郡改南鄉爲順陽郡又以始興始安臨賀三郡屬廣州以揚州之安成郡來屬州統郡二十二縣一百六十九戶三十五萬七千五百四十八

江夏郡漢置統縣七安陸橫尾山在東北古之陪尾山雲杜故雲子國曲陵 平春 鄆 竟陵

章山在東北古之內方山南新市

南郡漢置統縣十一江陵故楚都編有雲夢官當陽 華容 郡故郡子國枝江故羅國旌陽

州陵楚嬖人州監利 松滋 石首

襄陽郡魏置統縣八百宜城故鄆也中廬 臨沮荆山在東北郢 襄陽侯相山都 鄧

城 鄆

南陽國秦置郡統縣十四宛 西鄂侯相雉 魯陽公國相犍 涇陽公國相博望公國

相堵陽 葉侯相有長城舞陰公國相比陽公國相涅陽 冠軍 鄆

順陽郡 太康中置統縣八戶二萬一百 鄧 順陽 南鄉 丹水 武當 侯相 陰 筑陽 析

義陽郡 太康中置統縣二戶一萬九千 新野 侯相 穰 鄧 侯國 蔡陽 隨 侯國 安昌 棘陽

厥西 平氏 桐栢山在南 義陽 平林 朝陽

新城郡 魏置統縣一萬五千二百 房陵 綏陽 昌魏 沔鄉

魏興郡 魏置統縣一萬二千 晉興 安康 西城 錫 長利 洵陽

上庸郡 魏置統縣一千四百四十八 上庸 侯相 安富 北巫 武陵 上廉 微陽

建平郡 吳晉各有建平郡太康元年合統縣八戶一萬三千二百 巫 北井 秦昌 信陵 興山 建始

秭歸 故楚子國 沙渠

宜都郡 吳置統縣八千七百 夷陵 夷道 佷山

南平郡 吳置以爲南郡太康元年改曰南平統縣四戶七千 作唐 孱陵 南安 江安 沔陽 西陽 鍾城 沅

武陵郡 漢置統縣一萬四千 臨沅 龍陽 漢壽 沅陵 黠陽 西陽 鍾城 沅

南 遷陵 舞陽

天門郡 吳置統縣五千一百 零陽 淩中 兗 臨澧 澧陽

長沙郡 漢置統縣十 臨湘 攸 下雋 醴陵 劉陽 建寧 吳昌 羅

蒲沂 巴陵

衡陽郡 吳置故屬長沙統縣九戶二萬一千 湘鄉 重安 湘南 湘西 烝陽 衡山 連道

新康 益陽

湘東郡 吳置故屬長沙統縣七戶一萬九千五百 鄴 茶陵 臨烝 利陽 陰山 新平 新寧

零陵郡 吳置統縣十一戶 泉陵 有香茅云古貢之以縮酒 祁陽 零陵 營浦 洮陽 永

昌 觀陽 營道 春陽 泠道 應陽 東界有鼻墟云象所封

邵陵郡 吳置統縣六千 邵陵 都梁 天夷 建興 邵陽 高平

桂陽郡 漢置統縣六百 郴 項羽封義 耒陽 便 臨武 晉寧 南平

武昌郡 吳置統縣七百 武昌 故東鄂也楚子熊渠封中子紅於此柴桑有溢 陽新 沙羨 有夏口對沔口

有津 沙陽 鄂有新興馬頭鐵官 官陵

安成郡 吳置統縣七戶三千 平都 宜春 新諭 永新 安復 萍鄉 廣興

惠帝分桂陽武昌安成三郡立江州以新城魏興上庸三郡屬梁州又分義陽

立隨郡分南陽立新野郡分江夏立竟陵郡懷帝又分長沙衡陽湘東零陵邵陵桂陽及廣州之始安始興臨賀九郡置湘州時蜀亂又割南郡之華容州陵監利三縣別立豐都合四縣置成都郡爲成都王穎國居華容縣愍帝建興中併還南郡亦併豐都於監利元帝渡江又僑立新興南河東二郡穆帝時又分零陵立營陽郡以義陽流人在南郡者立爲義陽郡又以廣州之臨賀始興始安三郡及江州之桂陽益州之巴東合五郡來屬以長沙衡陽湘東零陵邵陵營陽六郡屬湘州桓温又分南郡立武寧郡安帝又僑立南義陽東義陽長寧三郡義熙十三年省湘州置長沙衡陽湘東零陵邵陵營陽還入荊州

○揚州按禹貢淮海之地舜置十二牧則其一也周禮東南曰揚州春秋元命包云牽牛流爲揚州分爲越國以爲江南之氣躁勁厥性輕揚亦曰州界多水水波揚也於古則荒服之國戰國時其地爲楚分秦始皇并天下以置鄣會稽九江三郡項羽封英布爲九江王盡有其地漢改九江曰淮南卽封布爲淮南王六年分淮南置豫章郡十一年布誅立皇子長爲淮南王封劉濞爲吳王二

國盡得揚州之地文帝十六年分淮南立廬江衡山二郡景帝四年封皇子非
爲江都王并得鄣會稽郡而不得豫章武帝改江都曰廣陵封皇子胥爲王而
以屬徐州元封二年改鄣曰丹陽改淮南復爲九江後漢順帝分會稽立吳郡
揚州統會稽丹陽吳豫章九江廬江六郡省六安并廬江郡獻帝興平中孫策
分豫章立廬陵郡孫權又分豫章爲鄱陽郡分丹陽立新都郡孫亮又分豫章
立臨川郡分會稽立臨海郡孫休又分會稽立建安郡孫恪分會稽立東陽郡
分吳立吳興郡分豫章廬陵長沙立安成郡分廬陵立廬陵南部都尉揚州統
丹陽吳會稽吳興新都東陽臨海建安豫章鄱陽臨川安成廬陵南部十四郡
江西廬江九江之地自合肥之北至壽春悉屬魏及晉平吳以安成屬荊州分
丹陽之宣城宛陵陵陽安吳涇廣德寧國懷安石城臨城春穀十一縣立宣城
郡理宛陵改新都曰新安郡改廬陵南部爲南康郡分建安立晉安郡又分丹
陽立毗陵郡揚州合統郡十八縣一百七十三戶三十一萬一千四百

丹陽郡

漢置統縣十一戶五萬一千五百

建鄴

本秣陵孫氏改爲建業武帝平吳以爲秣陵太康二年分秣陵北爲建鄴改業爲鄴

江寧

太康二年分建鄴置丹楊柳在陽山多赤于湖蕪湖永世溧陽溧水所出江乘茅句容有

山湖熟 秣陵

宣城郡太康二年置統縣十宛陵侯相彭澤聚在西南宣城陵陽淮水出東北入江仙人陵陽子明所居

安吳 臨城 石城 涇 春穀孝武陽改廣德 寧國 懷安

淮南郡秦置九江郡漢以為淮南國漢武帝置為九江郡武帝改為淮南郡統縣十六戶三萬三千四百壽春 成德 下蔡

義城 西曲陽 平阿有塗山歷陽 全椒 阜陵漢明帝時淪為麻湖鍾離故州來邑合肥

塗道 陰陵 當塗古塗山國東城 烏江

廬江郡漢置統縣十陽泉 舒故國有桐鄉灊天柱山在皖 尋陽 居巢桀死於此臨

湖 襄安 龍舒 六故六國

毗陵郡吳分會稽無錫已西為屯田置典農校尉太康二年省校尉為毗陵郡統縣七戶一萬二千丹徒故朱方曲阿故雲武

進 延陵 毗陵 既陽 無錫有磨山春申君祠

吳郡漢置統縣十一吳故國具區在西嘉興 海鹽 鹽官 錢唐武林水所出富陽

桐廬 建德 壽昌 海虞 婁

吳興郡吳置統縣十戶二萬四千烏程 臨安 餘杭 武康故防風氏國 東遷 於潛有潛水 故

鄣 安吉 原鄉 長城

會稽郡秦置統縣十戶三萬 山陰會稽山在南上有禹冢 上虞有仇亭舜避丹朱於此地 餘姚有句餘山在南 句章 鄞

有結綺亭 鄞 始寧 剡 永興 諸暨

東陽郡吳置統縣九戶一萬二千 長山有赤松子廟 永康 烏傷 吳寧 太末 信安 豐安

定陽 遂昌

新安郡吳置統縣六戶五千 始新 遂安 黟 歙 海寧 黎陽

臨海郡吳置統縣八戶一萬八千 章安 臨海 始豐 永寧 寧海 松陽 安固 橫

陽

建安郡故秦閩中郡漢高帝五年以立閩越王及武帝滅之徙其人各為東冶又更名東城後漢改為侯官都尉及吳置建安郡統縣七戶四千三百

建安 吳興 東平 建陽 將樂 邵武 延平

晉安郡太康三年置統縣八戶四千三百 原豐 新羅 宛平 同安 侯官 羅江 晉安

温麻

豫章郡 漢置統縣十六 南昌 海昏 新淦 建城 望蔡 永脩 建昌

吳平 豫章 彭澤 艾 康樂 豐城 新吳 宜豐 鍾陵

臨川郡 吳置統縣十 臨汝 西豐 南城 東興 南豐 永成 宜黃 安

浦 西寧 新建

鄱陽郡 吳置統縣八 廣晉 鄱陽 樂安 餘汗 鄒陽 歷陵 葛陽 晉

興

廬陵郡 吳置統縣十 西昌 高昌 石陽 巴丘 南野 東昌 遂興

吉陽 興平 陽豐

南康郡 太康三年置統縣 贛 雩都 平固 南康 揭陽

惠帝元康元年有司奏荆揚二州疆土廣遠統理尤難於是割揚州之豫章鄱

陽廬陵臨川南康建安晉安荊州之武昌桂陽安成合十郡因江水之名而置

江州永興元年分廬江之尋陽武昌之柴桑二縣置尋陽郡屬江州分淮南之

烏江歷陽二縣置歷陽郡又以周圻創義討石冰割吳興之陽羨并長城縣之

北鄉置義鄉國山臨津并陽羨四縣又分丹陽之永世置平陵及永世凡六縣立義興郡以表珙之功並屬揚州又以毗陵郡封東海王世子毗避毗諱改爲晉陵懷帝永嘉元年又以豫章之彭澤縣屬尋陽郡愍帝立避帝諱改建鄴爲建康元帝渡江建都揚州改丹陽太守爲尹江州又置新蔡郡尋陽郡又置九江上甲二縣尋又省九江縣入尋陽是時司冀雍涼青并兗豫幽平諸州皆淪沒江南所得但有揚荆湘江梁益交廣其徐州則有過半豫州惟得譙城而已明帝太寧元年分臨海立永嘉郡統永寧安固松陽橫陽等四縣而揚州統丹陽吳郡吳興新安東陽臨海永嘉宣城義興晉陵十一郡自中原亂離遺黎南渡並僑置牧司在廣陵丹徒南城非舊土也及胡寇南侵淮南百姓皆渡江成帝初蘇峻祖約爲亂於江淮胡寇又大至百姓南渡者轉多乃於江南僑立淮南郡及諸縣又於尋陽僑置松滋郡遙隸揚州咸康四年僑置魏郡廣川高陽堂邑等諸郡并所統縣并寄居京邑改陵陽爲廣陵孝武寧康二年又分永嘉郡之永寧縣置樂成縣是時上黨百姓南渡僑立上黨郡爲四縣寄居蕪湖尋

又省上黨郡爲縣又罷襄城郡爲繁昌縣並以屬淮南安帝義熙八年省尋陽縣入柴桑縣柴桑仍爲郡後又省上甲縣入彭澤縣舊江州督荊州之竟陵郡及何無忌爲刺史表以竟陵去州遼遠去江陵三百里荊州所立綏安郡人戶入境欲資此郡助江濱戍防以竟陵郡還荊州又司州之弘農揚州之松滋二郡寄在尋陽人戶雜居並宜建督安帝從之後又省松滋郡爲松滋縣弘農郡爲弘農縣並屬尋陽郡

○交州按禹貢揚州之域是爲南越之士秦始皇既略定揚越以謫戍卒五十萬人守五嶺自北徂南入越之道必由嶺嶠時有五處故曰五嶺後使任囂趙他攻越略取陸梁地遂定南越以爲桂林南海象等三郡非三十六郡之限乃置南海尉以典之所謂東南一尉也漢初以嶺南三郡及長沙豫章封吳芮爲長沙王十一年以南武侯織爲南海王陸賈使還拜趙他爲南越王割長沙之南三郡以封之武帝元鼎六年討平呂嘉以其地爲南海蒼梧鬱林合浦日南九真交阯七郡蓋秦時三郡之地元封中又置儋耳珠崖二郡置交阯刺史以

督之昭帝元始五年罷儋耳并珠崖元帝元初三年又罷珠崖郡後漢馬援平定交部始調立城郭置并邑順帝永和九年交阯太守周敞求立爲州朝議不許卽拜敞爲交阯刺史桓帝分立高興郡靈帝改曰高涼建安八年張津爲刺史士燮爲交阯太守共表立爲州乃拜津爲交州牧十五年移居番禺詔以邊州使持節郡給鼓吹以重城鎮加以九錫六佾之舞吳黃武五年割南海蒼梧鬱林三郡立廣州交阯曰南九真合浦四郡爲交州戴良爲刺史值亂不得入呂岱擊平之復還并交部赤烏五年復置珠崖郡永安七年復以前三郡立廣州及孫皓又立新昌武平九德三郡蜀以李恢爲建寧太守遙領交州刺史晉平蜀以蜀建寧太守霍弋遙領交州得以便宜選用長吏平吳後省珠崖入合浦交州統郡七縣五十三戶二萬五千六百

合浦郡

漢置統縣六戶二千

合浦

南平

蕩昌

徐聞

毒質

珠官

交阯郡

漢置統縣十四戶一萬二千

龍編

句漏

望海

羸樓

西于

武寧

朱鳶

曲易

交輿

北帶

稽徐

安定

南定

海平

新昌郡

吳置統縣六戶三千

麋泠

婦人徵側為主處馬援平之

嘉寧

吳定

封山

臨西

西道

武平郡

吳置統縣七戶五千

武寧

武興

進山

根寧

安武

扶安

封溪

九真郡

漢置統縣七戶三千

胥浦

移風

湛梧

建初

常樂

扶樂

松原

九德郡

吳置周時越裳氏地統縣八無戶

九德

咸驩

南陵

陽遂

扶苓

曲胥

浦陽

都洩

日南郡

秦置象郡漢武帝改名焉統縣五戶六百

象林

自此南有四國其人皆云漢人子孫今有銅柱亦是漢置此為界貢金供稅也

盧容

象郡所居

朱吾

西卷

比景

○廣州按禹貢揚州之域秦末趙他所據之地及漢武帝以其地為交趾郡至

吳黃武五年分交州之南海蒼梧鬱林高梁四郡立為廣州俄復舊永安六年

復分交州置廣州分合浦立合浦北部以都尉領之孫皓分鬱林立桂林郡及

太康中吳平遂以荊州始安始興臨賀三郡來屬合統郡十縣六十八戶四萬

三千一百四十

南海郡

秦置統縣六戶九千五百

番禺

四會

增城

博羅

龍川

平夷

臨賀郡 吳置統縣六百 臨賀 謝沐 馮乘 封陽 興安 富川

始安郡 吳置統縣六百 始安 始陽 平樂 荔浦 常安 熙平 永豐

始興郡 吳置統縣五千 曲江 桂陽 始興 含洹 瀆陽 中宿 陽山

蒼梧郡 漢置統縣十二 廣信 端溪 高要 建陵 新寧 猛陵 鄣平

農城 元谿 臨允 都羅 武城

鬱林郡 秦置桂郡漢武帝更名統縣九戶六千 布山 柯林 新邑 晉平 始建 鬱平 領

方 武熙 安廣

桂林郡 吳置統縣八百二十 潭中 武豐 粟平 羊平 龍剛 夾陽 武城 軍騰

高涼郡 吳置統縣三百二十 安寧 高涼 思平

高興郡 吳置統縣五百二十 廣化 海安 化平 黃陽 西平

寧浦郡 吳置統縣五百二十 寧浦 連道 吳安 昌平 平山

武帝後省高興郡懷帝永嘉元年又以臨賀始興始安三郡凡二十縣為湘州

元帝分鬱林立晉興郡成帝分南海立東官郡以始興始安臨賀三郡還屬荆

州穆帝分蒼梧立晉康新寧永平三郡哀帝太和中置新安郡安帝分東官立

義安郡恭帝分南海立新會郡

晉書卷十五

安寧 高奴 思平

晉書卷十五 安寧 高奴 思平

式 卷十五

晉書卷十五 安寧 高奴 思平

晉書卷十五 安寧 高奴 思平

晉書卷十五 安寧 高奴 思平

晉書卷十五 安寧 高奴 思平

晉書卷十五 安寧 高奴 思平

晉書卷十五 安寧 高奴 思平

晉書卷十五考證

地理志下零陵郡泠道○道監本誤陽

揚州分廬陵立廬陵南部都尉○監本上陵字誤江部誤郡

會稽郡剡○剡監本作郟誤也剡縣屬會稽若郟縣則屬東海郡矣

以始興始安臨賀三郡還屬荊州○各本俱脫始安二字今從本志荊州稱武帝平吳後又以始興始安臨賀屬廣州增正之

晉書卷十五考證

晉書卷十五卷

晉平吳餘文以故吳故安其晉魏魏魏魏魏

以故吳故安其晉三張魏魏魏魏○各本均無故吳二字今據本志補魏魏

會魏魏魏○修通本訂魏魏出魏魏魏會魏魏魏魏魏魏魏魏魏

魏魏今魏魏立魏魏南魏魏魏○通本土魏魏魏魏魏魏

魏魏志不魏魏魏魏○魏魏本魏魏

晉書卷十五卷

晉書卷十六

唐太宗文武皇帝御撰

志第六

律歷上

易曰形而上者謂之道形而下者謂之器夫神道廣大妙本於陰陽形器精微義先於律呂聖人觀四時之變刻玉紀其盈虛察五行之聲鑄金均其清濁所以遂八風而宣九德和大樂而成政道然金質從革侈弇無方竹體圓虛脩短利制是以神瞽作律用寫鍾聲乃紀之以三平之以六成於十二天之道也又叶時日於晷度效地氣於灰管故陰陽和則景至律氣應則灰飛灰飛律通吹而命之則天地之中聲也故可以範圍百度化成萬品則虞書所謂叶時月正日同律度量衡者也中聲節以成文德音章而和備則可以動天地感鬼神導性情移風俗叶言志於詠歌鑒盛衰於治亂故君子審聲以知音審音以知樂審樂以知政蓋由茲道太史公律書云王者制事立法物度軌則一稟於六律

六律爲萬事之本其於兵械尤所重焉故云望敵知吉凶聞聲效勝負百王不易之道也及秦氏滅學其道浸微漢室初興丞相張蒼首言音律未能審備孝武帝創置協律之官司馬遷言律呂相生之次詳矣及王莽之際考論音律劉歆條奏大率有五一日備數一十百千萬也二日和聲宮商角徵羽也三曰審度分寸尺丈引也四曰嘉量龠合升斗斛也五曰權衡銖兩斤鈞石也班固因而志之蔡邕又記建武已後言律呂者至司馬紹統採而續之漢末天下大亂樂工散亡器法堙滅魏武始獲杜夔使定樂器聲調夔依當時尺度權備典章及武帝受命遵而不革至泰始十年光祿大夫荀勖奏造新度更鑄律呂元康中勖子藩嗣其事未及成功屬永嘉之亂中朝典章咸沒於石勒及元帝南遷皇度草昧禮容樂器掃地皆盡雖稍加採掇而多所淪胥終于恭安竟不能備今考古律相生之次及魏武已後言音律度量者以志于篇云傳云十二律黃帝之所作也使伶倫自大夏之西乃之崑崙之陰取竹之嶰谷生其竅厚均者斷兩節間長三寸九分而吹之以爲黃鍾之宮曰含少次制十二竹簫寫鳳之

鳴雄鳴爲六雌鳴亦六以比黃鍾之宮皆可以生之以定律呂則律之始造以竹爲管取其自然圓虛也又云黃帝作律以玉爲管長尺六孔爲十二月音至舜時西王母獻昭華之琯以玉爲之及漢章帝時零陵文學奚景於泠道舜祠下得白玉琯又武帝太康元年汲郡盜發六國時魏襄王家亦得玉律則古者又以玉爲管矣以玉者取其體含廉潤也而漢平帝時王莽又以銅爲之銅者自名也所以同天下齊風俗也爲物至精不爲燥溼寒暑改節介然有常似士君子之行故用焉

周禮太師掌六律六呂以合陰陽之聲六律陽聲黃鍾太簇姑洗蕤賓夷則無射也六呂陰聲大呂應鍾南呂林鍾中呂夾鍾也又有太師則執同律以聽軍聲而詔以吉凶其典同掌六律六呂之和以辯天地四方陰陽之聲以爲樂器皆以十有二律而爲之數度以十有二聲而爲之齊量焉及周景王將鑄無射問律於泠州鳩對曰夫六中之色故名之一曰黃鍾所以宣養六氣九德也由是第之二曰太簇所以金奏贊陽出滯也三曰姑洗所以羞絜百物考神納賓

也四曰蕤賓所以安靜神人獻酬交酢也五曰夷則所以詠歌九德平人無貳也六曰無射所以宣布哲人之令德示人軌儀也爲之六間以揚沉伏而黜散越也元間大呂助宣物也二間夾鍾出四隙之細也三間中呂宣中氣也四間林鍾和展百事俾莫不任肅純恪中也五間南呂贊陽秀也六間應鍾均利器用俾應復也此皆所以律述時氣效節物也及秦始皇焚書蕩覆典策缺亡諸子瓊言時有遺記呂不韋春秋言黃鍾之宮律之本也下生林鍾林鍾上生太簇太簇下生南呂南呂上生姑洗姑洗下生應鍾應鍾上生蕤賓蕤賓下生大呂大呂下生夷則夷則上生夾鍾夾鍾下生無射無射上生中呂三分其所生益其一分以上生三分所生去其一分以下生後代之言音律者多宗此說及漢興承秦之弊張蒼首治律歷頗未能詳故孝武帝正樂乃置協律之官雖律呂清濁之體粗正金石高下之音有準然徒共摭採遺存以成一時之制而數猶用五時淮南王安延致儒博亦爲律呂云黃鍾之律九寸而宮音調因而九之九九八十一故黃鍾之數立焉位在子林鍾位在未其數五十四太簇其數

七十二南呂之數四十八姑洗之數六十四應鍾之數四十二蕤賓之數五十七大呂之數七十六夷則之數五十一夾鍾之數六十八無射之數四十五中呂之數六十極不生以黃鍾爲宮太簇爲商姑洗爲角林鍾爲徵南呂爲羽宮生徵徵生商商生羽羽生角角生應鍾不比正音故爲和應鍾生蕤賓不比正音故爲繆日冬至音比林鍾浸以濁日夏至音比黃鍾浸以清十二律應二十四時之變甲子中呂之徵也景子夾鍾之羽也戊子黃鍾之宮也庚子無射之商也壬子夷則之角也其爲音也一律而生五音十二律而爲六十音因而六之六六三十六故三百六十音以當一歲之日故律歷之數天地之道也司馬遷八書言律呂粗舉大經著於前史則以太極元氣函三爲一而始動於子十二律之生必所起焉於是參一於丑得三因而九三之與本位合十辰得一萬九千六百八十三謂之成數以爲黃鍾之法又參之律於十二辰得十七萬七千一百四十七謂之該數以爲黃鍾之實實如法而一得黃鍾之律長九寸十二月冬至之氣應焉蓋陰陽合德氣鍾於子而化生萬物則物之生莫不函三

故十二律空徑三分而上下相生皆損益以三其術則因黃鍾之長九寸以下
生者倍其實三其法以上生者四其實三其法所以明陽下生陰陰上生陽
起子爲黃鍾九寸一 丑三分之二 寅九分之八 卯二十七分之十六
辰八十一分之六十四 巳二百四十三分之一百二十八 午七百二十九
分之五百一十二 未二千一百八十七分之一千二十四 申六千五百六
十一分之四千九十六 酉一萬九千六百八十三分之八千一百九十二
戌五萬九千四十九分之三萬二千七百六十八 亥十七萬七千一百四十
七分之六萬五千五百三十六

如是周十二辰在六律爲陽則當位自得而下生陰在六呂爲陰則得其所衡
而上生於陽推算之術無重上生之法也所謂律取妻呂生子陰陽升降律呂
之大經也而遷又言十二律之長今依淮南九九之數則蕤賓爲重上又言五
音相生而以宮生角角生商商生徵徵生羽羽生宮求其理用罔見通途及元
始中王莽輔政博徵通知鍾律者考其音義使羲和劉歆典領調奏班固漢書

採而志之其序論雖博而言十二律損益次第自黃鍾長九寸三分損一下生林鍾長六寸三分益一上生太簇而左旋八八爲位一上一下終於無射下生中呂校其相生所得與司馬遷正同班固採以爲志元帝時郎中京房知五音六十律之數上使太子太傅玄成諫議大夫章雜試問房於樂府房對受學於故小黃令焦延壽六十律相生之法以上生下皆三生二以下生上皆三生四陽下生陰陰上生陽終於中呂而十二律畢矣中呂上生執始執始下生去滅上下相生終於南呂六十律畢矣夫十二律之變至於六十猶八卦之變至於六十四也宓犧作易紀陽氣之初以爲律法建日冬至之聲以爲黃鍾爲宮太簇爲商姑洗爲角林鍾爲徵南呂爲羽應鍾爲變宮蕤賓爲變徵此聲氣之元五音之正也故統一日其餘以次運行當日者各自爲宮而商徵以類從焉禮運曰五聲六律十二管還相爲宮此之謂也以六十律分朞之日黃鍾自冬至始及冬至而復陰陽寒燠風雨之占生焉於以撿攝羣音考其高下苟非草木之聲則無不有所合虞書曰律和聲此之謂也京房又曰竹聲不可以度調故

作準以定數準之狀如瑟而長丈十三絃隱間九尺以應黃鍾之律九寸中央一絃下有畫分寸以爲六十律清濁之節房言律詳於散所奏其術施行於史官候部用之文多不悉載截管爲律吹以考聲列以效氣道之本也術家以其聲微而體難知其分數不明故作準以代之準之聲明暢易達分寸又粗然絃以緩急清濁非管無以正也均其中絃令與黃鍾相得按畫以求諸律則無不如數而應者矣續漢志具載其六十律準度數其相生之次與呂覽淮南同漢章帝元和元年待詔候鍾律殷彤上言官無曉六十律以準調音故待詔嚴崇具以準法教子男宣願召宣補學官主調樂器詔曰崇子學審曉律別其族協其聲者審試不得依託父學以聾爲聰聲微妙獨非莫知獨是莫曉以律錯吹能知命十二律其二中不失一乃爲能傳崇學耳試宣十二律其二中其四不中其六不知何律宣遂罷自此律家莫能爲準

靈帝熹平六年東觀召典律者太子舍人張光等問準竟光等不知歸閱舊藏乃得其器形制如房書猶不能定其絃緩急音不可書以曉人知之者欲教而

無從心達者體知而無師故史官能辯清濁者遂絕其可以相傳者唯候氣而已漢末紛亂亡失雅樂

魏武時河南杜夔精識音韻爲雅樂郎中令鑄銅工柴玉鑄鍾其聲均清濁多不如法數毀改作玉甚厭之謂夔清濁任意更相訴白於魏武王魏武王取玉所鑄鍾雜錯更試然後知夔爲精於是罪玉

泰始十年中書監荀勗中書令張華出御府銅竹律二十五具部太樂郎劉秀等校試其三具與杜夔及左延年律法同其二十二具視其銘題尺寸是笛律也

問協律中郎將列和辭昔魏明帝時令和承受一笛聲以作此律欲使學者別居一坊歌詠講習依此律調至於都合樂時但識其尺寸之名則絲竹歌詠皆得均合歌聲濁者用長笛長律歌聲清者用短笛短律歌凡絃歌調張清濁之制不依笛尺寸名之則不可知也勗等奏昔先王之作樂也以振風蕩俗饗神祐賢必協律呂之和以節八音之中是故郊祀朝宴用之有制歌奏分敘清濁

有宜故曰五聲十二律還相爲宮此經傳記籍可得而知者也如和對辭笛之長短無所象則率意而作不由曲度考以正律皆不相應吹其聲均多不諧合又辭先師傳笛別其清濁直以長短工人裁制舊不依律是爲作笛無法而和寫笛造律又令琴瑟歌詠從之爲正非所以稽古先哲垂憲于後者也謹條牒諸律問和意狀如左及依典制用十二律造笛象十二牧聲均調和器用便利講肄彈擊必合律呂況乎宴饗萬國奏之廟堂者哉雖伶夔曠遠至音難精猶宜儀形古者以求厥衷合乎經禮於制爲詳若可施用請更部笛工選竹造作下太樂樂府施行平議諸杜夔左延年律可皆留其御府笛正聲下徵各一具皆銘題作者姓名其餘無所施用還付御府毀奏可

勛又問和作笛爲可依十二律作十二笛令一孔依一律然後乃以爲樂不和辭太樂東箱長笛正聲已長四尺二寸今當復取其下徵之聲於法聲濁者笛當長計其尺寸乃五尺有餘知昔日作之不可吹也又笛諸孔雖不校試意謂不能得一孔輒應一律也案太樂四尺二寸笛正聲均應蕤賓以十二律還相

爲宮推法下徵之孔當應律大呂大呂笛長二尺六寸有奇不得長五尺餘輒令大樂郎劉秀鄧昊等依作大呂笛以示和又吹七律一孔一校聲皆相應然後令郝生鼓箏宋同吹笛以爲雜引相和諸曲和乃辭曰自和父祖漢世以來笛家相傳不知此法而令調均與律相應實非所及也郝生魯基种整朱夏皆與和同

又問和笛有六孔及其體中之空爲七和爲能盡名其宮商角徵孔調與不調以何檢知和辭先師相傳吹笛但以作曲相語爲某曲當舉某指初不知七孔盡應何聲也若當作笛其仰尙方笛工依按舊像訖但吹取鳴者初不復校其諸孔調與不調也

按周禮調樂金石有一定之聲是故造鍾磬者先依律調之然後施於廂懸作樂之時諸音皆受鍾磬之均卽爲悉應律也至於饗宴殿堂之上無廂懸鍾磬以笛有一定調故諸絃歌皆從笛爲正是爲笛猶鍾磬宜必合於律呂如和所對直以意造率短一寸七孔聲均不知其皆應何律調無以檢正唯取竹之鳴

者爲無法制趣部郎劉秀鄧吳王豔魏邵等與笛工參共作笛工人造其形律者定其聲然後器象有制音均和協

又問和若不知律呂之義作樂音均高下清濁之調當以何名之和辭每合樂時隨歌者聲之清濁用笛有長短假令聲濁者用三尺二笛因名曰此三尺二調也聲清者用二尺九笛因名曰此二尺九調漢魏相傳施行皆然按周禮奏六樂乃奏黃鍾歌大呂乃奏太簇歌應鍾皆以律呂之義紀歌奏清濁而和所稱以二尺三尺爲名雖漢魏用之俗而不典部郎劉秀鄧吳等以律作三尺二寸者應無射之律若宜用長笛執樂者曰請奏無射作二尺八寸四分四釐者應黃鍾之律若宜用短笛執樂者曰請奏黃鍾則歌奏之義若合經禮考之古典於制爲雅

書曰予欲聞六律五聲八音在治忽周禮國語載六律同禮記又曰五聲十二律還相爲宮劉歆班固撰律歷志亦紀十二律惟京房始創六十律至章帝時其法已絕蔡邕雖追紀其言亦曰今無能爲者依按古典及今音家所用六十

律者無施於樂謹依典記以五聲十二律還相為宮之法制十二笛象記注圖
側如別省圖不如視笛之孔故復重作蕤賓伏孔笛其制云

黃鍾之笛正聲應黃鍾下徵應林鍾長二尺八寸四分四釐有奇正聲調法以黃鍾為宮則

姑洗為角翕笛之聲應姑洗故以四角之長正聲調法黃鍾為宮
為黃鍾之笛也其宮聲正而不倍故曰正聲

變宮第二南呂為羽第三林鍾為徵第四蕤賓為變徵第五附姑洗為角第一應鍾為

太簇為商笛後出孔也商聲濁以商當在角下而角聲倍以在體中故上其商孔

轉濁也此章記律呂相生之制也正聲調法黃鍾為宮
名也下章說律呂相生之制也

首下度之盡二律之長而宮生徵黃鍾生林鍾以林鍾之律從宮孔下度
為孔則得之宮聲者也

商林鍾生太簇以太簇律從徵孔上度之盡商生羽太簇生南呂也以南呂律

度之盡律為孔羽生角南呂生姑洗也以姑洗律從羽孔上行度之盡律而為

則得羽聲也則得角聲也然則於商孔之上吹笛

者左手前不及也從羽孔下作角孔推而下復倍其均是以角聲在笛體中

古之制也音家舊法雖一倍再倍但令同適足為唱和之聲無角生變宮姑

害於曲均故也國語曰瓠竹利器議宜謂便於事用從宜者也
洗生應鍾也律上句所謂當為角孔而出於商下者墨點識之以應變宮生變徵

應鍾生蕤賓也以蕤賓律從變宮下度之法或倍或半其便事用例皆一者也

下徵調法林鍾為宮第四孔也故曰下徵南呂為商第三孔也故曰下徵應鍾為角第五孔也故曰上徵

相為宮也然則正濁也南呂為商之羽今為下徵應鍾為角南呂為商之羽今為下徵

今為下徵黃鍾為變徵呂之徵故假用黃鍾以變徵也應鍾為角呂之徵故假用黃鍾以變徵也

之聲則俱發黃鍾及太蕤應鍾三孔變徵之聲濁而太蕤清大呂律在二律之間

俱發三孔而徵體獲之則得大呂變徵之聲謂太蕤清大呂律在二律之間

此太蕤為徵商後出孔本正聲也姑洗為羽笛體中翕聲本正聲蕤賓為變宮即

附孔是也本正聲之變徵也今為下徵孔轉上轉清也清角之調以姑洗為宮是

則正聲之調孔轉下轉濁下徵之調孔轉上轉清也清角之調以姑洗為宮是

而哨吹中翕聲於正聲為角於下徵為羽清角之調不為宮也蕤賓為商正林鍾

為角非正南呂為變徵非正應鍾為徵正黃鍾為羽非正太蕤為變宮非正也

調準宮商及徵與律相應餘四聲非正者皆濁一律哨吹令清假而用之其例一也

凡笛體用角律其長者八之蕤賓林短者四之其餘十笛宮中實容長者十六短笛竹宜受八律之黍也若長短大小不合於此或器用不便聲均合法度三宮之齊等也然笛竹率上大下小不能均法度齊必不得也取其聲均合三宮一曰正聲二曰下二十一變也一宮變也諸笛錯綜用之故二十伏孔四所以便用

事也一曰正角出於商上者也二曰倍角近笛下者也三曰變宮近於宮孔倍

琴徵也四者皆不作其孔而取其度以近進退上下之法所以協聲均便事用也其本孔隱而不見故曰伏孔也

大呂之笛正聲應大呂下徵應夷則長二尺六寸六分三釐有奇

太簇之笛正聲應太簇下徵應南呂長二尺五寸三分一釐有奇

夾鍾之笛正聲應夾鍾下徵應無射長二尺四寸

姑洗之笛正聲應姑洗下徵應鍾長二尺二寸三分三釐有奇

蕤賓之笛正聲應蕤賓下徵應大呂長三尺九寸九分五釐有奇變宮近宮孔故倍半令下

便於用也林鍾亦如之

林鍾之笛正聲應林鍾下徵應太簇長三尺七寸九分七釐有奇

夷則之笛正聲應夷則下徵應夾鍾長三尺六寸變宮之法亦如蕤賓體用四角故四分益一也

南呂之笛正聲應南呂下徵應姑洗長三尺三寸七分有奇

無射之笛正聲應無射下徵應中呂長三尺二寸

應鍾之笛正聲應應鍾下徵應蕤賓長二尺九寸九分六釐有奇

五音十二律

土音宮數八十一爲聲之始屬土者以其最濁君之象也季夏之氣和則宮聲調宮亂則荒其君驕黃鍾之宮律最長也

火音徵三分宮去一以生其數五十四屬火者以其次清事之象也夏氣和則徵聲調徵亂則哀其事勤也

金音商三分徵益一以生其數七十二屬金者以其濁次宮臣之象也秋氣和則商聲調商亂則諉其官壞也

水音羽三分商去一以生其數四十八屬水者以爲最清物之象也冬氣和則羽聲調羽亂則危其財匱也

木音角三分羽益一以生其數六十四屬木者以其清濁中人之象也春氣和則角聲調角亂則憂其人怨也

凡聲尊卑取象五行數多者濁數少者清大不過宮細不過羽

十一月律中黃鍾律之始也長九寸仲冬氣至則其律應所以宣揚六氣九德

也班固三分損一下生林鍾

十二月律中大呂司馬遷未下生之律長四寸二百四十三分寸之五十二倍之爲八寸分寸之一百四季冬氣至則其律應所以助宣物也三分益一上生夷則京房三分損一下生夷則

正月律中太簇未上生之律長八寸孟春氣至則其律應所以贊陽出滯也三分損一下生南呂

二月律中夾鍾西下生之律長三寸二千一百八十七分寸之一千六百三十一倍之爲七寸分寸之一千七十五仲春氣至則其律應所以出四隙之細也三分益一上生無射京房三分損一下生無射

三月律中姑洗西上生之律長七寸九分寸之一季春氣至則其律應所以修潔百物考神納賓也三分損一下生應鍾

四月律中中呂亥下生之律長三寸萬九千六百八十三分寸之六千四百八十七倍之爲六寸分寸之萬二千九百七十四孟夏氣至則其律應所以宣中

氣也

五月律中蕤賓亥上生之律長六寸八十一分寸之二十六仲夏氣至則其律應所以安靜人神獻酬交酢也三分損一下生大呂京房三分益一上生大呂六月律中林鍾丑下生之律長六寸季夏氣至則其律應所以和展百物俾莫不任肅純恪也三分益一上生太簇

七月律中夷則丑上生之律長五寸七百二十九分寸之四百五十一孟秋氣至則其律應所以詠歌九則平百姓而無貳也三分損一下生夾鍾京房三分益一上生夾鍾

八月律中南呂卯下生之律長五寸三分寸之一仲秋氣至則其律應所以贊陽秀也三分益一上生姑洗

九月律中無射卯上生之律長四寸六分千五百六十一分寸之六千五百二十四季秋氣至則其律應所以宣布哲人之令德示人軌儀也三分損一下生中呂京房三分益一上生中呂

十月律中應鍾已下生之律長四寸二十七分寸之二十孟冬氣至則其律應所以均利器用俾應復也三分益一上生蕤賓

淮南京房鄭玄諸儒言律歷皆上下相生至蕤賓又重上生大呂長八寸二百四十三分寸之百四夷則上生夾鍾長七寸千一百八十七分寸之千七十五無射上生中呂長六寸萬九千六百八十三分寸之萬二千九百七十四此三品於司馬遷班固所生之寸數及分皆倍焉餘則並同斯則泠州鳩所謂六間之道揚沉伏黜散越假之爲用者也變通相半隨事之宜贊助之法也凡音聲之體務在和韻益則加倍損則減半其於本音恆爲無爽然則言一上一下者相生之道言重上生者吹候之用也於蕤賓重上生者適會爲用之數故言律者因焉非相生之正也

揚子雲曰聲生於日謂甲己爲角乙庚爲商丙辛爲徵丁壬爲羽戊癸爲宮也律生於辰謂子爲黃鍾丑聲

以情質質情也各以其律以和聲當以律管鍾均和其清濁之聲聲律相協而八音生協和宮

商角徵羽謂之五聲金石匏革絲竹土木謂之八音聲和音諧是謂五樂夫陰

陽和則景至律氣應則灰除是故天子常以冬夏至日御前殿合八能之士陳八音聽樂均度晷景候鍾律權土灰效陰陽冬至陽氣應則灰除是故樂均清景長極黃鍾通土灰輕而衡仰夏至陰氣應則樂均濁景短極蕤賓通土灰重而衡低進退於先後五日之中八能各以候狀聞太史令封上效則和否則占候氣之法爲室三重戶閉塗墁周密布緹幔室中以木爲案每律各一內房中外高從其方位加律其上以葭莩灰抑其內端案歷而候之氣至者灰去其爲氣所動者其灰散人及風所動者其灰聚殿中候用玉律十二惟二至乃候靈臺用竹律楊泉記云取弘農宜陽縣金門山竹爲管河內葭莩爲灰或云以律著室中隨十二辰埋之上與地平以竹葭灰實律中以羅縠覆律呂氣至吹灰動縠小動爲和大動君弱臣強不動君嚴暴之應也

審度

起度之正漢志言之詳矣武帝泰始九年中書監荀勗校大樂八音不和始知後漢至魏尺長於古四分有餘勗乃部著作郎劉恭依周禮制尺所謂古尺也

依古尺更鑄銅律呂以調聲韻以尺量古器與本銘尺寸無差又汲郡盜發六國時魏襄王冢得古周時玉律及鍾磬與新律聲韻闇同于時郡國或得漢時故鍾吹律命之皆應勛銘其尺曰晉泰始十年中書考古器揆校今尺長四分半所校古法有七品一曰姑洗玉律二曰小呂玉律三曰西京銅望臬四曰金錯望臬五曰銅斛六曰古錢七曰建武銅尺姑洗微彊西京望臬微弱其與此尺同銘八十二字此八者勛新尺也今尺者杜夔尺也荀勛造新鍾律與古器諧韻時人稱其精密惟散騎侍郎陳留阮咸譏其聲高聲高則悲非與國之音亡國之音亡國之音哀以思其人困今聲不合雅懼非德正至和之音必古今尺有長短所致也會咸病卒武帝以勛律與周漢器合故施用之後始平掘地得古銅尺歲久欲腐不知所出何代果長勛尺四分時人服咸之妙而莫能厝意焉

史臣按勛於千載之外推百代之法度數既冥聲韻又契可謂切密信而有徵也而時人寡識據無聞之一尺忽周漢之兩器雷同臧否何其謬哉世說稱有

田父於野地中得周時玉尺便是天下正尺荀勗試以校己所冶金石絲竹皆短校一米又漢章帝時零陵文學史奚景於泠道舜祠下得玉律度以爲尺相傳謂之漢官尺以校荀勗尺勗尺短四分漢官始平兩尺長短度同又杜夔所用調律尺比勗新尺得一尺四分七釐魏景元四年劉徽注九章云王莽時劉歆斛尺弱於今尺四分五釐比魏尺其斛深九寸五分五釐卽荀勗所謂今尺長四分半是也元帝後江東所用尺比荀勗尺一尺六分二釐趙劉曜光初四年鑄渾儀八年鑄土圭其尺比荀勗尺一尺五分荀勗新尺惟以調音律至於人間未甚流布故江左及劉曜儀表並與魏尺略相依準

嘉量

周禮栗氏爲量鬴深尺內方尺而圓其外其實一鬴其臀一寸其實一豆其耳三寸其實一升重一鈞其聲中黃鍾概而不稅其銘曰時文思索允臻其極嘉量既成以觀四國永啓厥後茲器維則春秋左氏傳曰齊舊四量豆區鬴鍾四升曰豆各自其四以登於鬴四豆爲區區斗六升也四區爲鬴六斗四升也鬴

十則鍾六十四斗也鄭玄以爲甬方尺積千寸比九章粟米法少二斗八十一分升之二十二以算術考之古斛之積凡一千五百六十二寸半方尺而圓其外減傍一釐八毫其徑一尺四寸一分四毫七抄二忽有奇而深尺卽古斛之制也

九章商功法程粟一斛積二千七百寸米一斛積一千六百二十七寸菽合麻麥一斛積二千四百三十寸此據精麤爲率使價齊而不等其器之積寸也以米斛爲正則同于漢志

魏陳留王景元四年劉徽注九章商功曰當今大司農斛圓徑一尺三寸五分五釐深一尺積一千四百四十一寸十分寸之三王莽銅斛於今尺爲深九寸五分五釐徑一尺三寸六分八釐七毫以徽術計之於今斛爲容九斗七升四合有奇魏斛大而尺長王莽斛小而尺短也

衡權

衡權者衡平也權重也衡所以任權而均物平輕重也古有黍稷錘鎰鈞鏹

晉書卷十六考證

律歷志上其典同掌六律六呂之和○同監本誤司今從周禮春官改正
其聲均清濁多不如法○後漢律歷志注均長七尺讀爲韻古無韻字均卽韻
也

猶宜儀形古者○臣龍官按形當作型者當作昔

晉書卷十六考證